

# საქართველო

გეთოლგებე საუკუნეები.

დ. ჯარაშვილის მიერ.

სურათებით.

ტფილისი.

ელექტრ. სტამბ. წ. 3. ქართ. ამ. \* Электроней. грузинск. издательств. Г-В-

1902.



“*არა მარტივი*,  
—*არა მარტივი*

# საქართველო

მთოლემეთი საუკუნეში.

29028

დ. ქათიშვილის მიერ.

სურათებით.



ტვილისი.

სლექტ. სტამბა ქართ. წ. გ. იმ. \* Электронич. грузинск. издательск. т-ва.

1902.

Дозволено цензурою. 16 октября 1902 года. Гор. Тифлисъ.

## საქართველო მეთოდებით საუკუნეები.

შ ე ს ა გ ა ღ ი .

### I.

საქართველოს პოლიტიკური მდგრადარება. — მისი საზღვრები. — ქართველები და მათი მეხობლები.

მეთოდები საუკუნეში საქართველომ მიაწია უმაღლესს წერტილს თავის ძლიერებისას და დაიკავა იმოდენა არე-მარე, რაოდენიც არა სჭრია სხვა დროს. მთელი ეს ხანი წარმოადგენს დიდებულს ძლევა-მოსილს ბრძოლას მოსაზღვრე მუსულმანს სახელმწიფოებთან. ქართველები არამც თუ წიცავდენ თავის თავს მტერთაგან, პირ-იქით თითონვე ესხმოდენ თავს მტრებსა, ძლევა - მოსილნი შედიოდენ მათ ქვეყნებში და იპყრობდენ იმისთანა აღვილებს, რომელნიც მტერთა სამკვიდრო საკუთრებას შეადგენდენ.

ამ საუკუნის საქართველოს სამეფოს წრეში შედიოდა მთელი ქართველთა სამკვიდრო ორიენტორია, ე. ი. ბასეინები მტკვრისა მის მარჯვენა და მარცხენა ჩასართავებით ეკლეციამდე და აღაზნამდე, ჭორობისა, რიონისა და ენგურისა. ქართველთა სამკვიდრებელის მიწა - წყლის გარეშე საქართველოს

ეკუთნოდა კიდევ აფხაზეთი და სასომხეთის ჩრდილოეთი ნაწილი ქალაქ ანითურთ. ამას გარდა საქართველოს მეფისგან დამოკიდებულნი იყვენ ჩრდილოეთით ოსეთი და აღმოსავლეთით შირვანი (მტკვრის მარცხნივ) და რანი (მტკვრის მარჯვნივ). ასე რომ პოლიტიკური გავლენა და უფლება საქართველოსი ამ საუკუნეში განისაზღვრებოდა—აღმოსავლეთით თეთრის (კასპის) ზღვით, ჩრდილოეთით კავკასიის მთაგრეხილით, დასავლეთით შავის ზღვით და სამხრეთით არაქსით (არეზით) და მტკვრისა და ჭოროხის სათავეებით.

ამნაირად მეთორმეტე საუკუნის საქართველოში თავმოყრილნი იყვენ უველა ქართველთა ტომნი, ერთის ენით მოსაუბრენი, ერთის სარწმუნოებით შეკავშირებულნი და ერთის ინტერესით გამსჭვალულნი. ქართველებთან ერთად იყვენ აგრეთვე აფხაზები, რომელნიც, იმის მიუხედავად რომ ჩამომავლობა და ენა ერთი არა პქონდათ ქართველებთან, დიდის ხნის ისტორიულად ერთად ცხოვრებამ მჭიდროდ დაუკავშირა ქართველობას. დანარჩენი უცხო ელემენტები—ოსები, სომხები და მუსულმანები, თუმცა კი პოლიტიკურად დაკავშირებულნი, სამწუხაროდ, არ იყვენ შეთვისებულნი და შეხორცებულნი ქართველობასთან. ეს მოხერხდებოდა მხოლოდ დიდის ხნით მჭიდრო ცხოვრებით და ერთნაირის კულტურის გავრცელებით. სომხები და შირ-

ვანის და რანის მუსულმანობა ახლად ამ საუკუნეში იყვენ დაკავშირებულნი პოლიტიკურად საქართველოსთან და, მაშასადამე, ისტორიულს ხნოვანობას ვერ შეეძლო მათი ქართველებთან შეთვისება; ამას გარდა, ისინი ენით და სარწმუნოებით ძრიელ განსხვავებულნი იყვენ ქართველთაგან, რაიცა აგრეთვე ხელს უშლიდა ქართველებთან შეთვისებას. რაიცა შეეხება ოსებს, თუმცა ისინი უფრო ადვილი შესათვისებელნი იყვენ, რადგან შათი პოლიტიკური კავშირი საქართველოსთან ახალი არ იყო, მაგრამ მათი გეოგრაფიული მდებარეობა და ველური კულტურა მუდამ აფერხებდა მათ შეთვისებას ქართველებთან. ამ მიზეზებთან ერთად, თუ სახეში მივიღებთ იმ გარემოებას, რომ ქართველები თავის დღეში არ ცდილან განგებ, მოხერხებით და მით უფრო ძალ-დატანებით რომლისამე დამორჩილებულის ერის გაქართველებას ან თავიანთ სარწმუნოებაზე მოქცევას, ადვილად გასაგები ხდება, თუ რატომ მეთორმეტე საუკუნეში არ შეეხორცენ და არ შეეთვისენ უცხო ელემენტები ქართველებს. ამ გარემოებითვე აიხსნება, რომ მთელი მეთორმეტე საუკუნის ისტორიის ტვირთის მზიდველი და ქაპანის მწეველი იყო ქართველობა, ხოლო სხვა უცხო ელემენტები მხოლოდ სარგებლობდენ ქართველების შრომით და სისხლით.

ქართველთა მოსაზღვრე ხალხი ამ საუკუნეში

იყვენ ბერძნები, სპარსები, თურქები, რომელთაც  
დაარსეს რავდენიმე წვრილი სამფლობელო სასომ-  
ხეთისა და ბიზანტიის ნატამალზე, და მთიელები.  
ბერძნების გარდა, რომელთაც თავიანთ სისუსტის  
გამო ამ საუკუნეში არ შეეძლოთ არც მტრობა და  
არც მოყვრობა ქართველებისა, და კავკასიის მთი-  
ელთა გარდა, რომელნიც ქართველებს მათ ძლიე-  
რებისა გამო მტრობას ვერ გაუბედავდენ, ყველა  
მოსაზღვრები ქართველთა წინაამდეგნი იყვენ,  
ცდილობდენ საქართველოს დამხობას და მშეიღბი-  
ანობას იცავდენ მხოლოდ იძულებით.

## II.

საქართველოს სოციალი წეს-წყობილება.

საქართველოს სოციალი წეს-წყობილება მეთორ-  
მეტე საუკუნეში წარმოგვიდგენს შემდეგს სურათს.  
მთელის ერის თავში იდგა და ქვეყნის პატრონი იყო  
ძეფე, რომელიც მართავდა სამეფოს. მას მოსდევდენ  
დიდებულები, რომელნიც მეფის შემდეგ უწარჩინე-  
ბულესნი პირნი იყვენ ქვეყანაში, მეფესთან ერთად  
იღებდენ მონაწილეობას სამეფოს საქმეთა მართვა-  
ში, მასთან ერთად ზრუნავდენ ქვეყნის სიკეთისა-  
თვის და ასრულებდენ უმაღლესის ხელისუფლების  
და ერისთავების თანამდებობას. დიდებულთ მოსდევ-  
დენ აზნაურები, რომელნიც, მართალია, პირდაპირ

მონაწილეობას არ იღებდენ სამეფოს მართვაში, მაგრამ დიდს სამსახურს უწევდენ თავიანთ პირადის შრომით და სისხლით. ისინი შეადგენდენ ცხენოსახს ჯარს, მეციხოვნობას სწევდენ დაპყრობილს ციხე-ქალაქებში და ასრულებდენ დაბალს ხელისუფლობას.

აზნაურებს მოსდევდენ გლეხები. ესენი იყვენ მოწის შემმუშავებლები და ყოველნაირის ხარჯისა და ბეგარის გადამხდელები და თან მეომრებიც, როდესაც სამშობლო გაჭირვებაში ჩავარდებოდა, ანუ საჭირო იქნებოდა სამშობლოს დიდებისათვის გალაშქრება.

ეს სამი წოდება—დიდებულთა, აზნაურთა და გლეხთა, თუმცა მემკვიდროებითი იყო, მაინც ერთითგან მეორეში გადასვლა ჰშირად ხდებოდა. გლეხი აზნაურდებოდა და აზნაური დიდებულდებოდა რაიმე ლვაწლისათვის. აგრეთვე დიდებული უბრალო აზნაურის ხარისხშე იქვეითებდა და აზნაური გლეხად იქცეოდა რაიმე დანაშაულის გამო.

ამ სამს წოდებასთან სამეფოში იყო კიდევ მეოთხე წოდება—სასულიერო, რომელიც თითქოცალკე სამეფოს წამოადგენდა ისეთისავე იერატექით, როგორიც იყო საერო უწყებაში. უმაღლესი მეფი მსგავსი აღგილი ეკავა კათოლიკოზე, დიდებულებისა მთავარ-ეპისკოპოზებს და ეპისკოპოზებს, მათ შემდგა აზნაურის მსგავსი აღგილი ეჭირათ მონასტრის

წინამდლვრებს და ქორეპისკოპოზებს, ხოლო სულ  
დაბალი აღგილი ეკავათ ხუცესებს, მღვდლებს და  
დიაკონებს და აგრეთვე უბრალო ბერებს.

იყო კიდევ ერთი მცირე-რიცხვოვანი წოდება,  
რომელსაც დიდი მნიშვნელობა არა ჰქონდა საქარ-  
თველოში. ესენი იყვენ მოქალაქენი, შემდგარნი  
ორის წყებისაგან: მდიდარის ვაჭრებისაგან და მე-  
წვრილმანე-ხელოსანთაგან.

მეფე ითვლებოდა სამეფოს ჰატრონად და მთე-  
ლი მიწა-წყალი მის საკუთრებად. ამ მიწას ამუშა-  
ვებდენ გლეხები და მეფეს სამაგიეროდ უხდიდენ  
ხარჯს და ბეგარას. მეფისგან აზნაურებს ჰქონდათ  
მიცემული სასარგებლოდ და სარჩოდ მამული იმ  
გლეხებით, რომელნიც ამ მამულზე ცხოვრებდენ.  
მამულის მფლობელობასთან ერთად მეფისგან და-  
თმობილი ჰქონდათ. აზნაურებს მომეტებული ნაწი-  
ლი გლეხის სამსახურისა. დიდებულებსაც აგრეთვე  
ჰქონდათ მიცემული მეფისგან დიდი მამული მას-  
ზედ მცხოვრების გლეხებით და აზნაურებით, რო-  
მელნიც მეფის სამსახურის მომეტებულს ნაწილს დი-  
დებულს უწევდენ.

ამნაირად ერთის შერით მიწის მფლობელობა,  
მეორე შხრით მეფის სამსახური ჰქმნიდა საქართვე-  
ლოს მაშინდელს სოციალს წეს-წყობილებას. მეფე  
იყო ჰატონი, სხვები იყვენ მისი ყმები. უწარჩინე-  
ბულესი მეფის ყმები იყვენ დიდებულები, რომელ-

თაც ეჭირათ მამული და დაქვემდებარებული ჰყავდათ ამ მამულის მოსარგებლე გლეხები და აზნაურები. უკანასკნელნი ან მეფეს ექვემდებარებოდენ პირდაპირ, ან რომელსამე დიდებულს. ერთსაც და მეორე შემთხვევაშიაც აზნაურებს ექვემდებარებოდენ გლეხები, რომელნიც მათ მამულზედ ცხოვრებდენ. ბოლოს იყვნენ გლეხები, რომელნიც ცხოვრებდენ ან პირდაპირ მეფის მამულზე, ან პირდაპირ დიდებულისაზე, ან აზნაურისაზე, რომელიც თავის მხრით ან პირდაპირ მეფის ყმა იყო, ან დიდებულისა. ამიტომ გლეხი იყო ოთხნაირი: 1) პირდაპირ მეფის ყმა, 2) სამეფო აზნაურის ყმა, 3) დიდებულის ყმა და 4) დიდებულის აზნაურის ყმა. აზნაური ორნაირი იყო: 1) პირდაპირ მეფის ყმა და 2) დიდებულის ყმა. დიდებული პირდაპირ მეფის ყმად ითვლებოდა. ხოლო ყველანი საერთოდ მეფის ყმებად ითვლებოდენ.

დიდებულის ვალდებულება მეფის წინაშე მდგომარეობდა იმაში, რომ მას მეფის ბძანებისამებრ უნდა მოეკრიფა თავის საყმოში ჯარი აზნაურთა და გლეხთაგან და გამოსულიყო სალაშქროდ. ასეთივე ვალდებულება აწვა მეფის აზნაურს. დიდებულის აზნაური კი დიდებულის მოთხოვნილებისამებრ უნდა გამოსულიყო თავის გლეხებით დიდებულის დროშის ქვეშ საბრძოლელად. მეფის ყმა გლეხები ვალდებული იყვნენ, როგორც პირადის სალაშქრო სამ-

სახურით, ისე ხარჯის ძლევით და ბეგარის გადახდით. დიდებულის გლეხი მოვალე იყო დიდებულისთვის ეძლია ხარჯი, ეწია ბეგარა და გასულიყო სალაშქროდ მის მოთხოვნისამებრ. აზნაურის გლეხიც მოვალე იყო ეძლია მისთვის ხარჯი, ეწია ბეგარა და გაპყოლოდა სალაშქროდ მას. დიდებულის გლეხები, ისე როგორც აზნაურისა, პირდაპირის ბატონის სამსახურის გარდა, მოვალენი იყვენ ზოგიერთი ხარჯი და ბეგარა ეხადათ მეფისთვისაც. ხოლო დდებულის აზნაურის გლეხები, სამეფო სამსახურისა და ბეგრის გადახდის გარდა, სამსახურს უწევდენ აგრეთვე დიდებულსაც.

ასეთივე დამოკიდებულება არსებობდა სასულიერო უწყებაში. კათოლიკოზეს და მცხეთის ეკკლესიას ჰქონდა დიდი მამულები, რომლებზედაც მოსახლეობდენ გლეხები და აზნაურები. პირველს შემთხვევაში გლეხები და აზნაურები ითვლებოდენ საკათოლიკოზო ან მცხეთის ყმებად, მეორე შემთხვევაში ისინი იწოდებოდენ სამონასტრო ყმებად. მათი დამოკიდებულება კათოლიკოზისა და მონასტრებისაგან ისეთივე იყო, როგორც დიდებულისა და აზნაურისაგან.

მეფეს შეეძლო, თუ საჭიროდ დაინახავდა, საერთო სარგებლობისათვის ან დასასჯელად, წაერთმია მამული დიდებულისთვის ან სამეფო აზნაურისთვის ზედ-მოსახლე გლეხებითურთ და მიეცა ან სხვა.

დიდებულისა და აზნაურისათვის, ან ეკულესიისა-  
თვის. თუ მეფე უდანაშაულოდ ართმევდა დიდე-  
ბულს ან აზნაურს, ჩვეულებრივ სხვაფრივ აქმაყოფი-  
ლებდა მას ახალის მამულის მიცემით სამაგიეროდ.

დიდებულებს და აზნაურებს შეეძლოთ თავიანთ  
მამულის გაყიდვა ან გაჩუქრება, მაგრამ ყოველთვის  
მეფის თანხმობა უნდა აეღოთ.

მოქალაქეები ექვემდებარებოდენ ან პირდაპირ  
მეფეს ან რომელსამე გამოჩენილს დიდებულს, რო-  
მელსაც აძლევდენ ისინი ხარჯს და სალაშქრო სამ-  
სახურს უწევდენ.

### III.

სამოქალაქო და სამხედრო წეს-წყობილება.

მეფედ ხდებოდა ჩვეულებრივ მეფის უფროსი  
ვაჟი შვილი, რომელსაც მეფე თავისსავე სიცოცხლე-  
ში აცხადებდა მეფედ ანუ, უკეთ რომ ვთქვათ, მე-  
ცკვიდრედ. ასე მოიქცა გიორგი II დავით აღმაშე-  
ნებელის შესახებ, დავით აღმაშენებელი დიმიტრის  
შესახებ, გიორგი III თამარის შესახებ და თამარი  
გიორგი ლაშას შესახებ. მხოლოდ რაიმე გარემოება  
უნდა ყოფილიყო, რომ მამას ტახტი გამოეწირა თა-  
ვის უფროსის ვაჟისთვის და მიეცა შემდეგისთვის.  
ასეთი შემთხვევა მოხდა დიმიტრის მეფობაში, რო-  
დესაც დიმიტრიმ უპირატესობა მიანიჭა უმცროსს

შვილს გიორგის და ამით უფროსი შვილი დავითი ძალიან გაანაწყენა, რამაც გამოიწვია რევოლუცია, რომლის შედეგი იყო დიმიტრის გადადგომა და დავითის გამეფება. თუ საკუთარი ვაჟი ან მახლობელი ნათესავი ვაჟი არ ეყოლებოდა მეფეს, მეფობა გადადიოდა ქალიშვილზე. თავის სიცოცხლეში მეფედ გამოცხადებულს შვილს მეფე ადგამდა გვირგვინს და ასრულებდა ცერემონიას დიდებულთა თანადასწრებით. ისიც მამასთან ერთად იწოდებოდა მეფედ, მაგრამ ნამდვილად კი არ მეფობდა. მხოლოდ ხანდახან მოხდებოდა, რომ მამა სიცოცხლეშივე სტოვებდა მეფობას და შვილი ხდებოდა სრულს მეფედ, როგორც მოიქცა გიორგი II, რომელმაც 1089 წ. მეფობაზე ხელი აიღო. და დავითს ჩააბარა. მაგრამ საფიქრებელია, რომ ასეთი ხელის აღება მეფობაზე უფრო ძალდატანებითი უნდა ყოფილიყო, როგორც ცხადათა ჩანს დიმიტრის მაგალითითვან.

მეფედ შვილის გამოცხადება მამისავე სიცოცხლეში უდრიდა მემკვიდრის დანიშვნას, რომელიც ახლანდელს დროშია მიღებული. ამნაირად წინდაწინვე მეფედ დანიშნული ადვილად და დაუბრკოლებლად იჭერდა მამის სიკვდილის შემდეგ ტახტსა. ამ ნამდვილს გამეფებას მეფე იხდიდა დიდის ამბით და ცერემონიით. იკრიბებოდენ დიდებულები სამეფოს უკელა კუთხითვან, თავს იყრიდა ჯარი, შემდგარი აზნაურთა და გლეხთაგან და მათ წინ ხდე-

ბოლა დაგვირგვინება და ტახტზედ ასელა. მთავარ-ეპისკოპოსი აღგამდა მეფეს თავზე გვირგვინს, დი-დებულები აცმევდენ პორფირს, ზეზს, ფესველს და ბისონს, არტყავდენ ხმალს, აძლევდენ ხელში სკიპტრას. ამის შემდეგ მეფე აღიოდა ტახტზე და ამბობდა. სიტყვას. ამ შემთხვევისა გამო იმართებო-და ნადიმი და მეფის ხაზინითვან აძლევდენ საჩუ-ქრებს და მოწყალებას.

მეფე ხშირად იწოდებოდა შვიდის სამეფოს მე-ფედ და მისი სამეფო შვიდის სამეფოსაგან შემდგა-რად, რის გამოც მეფე იხსენიებოდა მეფეთა-მეფეთ. ეს ტიტული ნამდვილის გამომთქმელი არ იყო. ის იყო გადმოღებული არაბთაგან, რომელთა ხალი-ფის საბძანებელი ითვლებოდა შვიდის სამეფოსაგან შემდგარად და ხალიფის ტიტულიც. იყო შვიდის სამეფოს მბძანებელი\*).

მართალია, მეფე ითვლებოდა უმაღლესს გამგებ-ლად ქვეყნისა, მაგრამ ის არ იყო ერთად-ერთი გა-დამწყვეტი საქმისა და განუსაზღვრელის უფლების მექანი. დიდებულთა დაუკითხავად და მოუწონებ-ლად ნაბიჯს ვერ გადასდგამდა. რა საქმეც უნდა ყო-ფილიყო, თუ რამე სამეფოსათვის მნიშვნელობა ჰქონდა, დიდებულების ყრილობა უნდა გაემართა

\*) Malcolm, t. I., p. 61.

და იმათთვის ეკითხა, მოქსმინა მათი აზრი და შემ-  
ღებ მიელო უმეტესობის აზრი, თურცა ხანდახან  
უმცირესობის აზრსაც აჩევდა და თვის პასუხის  
გების ქვეშ იქცეოდა. მაგრამ ეს ჭალიან იშვიათად  
მოხდებოდა ხოლმე. ხელისუფლებისაც კი მეფე დი-  
დებულთა რჩევით წიშნავდა და თვით ლაშქრობის  
დროსაც მეფეს, როგორც უმთავრესს ჯარის წინა-  
მძღოლს, დიდებულები ჰყავდა მჩევრლებად.

სახელშრიუმ საქმეების სამართავად მეფეს ჰყავ-  
და ხელისუფლები. ყველაზე ღიდი ხელისუფალი  
იყო ამირ-სპასალარი, შემდეგ მსახურთუხუცესი, მას  
მოსდევდენ მანდატურთუხუცესი, შეჭურჭლეთუხუ-  
ცესი, მწიგნობართუხუცესი, მდივანი, მეჯინიბეთ-  
უხუცესი და სხ. ამათ ებარათ მთელის სამეფოს სა-  
ერთო საქმეები და მეფის მახლობელნი და მუდაშ  
თანამხლებელნი იყვენ. სამეფო გაყოფილი იყო სა-  
ერისთავოებად და ყველა საერისთავოში თვითო  
ერისთავი იჯდა, რომელიც მეფის მოალავე იყო.  
საერისთავოები იყო: ქართლისა, კახეთისა, ერეთი-  
სა, რაჭა-თავკვერისა, სვანეთისა, გურიისა, ეგრისი-  
სა, აფხაზეთისა, სამცხისა, კლარჯეთისა. ტფილისში  
იყო განსაკუთრებული მოხელე ქალაქისა და მის  
არე-მარის მმართველად, რომელსაც ერქვა ტფი-  
ლისისა და ქართლის ამირა\*).

\*) ეს ტიტული იყო ნაშთა არაბთა მფლობელობის დრო-  
ისა, როდესაც ტფილის მართავდა ხალიფის სახელით ამირა.

სამხედრო წესიერება საჭიათ განვითარებული  
იყო მეთორმეტე საუკუნეში. ყოველი ქართველი,  
რა წოდებისაც უნდა ყოფილიყო, მოჭალე იყო სა-  
ომრად გამოსულიყო და მეომრად გადაქცეულიყო.  
მეომრები შეადგენდენ სპასა ანუ ლაშქარს. ლაშ-  
ქარი გაყოფილი იყო რაზებად, რომელთაც ჰყავ-  
დათ უფროსნი — სპასპეტები. ჯარის ნაწილის უფ-  
როსი იწოდებოდა სპასალარად, ხოლო მთავარ-  
უფროსი მთელის საქართველოს ჯარისა ამირ-  
სპასალარად.

ქართველთა გარდა ჯარი სდგებოდა უცხოთაგა-  
ნაც, რომელნიც მოწვეულ იქნებოდენ ხოლმე ჯა-  
მაგირით, მაგალ., ოსები, ყივჩაყები, ვარანგებია და  
ტყვეებად წამოყვანილთ და გაქრისტიანებულთ მუ-  
სულმანთაგან. უკანასკნელთაგან შემდგარი ჯარი  
იწოდებოდა მონასპად.

გალაშქრების დროს ჯარის თან მისდევდა სპასა-  
ლარისა და სპასპეტის გარდა ეპისკოპოზი ჭყონდი-  
დელი და ჯვარის+მტვირთველი. ის ჯარი, რომელიც  
მეფეს შელდა და იცავდა მას, იწოდებოდა ტაძრე-  
ულთა ჯარად. ჯარი, რომელსაც აყენებდენ ციხე-  
ებში დასაცველად, იწოდებოდა ციხოვანად. ციხის  
უფროსს ერქვა ციხის პატრონი. ომის დაწყების წი-  
ნად ჯარს აწყობდენ ამნაირად: წინამბრძოლად აყე-  
ნებდენ სამხრეთის საქართველოს მკვიდრთ, მე-  
მარჯვენედ იმიერ-საქართველოს მკვიდრთ და მემარ-

ცხენედ ამიერ-საქართველოს მკვიდრთ. ჯარი ორნა-  
ირი იყო: ცხენოსანი და ქვეითი.

იარაღი ჰქონდათ ქართველებს: ფარი, მახვილი,  
წათი, ხმალი, ოროლი, შვილდ-ისარი, შუბი და  
ლახვარი. სამხედრო ჩატმულობა: ჯაჭვი და მუზა-  
რადი. საომარი მოწყობილობა იყო ფილაკავანი,  
მოსაგერებელი—სხარტი და ხანდაკი.

საომარი საკრავები იყო: სპილენძ-ჭური, ბუკი,  
ქოსი და წინწილა.

#### IV.

სამღვდელოება, საეკლესიო წეს-წყობილება, საეკკლესიო  
კრებანი.

საქართველოს ეკლესიის უფროსი იყო კათო-  
ლიკოსი ანუ პატრიარქი, რომელსაც ირჩევდა მეფე  
დიდებულების დაკითხვით მთავარ-ეპისკოპოზთაგან.  
თუმცა ის ემორჩილებოდა მეფეს, მაგრამ პატივი კი  
მეფისა ჰქონდა მინიჭებული და დიდს მონიშვილეო-  
ბას იღებდა სამეფოს გამგეობაში დიდებულებთან  
ერთად. კათოლიკოზის შემდეგ იყვენ მთავარ-ეპი-  
სკოპოსები და ეპისკოპოსები, რომელნიც მართავდენ  
ცალკე მაზრებს, საეპისკოპოზოებად წოდებულებს.  
კათოლიკოზად და ეპისკოპოზებად ჩვეულებრივ დი-  
დებულთაგანნი ხდებოდენ. ეპისკოპოზებს მოსდევ-  
დენ ჭორეპისკოპოზები და წინამდლვრები მონასტ-

რეპისა... სულ ბოლოს იდგენ ხუცესნი, მღვდელნი და დიაკონნი. ბერობაში ამათ უდრიდენ მონაზონები და მეუღაბნოები. დიდი პატივი ჰქონდათ აგრეთვე ქორეპისკოპოზებს და წინამძღვრებს, რომელნიც აგრეთვე დიდებულთა და აზნაურთაგანნი იყვენ. შაგრამ არც ხუცესნი და დიაკონნი იყვენ დააგრძელნი, თუმცა ისინი მომეტებულად გლეხკაცთაგანნი იყვენ. ისინი გათავისუფლებულნი იყვენ ყოველგვარის ხარჯისა და ბეგრისაგან.

29028

ეპისკოპოზებს ეძლეოდათ სახელი იმ სოფლის-გან ან ქალაქისგან, სადაც იყო მათი კათედრა, მაგ-ჟუმბლიდიდელი (ჟუმბლიდში), ქუთათელი (ქუთაის-ში), აწყვერელი (აწყვერში), ალავერდელი (ალა-ვერდში), ბედიელი (ბედიაში), იყალთოელი (იყალ-თოში), ურბნელი (ურბნისში), მროველი (რუისში).

სასულიერო სამსახურის გარდა ეპისკოპოზებთ საერო გამგეობაშიაც იღებდენ მონაწილეობას და ხან სამხედრო თანამდებობაც ეპყრათ. დიდებულთა რჩევაში მონაწილეობას იღებდენ და ლაშქრობა-შიაც, თუ თითონ არ წინამძღვრობდენ, მეფეს თან დასდევდენ და რჩევას აძლევდნ. ხოლო ჟუმბლი-დელი მუდამ მეფის მახლობელი იყო და მწიგნო-ბართ-უხუცესობას ასრულებდა.

სამდიმო საეკლესიო საქმეების გადასაწყვეტად ხშირად მეფე და კათოლიკოზი მართავდენ საეკ-ლესიო კრებას, სადაც იღებდენ მონაწილეობას კა-

თოლიკოზი, ეპისკოპოზები, ქორეპისკოპოზები, წინამძღვრები, მონაზონები, ხუცესები და მეუღლაბნოები.

## V.

გონების გავითარება. — მწერლობა. — მონასტრების ლვაჭლი საქართველოში და უცხოეთში. — არაბების და სპარსების განათლების გავლენა.

პოლიტიკურს გავითარებასთან მეთორმეტე საუკუნეში საქართველო გავითარდა გონებრივადაც. ეს გავითარება მზადდებოდა და ფეხს იდგამდა ადრითგანვე, როდესაც გამრავლდა ქართველთა მონასტრები უცხოეთში, საღაც ბერები თარგმნიდენ ბერძნულითგან, სირიულითგან და სომხურითგან, როგორც საღვთო წერილის წიგნებს, ისე ყოველსავე საღვთისმეტყველო, საფილოსოფოსო და სამეცნიერო ნაწერებს.

ამგვარს მწერლობასთან ერთად ქართველები ბერძნულს ენაზედ ცნობილობდენ აგრეთვე ძველის წარმართობის ღროის მწერლობას და ეცნობოდენ ბიზანტიის სამართალს, საზოგადო ცხოვრებას და ხელოვნებას — მხატვრობას, არქიტექტურას და სხვათა. ხოლო მეთორმეტე საუკუნის გაძლიერებულის სამეფოს მთავრობამ საგანგებო ყურადღება მიაქცია საბერძნეთის განათლების შეთვისებას და გადმოლე-

ბას საქართველოში ამ აზრით დავით აღმაშენებელმა გაგზანა საბერძნეთში 40 ყმაწვილი კაცი, რომელთაც შეისწავლეს საბერძნეთის მწერლობა, მეცნიერება და გადმოიტანეს საქართველოში. დავითის კვალს, უეჭველია, მისდევდენ ამ საქმეში სხვა მეფეებიც და საბერძნეთში ყმაწვილის კაცების გზავნით ხელს უწყობდენ ბიზანტიის განათლების გადმოტანას საქართველოში.

მეთორმეტე საუკუნეშიაც, როგორც წინადაც, მოღვაწეობდენ უცხოეთში ქართველთაგან დაარსებული მონასტრები; სადაც ბერები განაგრძობდენ თავიანთ შრომას და თარგმნიდენ თუ თავად ადგენდენ და გადაწერით აჭრცელებდენ სხვა-და-სხვა შინაარსის წიგნებს. ამისთანა მოღვაწეობისათვის მეფეები უხვად სწირავდენ ამ მონასტრებს და გასავითარებლადაც სწორედ იქა ჰერიტაჟიდენ ყმაწვილს კაცებს.

უცხოეთში ამ საუკუნეში იყვენ შემდეგი ქართველთ მონასტრები: ათონისა, კონსტანტინოპოლისა (რომანასი), კვიპრისა, შავიმთისა (ანტიოქიაში), იერუსალიმისა, სინასი და სხ.

უცხო ქვეყნებში აშენებულის ქართველთა მონასტრების მსგავსად საქართველოს მონასტრებიც ირჯებოდენ და მოღვაწეობდენ, სკოლებს მართავდენ და ზრდიდენ ყმაწვილებს. თვითონ დავით აღმაშენებელმა განგებ დაარსა გელათის მონასტერი

იმ აზრით, რომ გამხდარიყო, ათონის მონასტრის მსგავსად, განათლების გამავრცელებლად საქართველოში.

საბერძნეთისა და საქრისტიანო აზის გარდა საქართველოს გავითარებაზე დიდი გავლენა ჰქონდა, როგორც წინა საუკუნეში ისე მეთორმეტეში, მაპ-მარიანს აზიასაც—არაბებსა და სპარსებს. საუკუნებრივი კულტურული კავშირი სპარსეთთან, ცოტა ხნით შეწყვეტილი ქრისტიანობის მიღების პირველს ხანებში, არ შეიძლებოდა არ განახლებულიყო შემდეგში, თუმცა, რა თქმაა, მუდამ ეს კავშირი ქრისტიანობის კონტროლს ქვეშ იქნებოდა. მეთორმეტე საუკუნეში კი მუსულმანთა ერთა კულტურა, მათი მეცნიერება და მწერლობა ისე ძლიერი შეიქნა, რომ ქართველები, თუმცა სულით და გულით ქრისტიანები, მაინც არ ერიდებოდენ და ეწაფებოდენ მათაც. ამის მაგალითს გვაძლევს თვით გვირგვინოსანი მეფე დავით აღმაშენებელი, რომელიც არ ერიდებოდა და სწავლობდა ცნობის-მოყვარეობით მაპმაღიანთა საღვთო სჯულს—ყორანს. ეჭვს გარეშეა, რომ ქართველები ამ საუკუნეშიაც და წინადაც სწავლობდენ არაბულს და სპარსულს ენებს, ცნობილობდენ მათ მწერლობას და მეცნიერებას და ეცნობოდენ მათ ისტორიას და ცხოვრებას. ამის საბუთად ჩვენ შეგვიძლიან დავასახელოთ როგორც ორგინალი ისე თარგმანი თხზულებანი.

მეთორმეტე საუკუნისა: ვეფხის-ტყაოსანი რუსთაველისა, აბდულ-მესია შავთელისა, თამარიანი ჩახრუხაძისა, ვისრამიანი სარგის თმოგველისა, ამირან-დარეჯანიანი მოსე ხონელისა და სხვანი. პირველი სამი თხზულება, თუმცა ორიგინალი თხზულებანი არიან, მაინც წამოგვიდგენენ დიდს გავლენას არაბ-სპარსთა მწერლებისას და მეცნიერებისას, ხოლო დანარჩენნი ან თარგმნილნი არიან სპარსულითგან ან გადმოკეთებულნი და ამნაირად მომასწავებელნი სპარსეთის მწერლობის გავლენისა.

ამნაირად ქართველთა განათლება და კულტურა მეთორმეტე საუკუნეში იყო ორის ერთი-ერთმანერთის წინაამდევის ელემენტის შეზავებულის გავლენის ქვეშ—ქრისტიანულისა და მუსულმანურისა.

## VI

## ეკონომიური მდგომარეობა.

თუმცა ჩვენ ბევრი არაფერი ცნობები გვაქვს ქართველის ერის ეკონომიურის მდგომარეობის შესახებ. მეთორმეტე საუკუნეში, მაინც შეგვიძლიან ვიქონიოთ საზოგადო წამოდგენა მის შესახებ. წინა საუკუნის დამლევს საქართველო ძალიან დავარდნილი იყო ნივთიერად. 1080 წლითვან მოკიდებულმა თურქთა გამუდმებულმა შემოსევამ რავდენისამე წლის გამავლობაში სულ ააფორიაქა ერის სიმღიდრე და

ცეცხლს მისცა სოფლები და ქალაქები, ტყეები, ვენახები და დათესილი ჭირნახული. თურქებმა და-ანგრიეს ციხეები, სიმაგრეები, მონასტრები და საყ-დრები და მოიტაცეს რაც კი რამ ოქრო-ვერცხლი, ძვირფასი ქვები და ჭურჭელ-იარაღი ნახეს. გაწყდა აუარებელი რიცხვი ქართველთა და, ვინც გადარჩა, დიდს სიღარიბეში ჩავარდა.

მეთორმეტე საუკუნეში-კი სრულებით სხვა სუ-რათს წამოადგენს საქართველოს ეკონომიკური მდგო-მარეობა. მთელის ამ საუკუნის გამავლობაში- ქარ-თველს ერს მტრის შიში არა ჰქონია და ამიტომ იგი არხეინად და გულმოდგინედ შრომობდა. უმთავრე-სი შრომა-კი მიწის შემუშავება იყო. საქართველოს მადლიანი ნიადაგი კარგს ნაყოფს აძლევდა მშრო-მელს და ამიტომ ქართველს სარჩოც უხვად ჰქონ-და. მშვიდობიანის შრომით ნაშოვნს სარჩოს ქარ-თველობა უმატებდა ომიანობის დროის ნაშოვნს სიმდიდრეს. ქართველთა ყოველს გამარჯვებას თან დიდის ალაფის შოვნა მოსდევდა. ხოლო, როგორც შემდეგ დავინახავთ, მთელი ეს საუკუნე ქართველ-თათვის ურიცხვთა გამარჯვებათა ხანა იყო. ნაშოვ-ნი ალაფი ამდიდრებდა ყველას: მეფის ხაზინას, დი-დებულთ, აზნაურთ და გლეხთა. ეკონომიკურად მო-ლონიერებულმა და სასოება-მიცემულმა ქართველო-ბამ ააშენა სოფლები, ქალაქები, მონასტრები და საყდრები, გაიყვანა გზები და არხები. ვინც-კი გა-

მრჯელი და მკლავ-მაგარი იყო, ყველას ჰქონდა  
სარჩო. ხოლო ვისაც რაიმე მიზეზით არ შეეძლო  
შრომა ან ომით სარჩოს შოვნა, უხვს მოწყალებას  
ღებულობდა მეფისა და დიდებულთაგან.

სიმდიდრის დატრიალების გამო აღებ-მიცემო-  
ბაც გავითარდა. ეკონომიურად მოღონიერებამ გაა-  
მრავლა ქართველთა რიცხვი ისე, რომ მეცამეტე  
საუკუნის ნახევარში, მონგოლთა შემოსევის შემდეგ  
საქართველოში, მატიანის მოწმობით, 4.000,000  
მკვიდრზე ნაკლები არ უნდა ყაფილიყო. თუ მაშინ  
ამდენი იყო, მეთორმეტე საუკუნის საქართველოს  
სამეფოში, 8 ან 6 მილიონი მაინც იქნებოდა. მა-  
გრამ სიმდიდრის გავრცელებას კარგს მხარესთან  
ცუდი მხარეცა ჰქონდა მაშინდელის ქართველების-  
თვის. წარჩინებული წოდება, ომიანობისაგან მოკ-  
ლილი, მიეცა ფუფუნებას და განცხრომას, რომ-  
ლის დამღუპველმა გავლენამ იჩინა თავი მეცამეტე  
საუკუნის დამდეგს, როდესაც საქართველოს დაესხენ  
მონგოლები.

## დავით აღმაშენებელი

### I

საქართველოს მდგომარეობა დავით აღმაშენებელის გამე-  
ფების წინ.

მეთერთმეტე საუკუნის მეორე ნახევარში სელ-  
ჯუკების სულთნებმა, ჯერ თოლრულ ბეგმა, შემდეგ  
მისმა ძმისწულმა ალპ-არსლანმა და მას უკან უკა-  
ნასკნელის შვილმა მელიქ-შაჰმა დაიმორჩილეს სპარ-  
სეთი და მთელი დასავლეთის აზიის მუსულმანობა. მუსულმანთა ქვეყნების შემდეგ თურქები შეუდგენ  
ქრისტიანთა ქვეყნების დამორჩილებას. სასომხეთი  
სრულიად დაიპყრეს. ბიზანტიას თანდათანობით აც-  
ლიდენ პროვინციებს და საქართველოსაც ხეირს  
არ აყრიდენ გამუდმებულის შემოსევით, ალპ-არს-  
ლანის დიდს სახელმწიფოსთან მეზობლად დაარსდა  
ბიზანტიის ნატამალზე საქართველოს საზღვრად სელ-  
ჯუკების მეორე სამეფო, იკონიის სამეფოდ წოდე-  
ბული. მძღავრმა სულთანმა არპ-არსლანმა მისცა  
ნება თავის ნათესავს სულეიმანს დაეარსებია საკუ-  
თარი სამეფო იმ ქვეყანათაგან, რომლებსაც ქრის-  
ტიანებს წართმევდა. სწორედ ამ სულეიმანმა დაა-

არსა იკონის სამეფო და ბიზანტიის წაართვა თით-ქმის მთელი ანატოლია ჰელესპონტიამდე და შავს ზღვამდე. ამავე სულთანის ჯარებმა გაიხადეს თა-ვიანთ სათარეშოდ საქართველო, რომელსაც პირ-ველად შემოესიენ ისინი 1080 წ.

ამ წელს თურქებმა ამირა აპმადის წინამძღო-ლობით ისე აიღეს საქარველოს ციხე ყარსი, რომ გიორგი მეფემ, რომელიც იმ დროს ჯავახეთში იყო ყველის ციხესთან, ვერ შეიტყო. ყარსის აღების შემდეგ აპმადი ყველის ციხისკენ გაემართა და მოუ-ლოდნელად დაეცა მეფე გიორგის, რომელიც ამის გაგებაზე გაიქცა აჭარისაკენ და თურქებს დაუტოვა დიდი დავლა. მეფე აჭარითგან გადავიდა აფხაზეთს, ხოლო თურქები აივსენ დავლით და უკანვე და-ბრუნდენ.

უკან დაბრუნებულს აპმადის რაზმს გზად შეხვ-და თურქების უფრო დიდი ლაშქარი, რომელიც ორის ამირას იასის და ბუქლობის წინამძღოლობით მიღიოდა ბიზანტიის სამფლობელოსკენ სალაშქროდ. აპმადისაგან შეიტყო ამ ორმა ამირამ, რომ საქარ-თველო კარგი სადავლო ადგილი იყო და შეფერ-შორს იყო წასული აფხაზეთში. ამის გამგონე თურ-ქებმა სწრაფად გადმოიარეს საქართველოს საზღვ-რები და მოედვენ ჩვენის ქვეყნის სხვა-და-სხვა კუთ-ხეებს: ასისფორნს, კლარჯეთს, შავშეთს, აჭარას, ქართლს, არგვეთს, შუა-გმერეთს და ეგრისს. ეს

იყო 1080 წლის თიბათვეში. თურქებმა დაწვეს არტანუჯი, ქუთაისი და კლარჯეთის მონასტრები, სადაც-კი წინამდეგობა შეხვდათ. რაც-კი ნახეს, ყველაფერი ააფორიაქეს და ინავარდეს სანამ თოვლი არ მოვიდა. შეშინებული მცხოვრებლები, ვინც გაულეტას გადურჩა, გაიხიზნენ კიხე-სიმაგრეებში, მთებში და ტყეებში და შეეფარენ კლდეებში და გამოქვაბულებში. ზამთრის დადგომისათანავე თურქები წავიდენ, მაგრამ ქართველებს მაინც ხეირი არ დაადგათ სიცივის გამო, რადგან მათი საცხოვრებელი ბინები აოხრებული იყო მტერთავან. მტრებმა არ აკმარეს ქართველებს ერთი შემოსევა. დადგა თუ არა გაზაფხული 1081 წლისა, კიდევ შემოვიდენ და მოედვენ იმავე ადგილებს. ხალხი ხელ-ახლა გაიხიზნა. თურქებმა ამ წელს დაპყვეს საქართველოს არე-მარეში ზამთრის დადგომამდე და ზამთრის პირს ისევ უკან წავიდენ. გახიზნულმა ქართველობამ ველარ გამობედა თავის ბინაზე დაბრუნებულიყო, რადგან მომავალის გაზაფხულისთვის კიდევ ელოდა მტრის შემოსევას. მართლაც 1082 წელსაც თურქები კიდევ შემოვიდენ საქართველოში და დარჩენ ზამთრის დამდეგამდე. აგრეთვე მოიკუნ 1083 წ. ხალხი. შეწუხდა და ბევრიც გაწყდა, ქვეყანა გაოხრდა და მხეცების სადგურად გადაიქცა. გიორგი მეფემ ვერ მოახერხა თავის ლონით თურქების განდევნა და ალაგმვა. მათმა მოულოდნელმა

და გაბედულმა. შემოსევამ თავზარი დასკა მეფესაც  
და ერსაც. ღიღებულთა რჩევით მეფემ გადაწყვიტა  
წასულიყო სპარსეთს. სულთან მელიქ-შაჰთან, გამო-  
ეცხადებინა მისთვის მორჩილება და ეთხოვნა, რომ  
დაეცვა მისი სამეფო იკონის თურქთა თავ-დასხმი-  
საგან.

1084 წ. გიორგი მეფე წავიდა ისპაანს და სთხო-  
ვა მელიქ-შაჰს მფარველობა, რის სამაგიეროდაც  
დაპირდა ერთგულებას და ხარჯის ძლევას. მელიქ-  
შაჰმა კარგად მიიღო გიორგი მეფე, დაპირდა მფარ-  
ველობას და დაავალა შემწეობა აღმოეჩინა მის ჯა-  
რისათვის კახეთის მეფის აღსართანის წინაამდევ-  
კახეთის დასაჭერად მელიქ-შაჰმა გამოგზანა ჯარი  
და მასვე გამოაყოლა გიორგი მეფეც. თურქთა ჯა-  
რი და გიორგი მეფე შევიდენ კახეთში ოვანობის-  
თვეში და მიადგენ ვეჟანის ციხეს, საღაც გამაგრდა  
მეფე აღსართანი. თურქები დიდხანს ადგენ ციხეს,  
მაგრამ ვერ მოახერხეს მის აღება. თოვლიც მოვიდა.  
გიორგი მეფეს მოსწყინდა თურქთა ბანაკში ყოფნა,  
თავი დაანება მათ და წამოვიდა თავის სამეფოში.  
თურქებმა დაიჭირეს სუჯეთი, მთელი ივრის პირი  
და კუხეთი.

ამავე წელს გიორგი მეფემ მეფედ გამოაცხადა  
თავისი შვილი დავითი და უწოდა სევასტოსი. ხო-  
ლო თითონ მიიღო ტიტული მეფეთ-მეფისა და კე-

საროსისა \*). მაშინ დავითი იქნებოდა თერთმეტის წლისა და, ცხალია, ქვეყნის გამგეობაში არ შეეძლო რამე მონაწილეობის მიღება. გიორგისგან თურქთა ჯარის მიტოვება კახეთში ამ ქვეყნის დაპყრობამდე სასიამოვნოდ არ უნდა დარჩენოდა მელიქ-შაჰს და ამის გამო არც ძალიან თავს გაიცხელებდა გიორგის მფარველობისათვის. მით უფრო რომ კახეთის მეფემ აღსართანშა უფრო საგრძნობლად დაუმტკიცა მას თავისი ერთგულება და მორჩილება. როდესაც დაინახა, რომ კახეთის დიდი ნაწილი თურქებმა დაიჭირეს, აღსართან მეფე წავიდა ისპაანს, გამოუცხადა მორჩილება მელიქ-შაჰს. და ნიშნად ერთგულებისა მაჰმადიანობა მიიღო. მელიქ-შაჰმა კახეთი ისევ აღსართანს მისცა და თავის სამეფოში გამოისტუმრა დიდის წყალობით.

ამნაირად არაფერი სარგებლობა მოუტანია ქართველებისთვის გიორგი მეფისაგან სულთან მე-

\*). იჩ. ქრონიკები თ. უორდანიასი, ტ. I, გვ. 232.

რომ დავითი მეფედ გამოცხადებულ იქმნა მამისგან სწორედ 1084 წ., ამას ემოწმება ვახუშტიც, რომელიც დავითის მეფობას სთვლის 41 წელს. ეს რიცხვი რომ მივუმატოთ 1084 წ., გამოვა 1125 წ., რომელიც არის დავითის სიკვდილის წელი. ვახუშტის საითგანლაც სცოდნია მეფობის ხანა და რაკი გამეფების წლად მიუღია 1089 წ., როდესაც ის მარტოდ-მარტო შეიქნა მეფედ, ამიტომ მის სიკვდილის წლად უჩვენებია 1130 წ.

ლიქ-შაჰის ნახვას. იქონის თურქები თავისას არ იშლიდენ და ესხმოდენ საქართველოს საზღვრებს. გაზაფხულით იწყებოდა მათი შემოსევა და შემოდგომით თავდებოდა.

თუნქებთან ერთად ხეირს არ აყრიდა საქართველოს გამუსულმანებული კახეთის მეფე აღსართანიც. თურქთა მძლავრობით გალალებულმა და მათ შემწეობით გაძლიერებულმა დაიჭირა ქართლის მომეტებული ნაწილი.


საქართველოს პოლიტიკურს გაჭირებას დაერთო სტიქიონური უბედურება. 1088 წ. მოხდა საშინელი მიწის ძვრა, რომელმაც დიდი ზიანი მისცა საქართველოს სოფლებს და ქალაქებს, საღაც დაირღვა სახლები, საყდრები, ციხის კედლები და სხვა შენობანი და ნანგრევებში მოჰყვა. მრავალი ხალხი. არამც თუ მარტო კაცის ხელით აგებული შენობანი დაირღვენ, არამედ დაიგალენ მთებიც და კლდეებიც. საშინელი ის იყო, რომ მიწის ძვრა ერთ-ხელ-კი არ მოხდა, არამედ რავდენჯერმე დრო-გამოშვებით და გასტანა ერთს წელიწადს, ასე რომ 1089 წელშიაც მოხდა რავდენჯერმე მიწის ძვრა.

ჯერ თურქების მძლავრობამ, შემდეგ საშინელმა მიწის ძვრამ დიდი ზედმოქმედება იქონიეს გიორგი მეფეზედ და ამიტომ მან გადასწყვიტა ქვეყნის მართვაზე ხელი აელო და გადაეცა მეფობის ტვირთი თავის შვილის დავითისთვის, რომელიც, როგორც

ზევით იყო ნათქვამი, უკვე გამოცხადებული იყო  
მისგან მეფედ. 1089 წ. გიორგი მეფემ დააგვირგვი-  
ნა დავითი. თითონ გიორგი-კი მხოლოდ სახელით  
იყო მეფედ და მარტო რჩევას თუ აძლევდა თავისს  
შვილს.

## II.

საქართველო დავითის გამეფების წამს.—ზრუნვა მის  
მოშენებისათვის.—შეპყრობა და განდევნა ლიპარიტ  
ორბელიანისა.—პოლიტიკური ცვლილება აზიაში და  
მისი შედეგი.



დავით  
აღმაშენებელი.

როგორც ვნახეთ, საქართველო  
სამწუხარო მდგომარეობაში იყო  
1089 წ., როდესაც გიორგი II-ზ  
ტახტი გადასცა. თავის თექვსმეტის  
წლის შვილს დავითს. კახეთი შეად-  
გნდა ცალკე სამეფოს, რომელსაც  
ეჭირა ქართლის დიდი ნაწილიც.  
ტფილისი, რუსთავი, სამშვილდე, აგა-  
რანი და მთელი სომხეთი თურქების  
ხელთ იყო. თრიალეთი და კლდე-  
კარნი ეჭირა ლიპარიტ ორბელიანს,  
რომელიც თუმცა გარეგნობით მეფის  
ხელთ იყო. თრიალეთი და კლდე-  
კარნი ეჭირა ლიპარიტ ორბელიანს,

და მტკვრის პირად. ხალხი მხოლოდ სიმაგრეებში და მიუღვომელს ადგილებში იმყოფებოდა. სოფლები და ქალაქები ოხრად იყვნენ დარჩენილნი. ხვნა-თესვა და სხვა მრეწველობა შეჩერებული იყო.

ამიტომ დავით მეფის პირველი საზრუნავი საჭ-  
მე იყო მკვიდრთა დასახლება გაოხრებულს და და-  
ცარიელებულს ადგილებში და მიწის შემუშავებისა-  
თვის ხელის მოკიდება. ამ აზრით მან მოიწვია დი-  
დებულნი და აზნაურნი, რომელნიც ციხე-სიმაგრე-  
ბში იყვნენ გახიზნულნი, შეაგონა მათ თავიანთ ად-  
გილებზედ დაბრუნებულიყვენ და თავიანთ მაგა-  
ლითით დაებრუნებინათ დაბალი ხალხიც თავის ბი-  
ნაზედ. ახალგაზდა, მხნე და მამაკის მეფის შეგონე-  
ბამ გასჭრა. ხალხს მიეცა იმედი, მიატანა მიტოვე-  
ბულს ადგილებს და ამნაირად გაოხრებულმა სოფ-  
ლებმა და ქალაქებმა იწყეს მოშენება. თურქები  
უწინდებულად ჰქედავდენ თარეშობას მათგან. შეყვა-  
ბულს ადგილებში, მაგრამ ისე თავისუფლად და  
მოურიდებლად ველარ ახერხებდენ. ქართველი ხალ-  
ხი, ახლა ცოტად გამხნევებული და იმედ-მიცემული,  
წინაამდეგობას უწევდა თურქებს და უკან აბრუნებ-  
და შემოსეულებს. თვით დავით მეფე, საცა შეხვ-  
დებოდა თურქთა ლაშქარს, აგრძნობინებდა, რომ  
ახლა-კი ისე ადვილი არ იყო საქართველოს აკლე-  
ბა-ოხრება, ამიტომაც თურქები უფრო ფრთხილად

იქცეოდენ და, თუ არ მოპარვით ან დიდის ჯარით,  
ვეღარ ჰქედავდენ შემოსევას.

გარეშე მტრების ალაგმვასთან ერთად დავითი  
მოწადინებული იყო აელაგმა და დაეთრებუნა. შინა-  
ური მტრებიც. ასეთი მტრები იყვენ უმთავრესად  
მძლავრი დიდებულები, რომელთაც დიდი მამული  
ჰქონდათ და მიჩვეულნი იყვენ მეფის წინაამდეგ მოქ-  
მედებას. მათ შორის შესამჩნევი იყო ლიპარიტ ორ-  
ბელიანი, რომლის მამა-ჰაპასთან დიდი ბრძოლა  
ჰქონდათ წინანდელს მეფებს მათ დაუდგრომელო-  
ბის და ურჩობის გამო. ლიპარიტ ორბელიანს არ  
მოეწონა დავითის მხრით მეფურის ხელმწიფების  
გამოხენა დიდებულებზედ და 1093 წ. გაიზრახა  
მისგან გადგომა სპარსეთის ახალის სულთანის ზარ-  
ქიაროქის შემწეობით. დავითმა შეუტყო მას გან-  
ზრახვა და ფიცხლავ შეიპყრო იგი. იმედ-გაცრუე-  
ბულმა და ცბიერმა ლიპარიტმა მოიკატუნა თავი,  
მეფეს გამოუცხადა მორჩილება და შეჰვიცა. სა-  
კვლავოდ ერთგულება. დავითმა მაშინვე გაათავი-  
სუფლა და დაუბრუნა ყველა ქვეყნები, რაც წინად-  
ეჭირა, მაგრამ ლიპარიტმა არ დაიცვა ფიცი და გა-  
თავისუფლდა მხოლოდ იმიტომ, რომ ხელ-ახლად  
დაეწყო დავითის წინაამდეგ მოქმედება. დავით მე-  
ფემ კიდევ შეუტყო და შეიპყრო. ორს წელს ჰყავ-  
და დაპატიმრებული და შემდეგ 1095 წელს გაათა-  
ვისუფლა იმ პირობით, რომ განდევნილიყო საქარ-

თველოთგან. ლიპარიტი წავიდა საბერძნეთს და იქ გადაიცვალა, ხოლო მისი მამული დავითმა მისცა მის შვილს რატი ორბელიანს.

ქართველთა ერის საბერძნიეროდ დავით მეფის მეცადინეობას თავის სამეფოს გაძლიერებისათვის დიდად შეუწყო ხელი თურქთა სახელმწიფოს დაუძლეურებამ მელიქ-შაჰის სიკვდილის შემდეგ და იმ დროს დაწყებულმა ჯვაროსანთა ლაშქრობამ. მელიქ-შაჰის სიკვდილის შემდეგ 1092 წ. მისმა ოთხმა შვილმა ერთმანერთს დაუწყეს შეცილება ტახტისა და გამართეს ურთიერთთ შორის ბრძოლა. ამ შინაურის არეულობით, ისარგებლეს ზოგიერთმა მძლავრმა ამირებმა და დამოუკიდებელნი შეიქნენ. ამ შინაურს ბრძოლას თურქთა სამფლობელოს დასაუძლეუბლად ზედ დაერთო ჯვაროსანთა ლაშქრობა. 1096 წ. ევროპის ქრისტიანებმა გამოილა შქრეს აზიაში. მუსულმანთაგან ქრისტეს საფლავის გასათავისუფლებლად და ამით დიდს შიშში ჩააგდეს მთელი მუსულმანობა დასავლეთის აზიისა. 1096 წ. ჯვაროსნები მივიდენ კონსტანტინოპოლში. 1097 წ. გადმოვიდენ აზიაში და დაიჭირეს ნიკეა. 1098 წ. დაიპყრეს ედესა და ანტიოქია, ხოლო 1099 წ. თვით იერუსალიმი და ამ ნაირად შუა სამუსულმანოში დაარსეს ქრისტიანთა დამოუკიდებელი სამეფო და სამთავროები. მთელი მუსულმანობა ჯვაროსანთა წინაამდეგ მიიმართა და ამით შესვენება მიეცა მათ-

გან საქართველოს. დავით მეფემ ისარგებლა ამ შე-  
სვენებით და მოუსპო ხარჯის ძლევა თურქების  
სულთანს, ხოლო გახიზნული ხალხი უშიშრად და-  
სახლა იმ ადგილებში, რომლებშიაც თურქები მანამ-  
დე ყოველს წელიწადს შემოდიოდენ და თარე-  
შობდენ.

დავითს ახლა ორი უმთავრესი საგანი ჰქონდა  
შესასრულებელი: 1) კახეთის შემოერთება და 2)  
წართმევა თურქებისათვის იმ ადგილებისა; რომლე-  
ბიც საქართველოს არე-მარეზე მათ ეჭირათ.

### III.

კახეთის შემოერთება დავითის მიერ.—რატი ორბელია.  
ნის სიკვდილი დი მისი მამულის დაჭერა მეფისგან.

როგორც ზევით მოვიხსენიეთ, სპარსეთითგან  
დაბრუნებულმა გამუსულმანებულმა კახეთის მეფემ  
აღსართანმა დაიჭირა კახეთი და ქართლის ზოგიერ-  
თი ადგილებიც წართვა გიორგი მეფეს. აღსართა-  
ნის შემდეგ კახეთში გამეფდა 1086 წ. მისი შვილი  
კვირიკე, რომელიც, მატიანის თქმით, შესანიშნავი  
იყო თავისის ხასიათით, მხნეობით და ქრისტიანუ-  
ლის ქცევით.

დავით მეფე ვერ დასთმობდა ქართლის იმ ად-  
გილებს, რომლებიც ეჭირა კახეთის მეფეს, ამიტომ  
მიაღვა კახელებისგან დაჭერილს ქართლის ციხეებს

და ზედი-ზედ აიღო ერთი მეორის შემდეგ. უკანა-სკნელად დავითმა აიღო ციხე ზედაზენი და ამნაი-რად დაიბრუნა კახეთისგან ქართლის ყველა ნაწი-ლები (1101 წ.). დარჩა ახლა მხოლოდ თვით კახე-თის სამეფოს გაუქმება და მისი დანარჩენს საქართ-ველოსთან შემოერთება. ესეც მალე მოხდა.

1102 წ. მოკვდა კვირიკე მეფე და მის მაგიერ გამეფდა ძმის-წული მისი ალსართან, მატიანის თქმით, კაცი უმსგავსო და მეფობის ულირსი. კახელებს არ უყვარდათ იგი მის საძაგელის ქცევისათვის. ამასთან კახეთის მცხოვრებთა კარგა დიდს ნაწილს უკეთე-სად მიაჩნდა დანარჩენს საქართველოსთან ერთად ცხოვრება და მხნე და ჭკვიანის მეფის დავითის ხელთ ყოფნა. შესდგა დიდებულთა შორის დასი ალსართა-ნის წინაამდეგ. აი ამ დასის მოთავეთ ბარამ არი-შიანმა და ქავთარ ბარამიძემ შეიპყრეს ალსართანი და მისცეს დავით მეფეს შეპყრობილი. დავითმა ისარ-გებლა ამ შემთხვევით და სწრაფად დაიჭირა მთელი კახეთი (1104 წ.).

კახეთის დაჭერა დავითისაგან არ იამათ თურ-ქებს და ამიტომ სულთანის მოპამედის ბძანებით შემოვიდენ მის და განძის ათაბაგის ჯარები კახეთის ჩამოსართმევად. თურქებს მიემხრენ ზოგიერთი კახე-ლები, რომელთაც გაცალკევება ერჩივნათ საქარ-თველოსთან ერთობას. მტრის ჯარს შეხვდა დავით მეფე ერწოში და დიდი ომი გაუმართა მას. გამარ-

ჯვებული დარჩა დავითი და ამ ნაირად მტკიცედ  
დაიჭირა კახეთი სამუდამოდ (1105 წ.).

ამავე ხანებში გადაიცვალა თრიალეთისა და  
კლდეკარის მფლობელი რატი ორბელიანი და, რაღ-  
გან მემკვიდრე არ დარჩა მას, დავით მეფემ კანო-  
ნისამებრ სახასოდ დასდო მისი მამული. ამნაირად  
მოისპო ორბელიანთა გვარის ის შტო, რომელიც  
მფელის გასულის საუკუნის გამავლობაში მეფეთა  
წინაამდეგი და საქართველოს ერთობის მშლელი  
იყო. მეფემ ამ მამულის მართვა-გამგეობა ჩააბარა  
თევდორე ორბელიანს.

#### IV.

საეკლესიო კრეპა და მისგან დაწერილი ძეგლი.

როდესაც დავით მეფემ მოაგვარა თავის სამე-  
ფოს საქმეები იმდენად, რომ გარეშე მტერთაგან  
უზრუნველ-ჰყო სამეფო და მხოლოდ-ლა საჭირო  
იყო მუყაითობა და გამჭრიახობა მტერთა ხელთ  
მყოფის საქართველოს ნაწილების დასაბრუნებლად,  
მან მიაქცია თავისი ყურადღება საქართველოს სა-  
ეკლესიო და ზნეობრივს მდგომარეობას.

მტერთაგან აკლებისა და დაჩაგვრის დროს სა-  
ქართველოს ეკლესიაში დამკვიდრდენ უწესოებანი.  
დიდებულთა თავგასულობამ და თავნებობამ საეკ-

ლესიონ წესებსაც დასდოთ თავისი დალი. ამიტომ  
მეფეეს არ შეეძლო არ ეზრუნა საქართველოს საეკ-  
ლესიონ წეს-წყობილებაში სასურველის წეს-რიგის  
ჩამოგდებისათვის და მით ზნეობრივის მხარის გაუმ-  
ჯობესებისათვის, რომელიცაც-კი ზნეობრივს მხა-  
რებე გავლენა ჰქონდა ეკლესიას. 1103 წ. მეფემ  
მოიწვია საეკლესიო კრება, რომელზედაც დაესწრენ  
კათოლიკოზი, ეპისკოპოზები, მღვდლები, დიაკონე-  
ბი, მონაზონები, დაყუდებულები და მეუდაბნოები.  
კრება მოხდა რუისისა და ურბნისის. შეა ადგილს.  
კრების თავჯდომარედ იყო საქართველოს კათოლი-  
კოზი იოანე. კრებამ განიხილა საეკლესიო საქმე-  
ები, რომლებიც-კი ასე თუ ისე საყურადღებონი  
იყვენ და მათ შესახები თავისი გადაწყვეტილებანი  
აღნიშნა მეგლის წერაში, რომელიც შესდგება 15  
მუხლისაგან:

1) კრებამ განკვეთა ანუ გადააყენა ეპისკოპო-  
ზობითგან ის პირნი, რომელთაც მძღავრობით ჰქონ-  
დათ დაჭრილი მღვდელ-მთავრის ადგილი, თუმცა  
თავიანთ ცხოვრებით და სწავლით სრულიად უღირს-  
ნი იყვენ ამ თანამდებობისა. მათ ადგილს კრებამ  
დაადგინა მღვდელ-მთავრებად სხვა უფრო ღირსე-  
ული პირები.

2) სამღვდელ-მთავრო და სამღვდელო პირებისა-  
თვის განაწესა წლოვანობა, რომლის უადრეს არ

შეიძლებოდა მათი ხელდასხმა, მაგალითად 35 წელი ეპისკოპოზთათვის, 30 მღვდელთათვის, 25 დიაკონთათვის, 8 წიგნის მკითხველთათვის. ამასთან აკრძალა კრებამ ერთსა და იმავე დღეს ერთის ხარისხითგან მეორე და მესამე ხარისხზედ აყვანა ხელდასხმით.

3) წესი ხელდასხმისა, აგრეთვე კურთხევა ეკლესიისა, დამყარება საკურთხევლისა და კურთხევა მირონისა, კრების გადაწყვეტილებით, უნდა მოხდარიყო ისე, როგორც გიორგი მთაწმინდელის მიერ დაწერილს კურთხევანში იყო მოხსენებული.

4) კრებამ აკრძალა ქრთამის ანუ ძლვნის მიღება ხელდამსხმელის მიერ ხელდასხმულისაგან.

5) აგრეთვე აკრძალა მოხმარება, რა გვარის მიზნითაც უნდა ყოფილიყო, ეკლესიის გარეშე ყოველისავე საეკლესიო ანუ ეკლესიისთვის შეწირულის ნივთისა.

6) აკრძალულ იქნა ეკლესიის გარეშე ნათლისცემა, დაგვირგვინება, მონაზონის კურთხევა; აეკრძალა ხუცეს-მონაზონს გვირგვინის კურთხევა, აგრეთვე ერისგანს მღვდელს მონაზონის კურთხევა. დადგენილ იქნა, რომ უნდა ზიარებულიყვენ ცოლჭმარნი პირველისა და მეორე გვირგვინის კურთხევის შემდეგ. მეორედ გვირგვინის მაკურთხეველი

ხუცესი არ უნდა მისულიყო სამხრად გვირგვინ-ნა-კურთხებთან და პირველი გვირგვინი არ უნდა ჰკურ-თხებოდათ მეორედ დასაქორწინებლებს.

7) აკრძალულ იქნა ჩჩილთ ქალ-ვაჟთა გვირგვინის კურთხევა. თუ მშობლებისთვის საჭირო იქნებოდა რამე მიზეზით მოყვრობა ქალ-ვაჟის პატარაობაში, ნება ეძლეოდათ პატარები დაეწინდათ, ხოლო დაქორწინება-კი მაშინ უნდა მომხდარიყო, როცა ისინი ასაკს მოვიდოდენ. ჯვარ-დასაწერი ქალი 12 წლისაზედ ნაკლები არ უნდა ყოფილიყო.

8) კრებამ დაავალი კათოლიკოზს და ეპისკოპოზებს, რომ ქორეპისკოპოზებად სჯულისა და საღვთო წიგნთა მცოდნე აერჩიათ, მღვდლებად და ღია-კონებად ღვთის მოშიში და საქრისტიანო წესთა დამცველი კაცები დაეყენებინათ, რათა ქრისტიანობის არ გაეცათ არც ერთი იმ წესთაგანი.

9) რადგან დიდი შფოთი და განხეთქილება ხდებოდა მონასტრებში იმის გამო, რომ ერთსა და იმავე მონასტერში რავდენიმე (10—20) მოძღვარი ითვლებოდა, ამიტომ კრებამ დააღვინა — თითო მოძღვარი ჰყოლოდა თითო მონასტერს, ხოლო თუ ძალიან დიდი იქნებოდა მონასტერი, შეეძლო ჰყოლოდა ორი მოძღვარი.

10) კრებამ აკრძალი მონასტრებში სავაჭრო კრებების გამართვა და საზოგადოდ ყოველნაირის ქალაქურის და სოფლურის წესის შემოღება.

11) აკრძალა აგრეთვე ერთს საკურთხეველზედ  
მრავალთ სულთათვის მრავალთ მღვდელთაგან უამის  
წირვა. უკანონოდ ალიარა უამის წირვა ცოცხლისა-  
ანუ მიცვალებულისათვის სხვა დროს, გარდა იმ  
დღეებისა, რომელნიც დაწესებულნი იყვნენ ალაპთა-  
თვის და სულის ხსენებისათვის.

12) კრებამ დაადგინა, რომ ანტიოქიის და სხვა  
ეკლესიათა წესისამებრ ხელ-ახლად მოენათლათ  
როგორც წარმართი ვინც გრიგორიანთა საჩრდი-  
ნოებითგან გადავიდოდა მართლმადიდებლობაზე.

13) აკრძალულ იქნა მართლ-მადიდებელი შე-  
ულლებოდა მწვალებელს ან წარმართს.

14) აკრძალულ იქნა აგრეთვე წესი შორითგან  
ქორწინებისა, რომელიც იმ დროს ყოფილა მიღე-  
ბული საქართველოში მომეტებულად დიდებულთა  
და წარჩინებულთა შორის. როდესაც საცოლო და  
საქმრო სხვა-და-სხვა ადგილს იქნებოდენ, იმათი  
შეუღლება ასე ხდებოდა. საცოლოს ეკურთხებოდა  
გვირგვინი ერთს რომელსამე კაცთან, რომელიც ითვ-  
ლებოდა საქმროს წარმომადგენელად და საქმროსაც  
ეკურთხებოდა გვირგვინი ერთს რომელსამე კაცთან,  
რომელიც საცოლოს წარმომადგენელად ითვლებო-  
და. ეს ჩვეულება გამოწვეული იყო იმით, რომ  
ხშირად ლაშქრობაში მყოფი მამაკაცი მარხვის დად-  
გომამდე ესწრაფებოდა ქორწინებას, მაგრამ, რად-

გან ამ ვადაში არ შეეძლო საცოლოსთან წასვლა ქორწინებისათვის, ამიტომ ჯვარს იწერდა მაზედ შორითგან. ვინც ამ ნაირად ყოფილიყვენ შეულლებულნი და დახოცილიყვენ, კრებამ შეუნდო, ვინც იმ დროს ცოცხლები იყვენ, ისინი უკანონო ცოლ-ქმრად შერაცხა, ხოლო საკვლავოდ ამისთანა ქორწილი მკაცრად აკრძალო და კანონის დამარტვეველად ჩათვალა ის ოთხი პირი, რომელნიც ამ ნაირად შეულლებაში მონაწილეობას მიიღებდენ და ის ორი მღვდელიც, რომელნიც გვირგვინს უკურთხებდენ მათ.

15) ბოლოს კრებამ მიაჭირა ყურადღება იმ ბილწს ჩვეულებას, რომელსაც უწოდებს სოდომიას. კრებამ, აღნიშნა-რა სიმდაბლე და სისაძაგლე ამ ჩვეულებისა, ვალდებულ-პუო ყოველი ამ ჩვეულებით შეპყრობილი ხელი აეღო მაზედ, ხოლო ვინც არ აიღებდა ხელს, მათზედ წამოსთქვა წყევა-კრულვა. აგრეთივე წყევა-კრულვა გააჩინა კრებამ იმ პირებზედ, რომელნიც არ მოიშლიდენ კაცის გინებას და პირით იკადრებდენ იმის წამოთქმას, რის შესრულებაც საჭმით სისაძაგლეს შეადგენს.

ეს ძეგლი კრებამ წაუდგინა დავით მეფეს, რომელმაც იგი დაამტკიცა და დახმარება ამოუჩინა კათოლიკზე მის სისრულეში მოყვანისათვის.

## V.

სამშვილდის აღება.—თრიალეთზედ თურქების დამარცხება.—გიორგი მეფის სიკვდილი. —რუსთავის აღება.—ტაოში თურქების დამარცხება.—გიშის დაჭრა და გრიგოლიძეების შეპყრობა.—დიმიტრის გალაშქრება შირვანში.—მეფის გალაშქრება არაქსის ნაპირებზე.—ლორისა და აგარანის დაჭრა.

შინაურს ცხოვრებაში წეს-წყობილების გაუკეთესების შემდეგ შესაძლებელი იყო უფრო აღვილად ბრძოლა მტრებთან, რომელთაც ჯერ კიდევ ხელთ ეჭირათ საქართველოს დედა-ქალაქი ტფილისი და ზოგიერთი ადგილები ციხე-ქალაქებითურთ. თურქებს შიში მიეცათ მხნე და მძლავრის დავით მეფისა და ამიტომ ისინი ბეჯითად აღევნებდენ თვალყურს მის მოძრაობას. მოსაზღვრე თურქები მუდამ ფხიზლად იყვენ, თუ დავით მეფის სიახლოვე იცოდენ, ხოლო როდესაც შორს დაიგულებდენ, მაშინკი თამამად იქცეოდენ და სიფრთხილე აღარ იცოდენ. თურქების ასეთის ქცევით მეფე სარგებლობდა მათვე დასამარცხებლად. ხშირად განგებ გადადიოდა ქართლითგან იმერეთს, რომ მოსაზღვრე მტრებში სიფრთხილე მოესპო, ხოლო შემდეგ უცებ დაესხმოდა მოულოდნელად მტრებს და ამარცხებდა მათ. ასე მოიქცა მეფე 1110 წელს. მის ბძანებით, მწიგნობართ-უხუცესი გიორგი ჭყონდიდელი, ამის დის-

წული თევდორე ორბელიანი და აბულეთ და ივანე ორბელიანები. მოულოდნელად დაესხენ სამშვილდის ციხეში უშიშრად მყოფს თურქებს და თითქმის უბრძოლელად დაიჭირეს ეს ციხე, რომელიც მთელს სომხეთს მბანებლობდა. ამ ციხის დაკარგვის შემდეგ თურქები იძულებულები შეიქნენ დაეტოვებინათ სომხეთის ციხეების მომეტებული ნაწილი, რადგან უსამშვილდოდ მათში თავის შენახვა არ ეხერხებოდათ. ქართველებმა დაიჭირეს ეს მიტოვებული ციხეები.

ეს ამბავი რომ შეიტყო სპარსეთის სულთანმა, გამოგზანა საქართველოს წინაამდეგ დიდი ჯარი, რომელიც ჩვენის მატიანის თქმით 200,000 კაცი საგან შესდგებოდა. ამ დროს დავით მეფე ნაჭარმაგევში იდგა თავის ტაძრეულით. საღამო ხანს მოუვიდა ამბავი თურქების თრიალეთზე მოსვლისა. მან ხელად შეკრიფა იქვე მყოფი 1500 კაცი და იმავე ლამეს გაემართა თრიალეთისაკენ. დილით შეხვდენ მას თურქები, რომლებსაც გაუმართა ფიცხელი ბრძოლა. ბრძოლა გაგრძელდა მთელს დღეს და მებრძოლნი გაჰყარა საღამო. დავით მეფე მეორე დილისთვის ემზადებოდა საბრძოლელად, მაგრამ როგორც მეფე ისე მის ჯარი გაცვიფრებულნი დარჩენ, როდესაც მეორე დღეს დილით დაინახეს, რომ ლამით გაქცეულიყვენ თურქები და დაეტოვებინათ ჩქვე ყოველიფერი, რაც ავლადიდება ჰქონდათ.

1112 წ. მოკვდა მეფე გიორგი. მარტალია, არა-  
ჩანს, რომ დავითის გამეფების შემდეგ გიორგის რა-  
მე მონაწილეობა ჰქონოდეს სამეფო საქმეებში, მა-  
გრამ ეს-კი უეჭველია, რომ მამა რჩევას და დარი-  
გებას აძლევდა ხშირად შვილსა. ამის ნიშანს ვხე-  
დავთ დავითის ანდერძში, სადაც მოხსენებულია,  
რომ დავითს დაუტოვებია გიორგის რჩევით ძაგამი-  
სათვის ზოგიერთი მისი მამული, თუმცა მას სდომე-  
ბია სრულებით წართმევა, რადგან ძაგამი ყოფილა  
კახეთის მეფის მომხრე. გიორგის სიკვდილის შემ-  
დეგ დავითი არა რჩება მარტოდ-მარტო გამოცდი-  
ლისა და ერთგულის მრჩევლის უყოლად. ამისთანა  
მრჩეველი იყო გიორგი ჭყონდიდელი, რომელიც  
ჩვეულებრივად ჭყონდიდლობასთან ერთად მწიგნო-  
ბართ-უხუცესის თანამდებობასაც ასრულებდა.

1115 წ. დავით მეფის მუხრანში ყოფნის დროს  
გიორგი ჭყონდიდელი წაუძღვა ჯარს რუსთავის  
ასაღებად და იქიდან თურქთა გასაღევნად. მტერი არ  
ელოდა თავდასხმას და ამიტომ ქართველებმა აღვი-  
ლად დაიპყრეს რუსთავი. ამ ქალაქის დაკარგვის  
გამო თურქებს გაუჭირდათ მტკვრისა და ივრის პი-  
რად საზამთროდ დაბანაკება, ხოლო ქართველებს  
გაუადვილდათ მათი დევნა ამ აღგილებითგან. მეფეს  
ჰყავდა ყველგან დაყენებული კაცები, რომელებიც  
თვალს ადევნებდენ თურქების მოძრაობას და, შეი-  
ტყობდენ თუ არა ისინი თურქების განზრახვას ხსე-

ნებულ ადგილებში დაბინავებისას, აცნობებდენ რუს-  
თავის მეციხოვნებს და ესენიც არ უშვებდენ მათ.

არც სხვა ადგილებში აძლევდა ახლა მეფე თურ-  
ქებს საზამთროდ დაბინავების ნებას. 1116 წ., რო-  
დესაც ისინი ზამთრობით მოვიდენ ტაოში და დაი-  
ბანაკეს, ეს ამბავი შეიტყო დავით მეფემ ქართლში.  
მან მაშინვე ბძანა ქართლის ლაშქრის დამზადება,  
ხოლო თითონ გადავიდა ქუთაისს და შეაგროვა  
იმერეთის ჯარი. იქითგან ქართლისა და მესხეთის  
ჯარს შემოუთვალია, რომ დანიშნულს ვადაზე კლარ-  
ჯეთში დახვედროდენ, ხოლო თითონ იმერეთის ჯა-  
რით მივიდა ხუფთას და ჭოროხის ხეობით წავიდა  
კლარჯეთს, სადაც შეიყარა მთელი მისი ჯარი. თურ-  
ქები გულდადებით იყვენ ტაოში და არ ელოდენ  
ქართველების თავდასხმას. დავით მეფე ამ დროს  
დაესხა თურქებს, რომელნიც გაფანტულიყვენ ბა-  
სიანამდე და კარნიფორის მთებამდე, მოსრა მრავალ-  
ნი, დაატყვევა მათი ცოლ-შვილი და ხელთ იგდო  
მთელი მათი საქონელი: ცხენები, ცხვრები, აქლე-  
მები და სხვა ქონება.

კახეთისა და შირვანის სამზღვრად იყვენ გიშის  
მფლობელები ასამ და შოთა გრიგოლიძეები, რო-  
მელნიც სარგებლობდენ თავიანთ მამულის მდება-  
რეობით საზღვარზე და თავიანთ ციხის სიმაგრით  
და მეფეს არ ემორჩილებოდენ. 1117 წ. დავით  
მეფე შევიდა მათ მამულში და შეიპყრო ორივე ძმა.

ამავე წელს დავითმა გაგზანა თავისი შვილის  
დიმიტრი სალაშქროდ შირვანში, სადაც მეფობდა.  
მისი სიძე ალსართანი, მეფის ასულის თამარის ქმა-  
რი. შირვანელები აუჯანყდენ ალსართანს და გაუდ-  
გენ ზოგიერთი ადგილები. სიძის თხოვნით დავითმა  
გაგზანა ლაშქარი. შირვანელთა დასაწყნარებლად.  
დიმიტრიმ ამ ლაშქრობაში გამოიჩინა. დიდი სიმამა-  
ცე, რომელმაც გააკვირვა მხილველნი და მსმენელ-  
ნი, აიღო ციხე ქალაძორი, დააწყნარა განდგომილ-  
ნი და დაბრუნდა ალათითა და ტყვეებით სავსე.

თურქები მაინც არ იშლიდენ თავისას და დრო-  
გამოშვებით შემოესეოდენ ხოლმე საქართველოს ამა-  
თუ იმ მხრითგან. 1118 წ. თურქები შემოესიენ ჯა-  
ვახეთს. დავითმა მის წინაამდევ გაგზანა ჯარი, ხო-  
ლო თითონ გაილაშქრა არაქსის პირზე თურქების  
ასალაგმავად და დასაწყნარებლად. გზაში მან შეი-  
ტყო რომ ჯავახეთში შემოსეულოთ თურქთ მოეკ-  
ლათ ჯავახეთის ერისთავი ბეშქენ ჯაყელი. თუმცა  
დიდებულები უშლიდენ მეფეს ლაშქრობის გაგრძო-  
ბას, მაინც არ დაიშალა, დაეცა არაქსის პირზე  
მდგარს თურქებს, მოსრა და დაატყვევა მრავალი  
და წამოიღო დიდი ალათი.

ამ ლაშქრობითგან გამობრუნებულმა მეფემ დაი-  
წირა ციხეები ლორი და აგარანი და გადევნა იქით-  
გან თურქები.

## VI.

ყივჩაყების გადმოყვანა.

მტრებთან გამუდმებულის ბრძოლისათვის დავით მეფე დიდად საჭიროდ ჰპოვებდა მუდამ მზა და გაწვრთნილს ჯარს. ქართველი ერი კარგი მეომარი და მებრძოლი იყო, მაგრამ ამ ბრძოლა-ომებში იგი მეტად სუსტდებოდა და თავის კეთილდღეობისთვის მშვიდობიანის შრომის შეძლება აღარ ჰქონდა. დაუვითი მიხვედრილი იყო, რომ მშვიდობიანის შრომის ნაყოფი მაშინ გავითარდებოდა, როდესაც ეს მშვიდობიანობა უზრუნველყოფილი იქნებოდა ყოველთვის. ამიტომ, მისმა გამჭრიახმა გონებამ მოიფიქრა სამუდამო ჯარის დაწესება. მაგრამ როგორ შეიძლებოდა რამოდენადმე დიდის სამუდამო ჯარის დაწესება ქართველთაგან, რომელნიც ხანგრძლივის ომების გამო ისე შემცირებულიყვენ საომრად გამოსადევის ვაჟკაცების რიცხვით. ამიტომ მას მოუვიდა აზრად მოეწვია უცხო ხალხი და დაესახლებინა საქართველოში იმ პირობით, რომ სამაგიეროდ ეწია სამხედრო სამსახური და მუდამ საომრად ყოფილია ყო მზად. იმის მოსაზრება შეჩერდა ყივჩაყებზე ყივჩაყები იყვენ კავკასიის ჩრდილოეთით მცხოვრები გაუვითარებელი, მაგრამ მეტად მამაცი და მეომარი ხალხი. ისინი ცხოვრებდენ ტომ-ტომებად და თვი-

თეულს ტომს თავისი მთავარი ჰყავდა. თუმცა მათ-ში ქრისტიანებიც ერიენ, მაგრამ მომეტებულად წარმართები იყვენ. თვით დავით მეფეს პირველ ცოლად ჰყავდა ყივჩაყთა ერთის ტომის მთავრის ათრაჭა შარალანიძის ასული გურანდუხტ და ამიტომ ამ ყივჩაყებს ის კარგად იცნობდა. დავითმა წინადაღება მისკა თავისს სიმამრს და ცოლის ძმებს, რომ გადმოსულიყვენ მთელის ტომით საქართველოში და ეწიათ სამხედრო სამსახური მისთვის, რისთვისაც ის დაჭირდა შესაფერს დაჯილდოებას. მისმა სიმამრმადა ცოლის ძმებმა მიიღეს მეფის წინადაღება და დათანხმდენ საქართველოში გადმოსვლას. საჭირო იყო მხოლოდ, რომ გზაში გამოვლის დროს ოსებს ხელი არ შეეშალათ მათთვის. დავითი შევიდა ჯარით ოსეთში და მოსთხოვა ყივჩაყებისთვის გამოსავლელი გზა მიეცათ. დავით მეფეს წინ გამოეგებენ ამ მოვლას ოსეთზე იმ პირობით, რომ ყივჩაყებსაც არა წაეხდინათ-რა მათთვის. დავითმა პირობის მტკიცედ შესრულებისათვის გამოართვა მძევლები ოსებსაც და ყივჩაყებსაც. ამას გარდა დაიჭირა ყველა ციხეები და სიმაგრეები, რომლებიც ოსების ქვეყანაში საქართველოსაკენ მიმავალის გზის პირად იყვენ და ამნაირად გადმოიყვანა მთელი ერთი ტომი ყივჩაყებისა (1118 წ.). მატიანის თქმით, მეომართ ყივჩაყთა რიცხვი იყო 40,000, მათი ცოლშვილი და

მშობლები ხომ სხვანი იყვენ. დავით მეფემ ეს ყივჩაყები დააბინავა საქართველოს სხვა-და-სხვა ადგილებში, გააწყო მათგან რაზმები გვარ-გვარად, დაუყენა სპასალარნი და მმართველნი და მისცა ყველას საჭირო იარაღი და ცხენები.

ამნაირად დავით მეფემ შეიძინა ყივჩაყების გადმოყვანით სამუდამო ჯარი, რომელიც მუდამ მზადიყო სალაშქროდ. ამათ გარდა დავითმა შეადგინა ჯარი 5,000 მონათაგან, რომელნიც იყვენ მუსულმანთაგან ტყვედ წამოყვანილნი, ხოლო საქართველოში გაქრისტიანებულნი. ყივჩაყთა და მონათაგან შემდგარს ჯარს მეფე დავითი საჭიროების დროს უმატებდა კარგად გაწყობილს ქართველთა ჯარს და ამნაირად იგი შეიქნა უძლეველი და თავზარდამცემი მტერთათვის. ყივჩაყები მცირე ხანში შეეტვისენ საქართველოს, შეისწავლეს ქართული ენა, მიიღეს ქრისტიანობა და შემდეგში სრულიად გაქართველდენ.

ყივჩაყების გადმოყვანის დროს დავით მეფეს დამთელს საქართველოს დაკლდა დიდად გამოცდილი და ბრძენი მოლვაწე გიორგი ჰუონდიდელი. იგი გადაიცვალა მეფესთან ოსეთში ყოფნის დროს (1118 წ.). მეფემ დიდის ამბით დასაფლავა იგი გვათავი და იგლოვა 20 დღე, \*) სანამ არ დაიბადა

\*) იხ. Chronique arménienne (Additions p. 58). მართლია, „ქართლის ცხოვრება“ ამბობს 40 დღე, მაგრამ

მეფის ძე ვახტანგი და ამ სასიხარულო ამბის გამო  
არ შეამოკლა გლოვის ხანი.

## VII.

ლაშქრობანი 1120 და 1121 წლებისა.

საქართველოს საზღვრად მყოფი თურქები, რომ-  
ლებიც ბოგანო ცხოვრებას მისდევდენ, მაინც ვერ  
ითმენდენ, რომ საზამთროდ არ შემოსულიყვენ სა-  
ქართველოს არე-მარეში, თუმცა იცოდენ, რომ და-  
ვით მეფე მათ ხეირს არ დააყრიდა ამისთანა გაბე-  
დულობისათვის. თურქებს მოსწონდათ ძალიან მტკვ-  
რის პირად ზამთრობა, რადგან აქ თბილოდა და  
კარგი იალალი იყო საქონლისათვის. 1120 წ. მე-  
ფის შავის ზღვის პირად ხუფთაში ყოფნის დროს  
თურქები ჩამოვიდენ ბოტორას და დაიზამთრეს. მე-  
ფეს ეს მაშინვე შეატყობინეს. ისიც სწრაფად წამო-  
ვიდა და თავს დაესხა თურქებს მოულოდნელად  
(14 თებერვალს). თურქებმა ძლივს მოასწრეს ცხე-  
ნებზე შეჯდომა და გაქცევა. ვინც ვერ გაიქცა, მე-  
ფემ დაატყვევა, ხოლო მათი ქონება ალათვად წა-  
მოილო თან.

ჩვენ 20 დღე უფრო ნამდვილი ჭვერისა, რადგან 40 დღის  
გლოვა ჩეულებრივია და რაღა მეორმოცე დღეს დაიბადა  
მეფის ძე ვახტანგი, როცა უამისოდაც უნდა გათავებულიყო  
გლოვა.

აქედგან დავით მეფე მივიდა ლანუხს და 1 მარტს  
შევიდა შირვანში, სადაც აჯანყებული იყო რამდე-  
ნიმე მაზრა და არ ემორჩილებოდა მეფის ერთგულს  
და მორჩილს შირვანის მფლობელს. პირველად მია-  
დგა ქალაქს ყაბალის და აიღო. მაგრამ სხვა ადგი-  
ლების დასაჭერად მას ჯარი არა ჰყავდა. საკმარისად  
და ამიტომ უკანვე დაბრუნდა ქართლს, ახლად შეკ-  
რიფა ჯარი და 7 მაისს შევიდა ხელახლად შირვან-  
ში, მოილაშქრა ყველა განდგომილი მაზრები არა-  
ბიალიურათით დაწყებული ქურდევანამდე და შიშტ-  
ლანთამდე, დაუმორჩილა შირვანშას და დაბრუნდა  
ქართლს.

მოაწია ზამთარმა და დავითმაც მიიღო ცნობე-  
ბი, რომ თურქები ეპირებოდენ საქართველოში სა-  
ზამთროდ შემოსვლის აშორნის მხრით. ახლა თითონ  
შეფერ გადასწყვიტა დაესწრო თურქთათვის. გიორ-  
გობისთვე ში გაილაშქრა აშორნისკენ, შევიდა ამ  
მაზრაში და მოსრა და აიალაფა იქაური თურქობა.  
აშორნითვან დავით მეფემ ჩამოიარა სევგელმაჯის-  
კენ და იგივე დღე დააყენა თურქებს, რაც აშორ-  
ნაში.

ამ ლაშქრობითვან დაბრუნებული მეფე გადავი-  
და იმერეთს და იქ აპირებდა ზამთრის გატარებას.  
ზამთარი იყო მეტის-მეტად ცივი და თოვლიანი;  
თურქებმა შეიტყეს მეფის იმერეთში ყოფნა და  
მოურიდებლად შემოვიდენ და დაიზამთრეს მტკვრის

ნაპირებზე იმ იმედით, რომ დავითი იმერეთითგან  
ამ დროს ვერ მოახერხებს გადმოსვლასათ. გაიგო  
თუ არა თურქების ჩამოსვლა მტკვრის ნაპირებზე,  
დავითმა დაუყოვნებლად გამოსწია ქართლისკენ.  
ლიხის მთაზედ გადმოსასვლელად მეფემ გააჭრევინა  
თოვლი, რომელსაც სიმაღლე ჰქონდა საში მხარი.  
ქართლის ჯარი მზათ დახვდა მეფეს. ამ ჯარით მე-  
ფე დაესხა თურქებს, მოსრა მრავალი და დაინარ-  
ჩუნა მთელი მათი საცხოვრებელი (1121 წ.  
მარტში).

ამავე წელს მერდინის მფლობელი ელიაზი, თი-  
თქო თურქების გაწყვეტისათვის სამაგიეროს გადა-  
სახდელად, შემოესია საქართველოს საზღვარს 20,000  
კაცით \*). მოახრა ადგილები, წაიყვანა ტყვეები  
და დადგა ბარდავში. ამ დროს მტკვარიც აღიდდა  
და თურქები უზრუნველ ყოფილად სოვლიდენ თავს  
ქართველების თავდასხმისაგან მტკვარზე გაუსვლე-  
ლობის გამო. დავით მეფემ არ დახედა მტკვრის სი-  
ღიდეს და ყივჩაყების ჯარით გასცურა მტკვარში  
ალონთან. მეფე დაესხა მოულოდნელად თურქებს,  
რომელნიც თავგადადებით შეებრძოლენ მის ჯარს.  
ბრძოლამ გასტანა ორს დღეს. ქართველებმა გაიმარ-  
ჯვეს თურქებზე \*\*), დაატყვევეს ბლომად, ხელთ ჩაი-

\*) მათე ედესელი (ახ. H. d. G. Additions p. 228).

\*\*) იქვე.

გდეს ურიცხვი საქონელი და წამოვიდენ ბევრის  
სხვა საშოვრითაც სავსენი (თიბათვეში 1121 წ.).

დავით მეფისაგან სუსხმიცემული საქართველოს  
მოსაზღვრე თურქები ძალიან შეწუხდენ; დროვინვა  
იწყეს აგრეთვე ტფილისისა, დმანისისა და განჯის  
ვაჭრებმაც რომელთა აღებ-მიცემობას ქართველების  
ლაშქრობა სარგებლობას არ აძლავდა. თურქებმა  
არჩიეს და გადაწყვიტეს მიემართათ სპარსეთის სულ-  
თანის მაჰმუდისათვის შემწეობის თხოვნით და ამ  
აზრით გაგზანეს მასთან მოციქულები. ამათ დაი-  
ფხრიწეს ტანისამოსი, თავზედ მტვერი დაიყარეს,  
შავი ტანისამოსი ჩაიცვეს \*), ხელ-პირიც შავად შეი-  
ლებეს და ისე მივიდენ თავიანთ გასაჭირის მოსახსე-  
ნებლად და შემწეობის სათხოვნელად როგორც  
სულთანთან, ისე სხვა მფლობელებთან. ამ მოწო-  
დების გამო შეერთდენ ირანის მფლობელი მელიქ  
თოლრული, მერლინისა ელლაზა და ჰილახისა დურ-  
ბეზი. მათე ედესელის ოქმით, მელიქ-თოლრულს  
ჰყავდა 40,000 კაცი, ელლაზს 150,000 და დურ-  
ბეზს 10,000. ეს შეერთებული ჯარი ელლაზის წი-  
ნამდლოლობით წამოვიდა საქართველოში. ამათ კი-  
დევ შეუერთდენ განძის ათაბაგი და სასომხეთის ამი-  
რები თავიანთ ჯარებით \*\*). ერთის ევროპიელის

\*) იქვე.

\*\*) იქვე გვ. 228, 229.

ისტორიკოსის (გოტიეს) თქმით, მუსულმანთა ჯარი შესდგებოდა 600,000 კაცისაგან <sup>1)</sup>), ხოლო არაბების ისტორიკოსის აბულ-ფარაჯის სიტყვით მხოლოდ 30,000 კაცისაგან <sup>2)</sup>). შეიძლება გოტიეს ციფრია გაზვიადებულიც იყვეს, მაგრამ ისიც ცხადია, რომ აბულ-ფარაჯის ციფრაც უნდა გადამეტებით დაპატარავებული იყვეს.

ეს უშველებელი მუსულმანთა ჯარი შემოვიდა საქართველოში 1121 წ. მარიამობისთვეში და მოიცვა თრიალეთი, მანგლისი და დიდგორი. დავით მეფემ ჩვეულებრივის სისწრაფით თავი მოუყარა თავის ჯარს, მათე ედესელის სიტყვით, 55,600 კაცს, ხოლო გოტიეს სიტყვით 80,000 <sup>3)</sup> და მიეგება მტრებს. საომარს ადგილად აირჩია ვიწრო გასავალი ორს მთას შუა და მიმართა ჯარს სიტყვით, რომ ან უნდა გაემარჯვათ მტრებზედ ან უნდა დახოცილიყვენ ყველანი. გოტიეს თქმით, ქართველებს უკან გაქცევის შეძლება რომ არა ჰქონდათ, დავითმა ხეობითგან გამოსასვლელს ადგილზე თხრილები გააკეთა <sup>4)</sup>). ამნაირად ქართველი ჯარი გადადებული იყო სასიკვდილ-სასიცოცხლოდ. გაიმართა ბრძოლა და ქართველების სიმამაცემ და სიფიცხემ დასძლია.

<sup>1)</sup> იქვე ვვ. 229.

<sup>2)</sup> იქვე ვვ. 237.

<sup>3)</sup> იქვე.

<sup>4)</sup> იქვე.

რამდენჯერმე დიღს ჯარს. პირველსავე შეტაკებაზედ  
მტერთა წინა რიგებმა უკან დაიწიეს და ამით არე-  
ულობა და შიში დაპბადეს უკანა რიგებში. ზარდა-  
ცემულებმა ქართველებს ზურგი მიუშვირეს და გაიქ-  
ცენ. ქართველები გამოედევნენ და მტრების აუარე-  
ბელი რიცხვი გაულიტეს. ქართველებმა სდიეს  
მტერს, მათე ედესელის სიტყვით, რვა დღის გამავ-  
ლობაში <sup>1)</sup> ანის ქალაქამდე <sup>2)</sup>). ელლაზი დაჭრილ  
იქნა. დახოცილთ მტერთა რიცხვი იყო 40,000 <sup>3)</sup>,  
ტყვეთა რიცხვი იყო 30,000 <sup>4)</sup>. ქართველებს დარ-  
ჩათ აუარებელი დავლა: ოქრო-ვერცხლი, ცხენები,  
ჯორები, კარავები, სრა-ფარდაგები, სხვა-და-სხვა  
იარალი და ჭურჭელი,

83. 1) გოტიეს სიტყვით სამის დღის გამავლობაში (იხ. იქვე 280).

2) აბულ-ფარაჯის სიტყვით არის აღაჯის მანძილზე (იხ. იქნ. გვ. 287).

3) გოტიეს სიტყვით, 400,000 (იქვე გვ. 230). აბულ-ფარაჯის სიტყვით-კი 4,000 (იხ. იქვე გვ. 237).

4) 66. 233 33. 229.

## VIII.

აღება ტფილისისა.—გალაშქრება შირვანში ორჯერ.---  
აღება დმანისისა.—გალაშქრება დარუბანდზე.—აღება  
სასომხეთის ციხეებისა.—აღება ანისა.— გალაშქრება  
შირვანში.— ყივჩაყების მოწყობა.

ახლა-კი დრო მოვიდა, რომ დავით მეფეს ტფი-  
ლისი აელო. თურქებზე გამარჯვების შემდეგ მეფე  
მიადგა ტფილისს (1121 წ.), მაგრამ უცებ მისი  
აღება არ მოხერხდა. მეფემ შემოავლო გარს აღყა,  
რომელიც რამდენსამე თვეს გაგრძელდა. ბოლოს  
მეფემ მიიტანა იერიში და ძალით აიღო ციხე  
(1122 წ.). მუსულმანთა და სომხის ისტორიკოსე-  
ბი ამბობენ, ვითომ დავით მეფეს ტფილისის აღე-  
ბის დროს ამოეწყვიტოს კარგა ბლომად მუსულმა-  
ნი მცხოვრებლები \*), მაგრამ პირველხი იმასაც უმა-  
ტებენ, რომ დავითი ძალიან კარგად მოეკიდა იმ  
მცხოვრებლებს, რომლებიც-კი დამორჩილდენო.

მუსულმანთა ისტორიკოსის ელ-აინის თქმით,  
ტფილისის აღების შემდეგ დავით მეფემ მოილო მუ-  
სულმანს მცხოვრებლებზედ სხვა-და-სხვა წყალობა,  
რომელიც-კი ითხოვეს. მაგ. აკრძალა ლორების და-  
კვლა ტფილისში; ნება დართო, რომ ელოცნათ  
იძანით და ხოტბით; ქრისტიანებს აუკრძალა მუსულ-

\* ) H. d. G. Additions pp. 230, 232, 237 – 240.

მანებთან ერთად აბანოში შესვლა და საზოგადოდ  
რამე ცუდის კადრება მუსულმანთათვის. ამათ გუ-  
ლას მოსახვებად მეფემ განაგრძო ტფილისში ფულის  
ჭრა არაბულის წარწერით: „სახელითა ღვთისა,  
მის წინასწარმეტყველისა და მის ხალიფისა“ და მის-  
ცა საჩუქრები და დაუნიშნა სარჩო მუსულმანთა  
სჯულის მოძღვრებს, პოეტებს და ნასწარებს კაცებს.  
ერთის სიტყვით, მუსულმანთ გაცილებით უკეთ ექ-  
ცეოდა დავით მეფე ვიდრე მუსულმანი ხელმწიფე-  
ბი \*).

დავით მეფის მფარველობის და შემწეობის მოი-  
მედემ შირვანის მფლობელმა აღსართანმა გაიღაშქ-  
რა დარუბანდელების წინაამდეგ, დარუბანდელებმა  
შირვანშას და დავით მეფის წინაამდეგ შემწეობა  
სთხოვეს სპარსეთის სულთანს მაჰმუდს. 1123 წ.  
სულთანი შევიდა შირვანში, აილო შამახია, შეი-  
პყრო შირვანშა და მოსწერა დავით მეფეს, მე შე-  
ვიპყარ შირვანშა და ვითხოვ ხარაჯასაო; შენ, ტყე-  
თა მეფევ, ან ძლვენი გამომიგზანე, ან შენ თითონ  
მოდი ჩემთანაო. მათე ედესელის თქმით, ამ დროს  
სულთანს ჯარში ჰყავდა სამოცი ათასი კაცი. წე-  
რილის მიღებისათანავე დავით მეფემ ბძანება გას-  
ცა, რომ შეგროვილიყო ჯარი. ჯერ მარტო ყივ-  
ჩაყები გამოცხადდენ 50,000, ქართველი ჯარი სხვა

\* ) იქვე გვ. 240 და 244.

იყო. ამ ჯარით მეფე გაემართა შირვანში. რამდენ  
ნად მძიმე იყო ეს ლაშქრობა, იქითგან ჩანს, რომ  
დავით მეფე გალაშქრების წინ მივიღა შიო მღვიმე-  
ლის მონასტერში და აქ იმ მოსაზრებით, რომ იქ-  
ნება ლაშქრობითგან ვეღარ დავტრუნდე ცოცხა-  
ლიო, სასწრაფოდ დაწერა ანდერძი იმის შესახებ,  
თუ რა ნაირად უნდა დაეთავებინათ ჯერ კიდევ  
დაუსრულებელი მისგან დაწყებული უმთავრესი ეკ-  
ლესია მონასტრისა და რა უპირატესობა უნდა ჰქო-  
ნოდა მონასტერს.

შირვანში შესვლისათანავე პირველად დავით მე-  
ფემ მოაშლევინა ის ხიდი, რომელიც სულთანს  
გაეკეთებინა მტკვარზე გასასვლელად და ამოხოცა  
ამ ხიდის მცველი ჯარი \*). სულთანმა რომ გაიგო  
ეს ამბავი და აგრეთვე რაოდენობა მის ჯარისა, ძა-  
ლიან შეშინდა და თავის ვეზირის რჩევით კიდევაც  
აპირებდა გაქცევას სპარსეთში. ეს რომ შირვანე-  
ლებმა შეიტყეს, ისინიც მეტად შეშინდენ და სულ-  
თანს შეეხვეწენ არ მიეტოვებინა ისინი ქართველთა  
ანაბარად, რისთვისაც დაპირდენ თავგადადებით  
ბრძოლის მტრების წინაამდეგ. სულთანი იძულებუ-  
ლი იყო დარჩენილიყო და გამაგრდა შამახიაში.  
დავით მეფე მიემართებოდა კიდევ შამახიისკენ, მაგ-  
რამ გზაში რაღაც უთანხმოება მოხდა ქართველთა

\*) იქვე გვ. 230.

და ყივჩაყთა შორის და ამ გარემოებამ შეაჩერა იგი. შეშინებული მუსულმანები ამ ამბის გაგონებაზე სიხარულს მიეცენ \*). დავით მეფე არ მისულა ახლო შამახიასთან, მაგრამ გზები-კი შეუკრა, რომლებითაც სურსათი მისდიოდა სულთანს სპარსეთითვან. რანის ათაბაგი ოლსუნდული ოთხი-ათასის კაცით წამოვიდა შამახიაში სულთანის საშველად და სურსათის მისაწოდებლად. დავითი გადაეღობა მას და ამოწყვიტა მთლად ეს ჯარი. გადარჩა მხოლოდ ოლსუნდული, რომელიც მარტო-მარტო მივიდა სულთანთან. სულთანის მხრით-კი გამოგზანილი მოციქულები სპარსეთისკენ თავისუფლად გავლის ნების სათხოვნელად სწორედ იმ დღეს მოვიდნენ დავითთან, რა დღესაც მან ამოსწყვიტა ოლსუნდულის ჯარი. ათაბაგის დამნახავმა სულთანმა ოარ დაუცადა, თავის მოციქულების დაბრუნებას და იმავე წუთს გაიქცა შამახიითვან სპარსეთში სხვა გზით. ამნაირად გამარჯვებული დავით მეფე დაბრუნდა ქართლს. მაგრამ ეს გამარჯვება არ იყო სრული. ქართლში მან წესიერება დაამყარა ყივჩაყთა შორის და მეორე თვეს (ივნისში) ხელმეორედ გაილაშქრა შირვანს, აილო გულისტანი და დაიპყრა მთელი შირვანი.

\* ხაფხული დავით მეფემ შირვანით დაბრუნების შემდეგ ქართლში გაატარა, ხოლო შემოდგომაზედ

\* ელ-აინი (Additions p. 239).

გადავიდა იმერეთს და იქ გაატარა მთელი ზამთარი 1123—1124 წლისა. გაზაფხულზედ, მარტში, მეფე გადმოვიდა ისევ ქართლში და გაიღაშქრა დმანისის ასალებად. ამ ქალაქის აღების შემდეგ მეფემ გაიღაშქრა დარუბანდისკენ და აიღო ციხეები დასინი და ჭოხაონდი მათ მიმდგომის ქვეყნებით. აქედგან დაბრუნებულმა აიღო სასომხეთის ციხეები გაგნი, ტურონაკალი, ჭავაზინი, ნორიბედი, მანასგომი და ტალინჯაჭარი. ივნისში გაიარა ლაშქრით ჯავახეთი, კოლა, ფრნიფორი და ბასიანი სპერამდის, ბუიათყური და ოლთისი. ეს ის ადგილები იყო, საღაც თურქები მალვით და მეკობრულად შემოდიოდენ და ცოტას თუ ბევრს ხანს რჩებოდენ. ამ სამხედრო გასეირებით მეფემ შიში მისცა მტრებს საკულავოდ არ გაებედნათ შემოსვლა. ამის შემდეგ მეფე მოვიდა თრიალეთს და იქ დაითხოვა ფავისი ჯარი. თითონ-კი წავიდა ჯავახეთში და ბოჟანას წყაროზე დადგა მოსასვენებლად.

ბოჟანოში ყოფნის დროს მეფესთან მოვიდენ ანის სომხებისგან გამოგზანილი მოციქულები და სთხოვეს, რომ დაეჭირა როგორც ანის ქალაქი ისე მისი მიმდგომი ქვეყნები. დავით მეფემ მაშინვე მოიწვია ჯარი და სამის დღის შემდეგ მის წინაშე შეიკრიფა 60,000 კაცი. მეფე წავიდა ანის ქალაქისკენ და სამის დღის შემდეგ აიღო. ანის ქალაქთან დაიჭირა ყველა მის მიმდგომი ციხეები და ქვეყნები.

ტყვედ ჩაიგდო ანის ამირა აბულ სევარი მისი ოჯახით. ქალაქის მცველებად დააყენა მესხი აზნაურები, რომელთაც უფროსად დაუდგინა აბულეთ ორბელიანი და მისი შვილი ივანე. ანში მცხოვრების სომხების სასიხარულოდ დავითმა ხელახლად აკურთხებია ის უმთავრესი საყდარი, რომელიც მეჩეთად ჰქონდათ გადაჭცეული მუსულმანებს \*).

ქართლში დაბრუნებულმა დავითმა აბულ სევარი თავის სახლობით გაგზანა საცხოვრებლად აფხაზეთში. რავდენსამე ხანს მოისვენა მეფეშ და შემდეგ გაილაშქრა ისევ შირვანში, საღაც ქართველთა წინაამდეგი დასი მუდამ ინტრიგებს მართავდა შირვანშაპის წინაამდეგ და განლგომილებას ახდენდა სხვა-და-სხვა ქალაქებსა და შაზრებში. დავით მეფემ ამ გზობითაც აიღო შამახია, ციხე ბივრიტი და დაი-კირა მთელი შირვანი. ახლა კი საქიროდ დაინახა ქართველი ჯარი ჩაეყენებინა შირვანის ციხე-ქალაქებში და გამგებლადაც ქართველი კაცი დაენიშნა. ციხე-ქალაქებში მცველებად დასტოვა დრელუ-კახელები, ხოლო გამგებლად ბედიელ-ალავერდელი ეპისოპოსი სიმონი, რომელიც შემდეგში იყო ჰყონ-დიდლად.

ყივჩაყები თუმცა დიდს სამსახურს უწევდენ მეფეს და საქართველოს, მაგრამ თავიანთ მოუსვენ-

\* ) მათე ედესაული და ვარდანი (Additions p. 231, 232).

რობით აგრეთვე დიდს შეწუხებასაც აყენებდენ და-  
ვითს, რომელიც ხანდახან მისის სიმკაცრისათვის სა-  
სიკვდილოდაც არ დაუნდვიათ მათ მღელვარების  
დროს. დავითი ძალიან ბევრს სცდილობდა როგორ-  
მე დაემშვიდებინა და დაეწყნარებინა ეს უწესოებას  
შეჩვეული ხალხი, და ბოლოს კიდევაც მიაღწია  
თავის მიზანს. შირვანითგან დაბრუნებულმა უკანა-  
სკნელად კიდევ მოაწყო საუკეთესოდ ყივჩაყების  
საქმე, მიუჩინა მათ საზამთრო ბინები, გაუჩინა სა-  
ზრდელი და დაუყენა გამგებლები.

გაზაფხულისათვის მეფე ახალს პლანებს აწყობ-  
და, უნდოდა თავისგან აღგენილი და გაძლიერე-  
ბული საქართველო გაემტკიცებინა და საშვილიშვი-  
ლოდ გაემაგრებინა მტერთა წინაამდევ, მაგრამ ბედ-  
მა აღარ მასცა მას ნება გაეხორციელებინა თავისი  
აზრები. იმ ზამთარს ავად შეიქნა და გამოესალმა  
წუთისოფელს 24 იანვარს 1125 წ. \*)

\*) მათე ედესელის თქმით, 1125 წ. საქართველოს შე-  
მოესიენ ამირა იბრაიმი, ანცითის მთავარი დაუთი და სხვა  
ამირები დიდ-ძალის ჯარით. დავით მეფე შეეგება მათ და უკუ  
აგდო დიდის ზიანით. მტერთა დევნის დროს ხუთის დღის გა-  
მავლობაში დავითმა ააგსო მთა და ბარი მათ სისხლითა და  
გვამებით (იხ. H. d. G, Additions p. 231). ჩვენის ფიქ-  
რით, ეს ამბავი უნდა მომხდარიყოს 1124 წ., როდესაც ჩვენ  
ვხედავთ დავით ტეფეს მტრებთან მებრძოლს სხვა-და-სხვა  
მხრით.

## IX.

დავით მეფის მოლვაწეობა.

დავით მეფე იყო ტანადი და ლონიერი კაცი მშვენიერის სახისა, მამაცი და მეტად გამბედავი, გონებით მკვირცხლი და წინდახედული, ხასიათით მშვიდობიანი, აუქარებელი და მაგარი, გულით მოწყალე და შემბრალებელი. ამ მშვენიერის თვისებებით სავსემ, დავითმა მიიღო თავის დროსთვის საუკეთესო აღზრდა და სწავლა, რისგამო იგი შეიქნა ნამდვილი დროის შესაფერი მოლვაწე. დავით მეფის მოლვაწეობა ბევრნაირია.

პირველად, საქართველო საჭიროებდა მტრების ხელითგან გათავისუფლებას და გაერთიანებას. როგორც ზევით მოთხრობილია, დავითმა ეს მოახერხა თავის ვაჟკაცობით, გამჭრიახობით და მხედართ-მთავრულის ნიჭით. მის გამეფების დროს დაცემული, მტერთა ხელთ მყოფი და განაწილებული საქართველო მის ხელში გაძლიერდა, მტერთაგან გათავისუფლდა და დაიკავა მთელის კავკასიის სამხრეთი ნაწილი შეავის ზღვითგან თეთრს ზღვამდე. დავითმა არ იცოდა შიში არავითარის დიდის მტრისა, ხშირად დაპევედრია ათჯერ და უფრო მეტჯერ დიდს ლაშქარს. იგი თითონაც ისე იბრძოდა, როგორც სხვა მეომრები ჯარის წინა რაზმებში და

მტერს სჯობნიდა არა მხოლოდ გულადობით და ვაჟკაცობით, არამედ ჭივიანურად და მოსაზრებით არჩეულს დროს, ადგილს და რიგზე მტერთან შებმითაც. მას შეგნებული ჰქონდა მტრების მაგარი და სუსტი მხარე. აგრეთვე კარგად იცოდა თავისი ხალხის და ჯარის თვისება და ხასიათი და ამ ცოდნით სარგებლობდა მტრებთან შებრძოლების დროს.

ყივჩაყების მოწვევით დავითმა შეჰქმნა სამუდამო ჯარი, რომელიც ყოველს დროს იარაღში მზად იყო საომრად გასასვლელად. ამას გარდა, დააარსა-რა სამუდამო ჯარი, თვით ქართველთაგან ყოველის ცალკე შემთხვევისათვის გამოსული ჯარი გააუმჯობესა, რადგან სალაშქროდ გამოდიოდენ მხოლოდ კარგად შეიარაღებული და მხნე მეომრები.

გარეშე მტრების მოგერების შემდეგ საჭირო იყო შანაურის წესიერების გამტკიცება. დავითმა ესეც მოახერხა. მან ჩააჩუმა და მოიმორჩილა დიდებულნი, რომელთაც წინად მხოლოდ ვნება მოჰქონდათ ქვეყნისთვის თავიანთ გავლენით და მძლავრობით. მეფის სიტყვა კანონი შეიქნა ყველასათვის. ხელისუფლები ყველანი მის ბძანებას და დადგენილებას ასრულებდენ და ვისაც მეფე შენიშნავდა სისუსტეს ან ღალატს, მოურიდებლად სჯიდა, ხოლო აწინაურებდა მათ, ვინც მის ბძანებას რიგიანად და ერთგულად ასრულებდა. ასეთი წესიერება შეიტანა არამც თუ საერთო უწყებაში, არამედ სასულიერო

უწყებაშიაც, რისთვისაც მან მოახდენინა საეკლესიო კრება. ისეთი აღმინისტრატიული და პოლიციური წესი შემოიღო დავითმა, რომ ყველაფერი, რაც სახელმწიფოში ხდებოდა, მეფის გაუგებარი არა რჩებოდა.

ამის გამოვე დამყარდა სამართლიანობა, ყველას ერთნაირის მიუდგომლობით ასამართლებდენ მეფი-საგან დაყენებული მოსამართლეები, რომლების მოქმედებასაც თვალ-ყურს ადევნებდა იგი.

მეფე თავის სამეფოს ყოველის კუთხისთვის ერთგვარად ზრუნავდა. ამიტომ იგი მუდამ გადადიოდა ერთის აღგილითგან მეორეში, იგი ხან ქართლში იყო, ხან კახეთში, ხან იმერეთში და ხან აფხაზეთში.

შინაურის წესიერებისათვის და ეკონომიკურის გავითარებისათვის საჭირო იყო გზები და ჭიდები. დავით მეფეც არათერს იშურებდა და აკეთებდა მკვიდრს ხიდებს და ქვაფენილს გზებს.

ხოლო თავი და თავი საშუალება, რომელსაც შეეძლო ხელი, შეეწყო დავითის მოლვაწობისათვის ქვეყნის საკეთილდღეოდ, იყო ქართველობაში სწავლა-ცოდნის გავრცელება და ქრისტიანულის სარწმუნოების დამყარება. სომხის ისტორიკოსი ვარდანი მოგვითხრობს, რომ დავით მეფემ აარჩია 40 ქართველი ყმაწვილი და გაგზანა ბიზანტიაში იმ მიზნით, რომ შეესწავლათ უცხო ენები და შემდეგ

გადმოეთარგმნათ ამ ენებითგან ქართულად წიგნები \*). თვითონაც ისეთი დიდი მოყვარული იყო წიგნებისა, რომ მათ კითხვას ნადირობისა და ლაშქრობის დროსაც არ სტოვებდა. მემატიანის თქმით, ერთის წლის გამავლობაში სამოციქულო ორმოცჯერ ჰქონდა წაკითხული. არა მხოლოდ საქრისტიანო სასულიერო წიგნებს კითხულობდა, არამედ მუსულმანთა წიგნებსაც, მაგ. ყორანს და სხვათა. როდესაც მეფემ ტფილისი აიღო, დიდის მოწყალებით მოეკიდა მუსულმანთა სჯულის მოძღვრებს, პოეტებს და მეცნიერებს. მისცა მათ უხვად საჩუქრები, დაუნიშნა პენსია და, რომელთაც არ ინდომეს დარჩენა ტფილისში, მათ მისცა საგზაო ფული სპარსეთში წასასვლელად.

როგორც ყველგან მაშინ, საქართველოშიაც სწავლა-ცოდნის მიმდევრები და გამავრცელებლები უმთავრესად სასულიერო პირები იყვენ და სასწავლებლებიც მონასტრებში ჰქონდათ. ამისათვის მეფე დიდად ზრუნავდა სასულიერო პირებისათვის და საყდარ-მონასტრებისთვის.

დავით მეფემ დაიწყო 1106 წელს შენება გელათის მონასტრისა, რომელიც მის აზრით უნდა გამხდარიყო მეორე ათონად, ე. ი. ბინად სწავლა-განათლებისა და მწიგნობრობისა. თვით ეკლესიის

\*) H. d. G. (Additions, p. 233).

შოთავებია დავითმა თუმცა ვერ მოასწრო თავისს სი-  
ცოცხლეში, მაგრამ დააწესა-კი მონასტერი, სადაც  
თავი მოუყარა ყველა იმ ქართველთ, ვინც-კი  
გათქმულნი იყვენ მაშინ თავიანთ მოლვაწეობით,  
როგორც საქართველოს ისე უცხოეთის სხვა-და-სხვა.



გელათის ეკლესია.

მონასტრებში. დავითმა ააშენა აგრეთვე შიო  
მღვიმელის უდაბნოში უმთავრესი ეკლესია და აგ-  
რეთვე ბევრგან სხვაგან. საქართველოს გარეშე მან  
ააშენა ეკლესიები სინას მთაზე და იერუსალიმში.  
დავითის შემწეობით და მფარველობით გაიხსნა  
რავდენიმე უმაღლესი სასწავლებელი ანუ აკადემია.

საყდარ-მონასტრების აშენებასთან და მათთვის  
მამულების შეწირვასთან დავითი მფარველობდა უბ-  
რალო სამღვდელოებასაც, რომელიც იყო ნამღვი-  
ლი ამზრდელი და გამანათლებელი ხალხისა. მის  
დრომდე დაბალი სამღვდელოება არაფრით გაირჩე-  
ვოდა დაბალის საერო წოდებისაგან, რომლითგა-  
ნაც ის გამოდიოდა. დავით მეფემ გაათავისუფლა  
სამღვდელობა ყოველის სახელმწიფო გადასახადი-  
საგან და ბეგრისაგან და ამნაირად დიდი უპირა-  
ტესობა მისცა თავიანთ დანიშნულების შესასრუ-  
ლებლად.

მართლ-მადიდებელის ქრისტიანის სამღვდელოე-  
ბის და სარწმუნოების მფარველობა დავით მეფეს  
ფანატიზმით და ბრძა მორწმუნეობით-კი არ მოს-  
დიოდა, არამედ იმ სარგებლობის შეგნებით, რომე-  
ლიც მათ მოჰქონდათ ქვეყნისთვის. ეს იქითგან  
ჩანს, რომ დავით მეფე დიდის პატივისცემით ეკი-  
დებოდა როგორც სომხის სამღვდელოებას და საყ-  
დარ-მონასტრებს, ისე მუსულმანთა სასულიერო  
პირთ და მეჩითებს. სომხის ისტორიკოსის მოწმო-  
ბით, მეფე დავითი ხშირად მიღიოდა სომხის სამ-  
ღვდელო პირებთან და იღებდა მათგან ლოცვა-  
კურთხევას. \*) ხოლო მუსულმანთა ისტორიკოსნი  
მოწმობენ, რომ მეფეს კარგათ ჰქონდა გაცნობილი

\*) ვარდანი (Additions, p. 233).

მუსულმანთა სარწმუნოება, დადიოდა მუსულმანთა მეჩითში, ისმენდა იქ ლოცვას და ხშირად ებაასებოდა ყადებს ყორანის შესახებ \*).

დავითს, ოოგორუ ნამდვილს ქრისტიანს, არ მოსწონდა ის განხეთქილება, ოომელიუ არსებობდა მართლმადიდებელთა და გრიგორიანთა შორის. იმას გულით სურდა ამ განხეთქილების მოსპობა და ერთობის დამკვიდრება და ამიტომ მოახდინა კრება მართლმადიდებელთა და გრიგორიანთა სამლკდელოების წამომადგენელთა საერთო სარწმუნოებრივს. კითხვებზე მოსალაპარაკებლად და მოსათანხმებლად. მართლაც კრებაზე გაიმართა მოლაპარაკება. თვით დავითმაც მიიღო მონაწილეობა, მაგრამ არაფერი შედეგი არ მოჰყვა ამ მოლაპარაკებას და ორივე ეკლესია გაცალკევებულნი დარჩენ. შეოლოდ დავით მეფის მიერ წამოთქმულმა აზრებმა საშინლად გააკვირვა გრიგორიანთა სამლკდელოება თავის გონივრულობით და საფუძვლიანობით, ოაც მან ხმამაღლა აღიარა მეფისავე წინაშე.

დავრდომილთა და სნეულთა თანაგრძნობამ აფიქრებინა მეფე დავითს დაეარსებინა ქსენონი ანუ საავადმყოფო სახლი, სადაც იკრიბებოდენ ყოველგვარის სენით შეპყრობილნი და სადაც მათ უვლიდენ და სწამლობდენ ამ სნეულთა მოვლასა და

\*). მაჟმედ ელ-ჰამეჟი (Additions, p. 237).

წამლობაში დახელოვნებულნი პირნი. მეფე თითონაც ხშირად დაიარებოდა ამ ქსენონში, ყურს უგდებდა რანაირად უვლიდენ ავადმყოფებს და როგორ სწამლობდენ. ოვითონ ავადმყოფებსაც ელაპარაკებოდა, ამხნევებდა და ანუგეშებდა.

კაც-მოყვარეობით აღსავსე მეფე დავითი ათავისუფლებდა ბლომად ტყვეებს, რომლებიც ქართველებს რჩებოდათ მტრებზედ გამარჯვების შემდეგ, ხოლო გლახებს და ლარიბებს უხვად ურიგებდა მოწყალებას.

ამისთანა საქმეების ჩამდენი მეფე, ცხადია, შეუყვარდებოდა ხალხს და მართლაც არამც თუ უყვარდა, არამედ წმინდანადაც ხდიდა მას. თითქმ თვით განგებაც მოწმობდა მის სიწმინდეს. განგების წყალობის ნიშნებს ხალხი ხედავდა როგორც მის საზოგადო საქმეებში, ისე კერძო ცხოვრებაშიაც. ერთხელ, ერთის ციხის აღების შემდეგ, მეფეს ზედ გულზედ მოხვდა მარჯვედ გამოსროლილი ისარი, მაგრამ გადარჩა სიკვდალს იმიტომ, რომ ისარს და გულს შუა მოჰყვა გულზედ საკიდი მაცხოვრის ხატი. გელათის ეკლესიის შენების დროს მეფე ჩამოვარდა კედლითგან და მძიმედ დაშავდა, აგრეთვე რამდენჯერმე ჩამოვარდა ცხენითგან და ძლიერ დაშავდა, რამდენჯერმე მძიმედ დაიჭრა გაცხარებულს ომში, რამდენჯერმე მის ხასიათის სიმტკიცით და წესიერებით უკმაყოფილო ყივჩაყებმა გაიზრახეს

ლალატით მოკვლა მისი, მაგრამ ყველა ამ განსაცდელს სასწაულებრივ გაღარჩა მეფე და სიკვდილამდე მიაწია ჯანმრთელად.

აი, ამ ლვაწლისათვის დავით მეფეს ერმა უწოდა აღმაშენებელი, ხოლო ეკლესიამ ჩარიცხა წმინდათა შორის და მის ხსენების დღესასწაული დააწესა 26 იანვარს.

## X.

დავით მეფის ოჯახი.— დიმიტრის მეფედ გამოცხადება.—  
დავითის ანდერძი.

დავით მეფე იყო ერთად-ერთი შვილი გიორგი მეფისა და ელენე დედოფლისა. \*) მას ამიტომ ადრევე შერთეს ყივჩაყო მთავრის ათრაქა შარალანიძის ასული გურანდუხტი, რომელიც დიდხანს არ შერჩა. მის სიკვდილის შემდეგ დავითმა შეირთო, როგორც მოწმობენ სომხის ისტორიკოსნი, სომხის ქალი. მეფეს პირველის ცოლისაგან ეყოლა ასული თამარ, ხოლო მეორე ცოლისაგან ასული კატა და ძენი დიმიტრი და ვახტანგი (ანუ ცვატა). პირველი ქალი მეფემ მიათხოვა ცოლად შირვანის მფლობელს აღსართანს, ხოლო მეორე საბერძნეთის იმპერატორის შვილს აღექსის (1116 წ.) \*\*).

\*) ქრონიკები თ. ეორდანიასი, ტ. I, გვ. 234.

\*\*) იქვე გვ. 240.

დავით მეუეს განზრახვა პქონდა თავის სიცოცხლეშივე გაემეფებინა დე თვისი დიმიტრი და თონან დაესვენა, მაგრამ უდროვოდ მოასწრო სიკვდილმა. სიკვდილის წინა დღეებში დავით მეფეშ შეკრიბა დიდებულნი და მათ დასწრებით დალოცა მეფედ თავისი შვილი დიმიტრი, რომელსაც თითონევე დაადგა მეფის გვირგვინი. უკანასკნელი თავისი სურვილი მეფემ გამოსთქვა ანდერძში, რომელიც მის სიტყვით დაწერა მისმა მოძღვარმა არსენ იყალთოელმა.

ამ ანდერძით მეფე უტოვებს დიმიტრის სამეფოს. მასვე მიანდობს დედოფალს და დაძმათა, რომელთათვისაც ევედრება პატივისცემას, ხოლო კერძოდ ცვატას შესახებ სთხოვს აზარდოს და, თუ ვარგოდეს, თავის შემდეგ მეფობა მას გადასცეს. დიმიტრის აზლევს აგრეთვე ძელს ცხოვრებისას, დროშას, სამეფო აბჯარს და საჭურჭლეებს (ზემოთა და ქვემოთა). ცვატას უტოვებს კონსტანტინეს დრაკანებს; ლალებს და თვალ-მარგალიტებს სწირავს ხახულის ღვთის მშობელს. ატენის საჭურჭლის დუკატების და ბოტინატების \*); შესახებ მეფე სთხოვს დიმიტრის, რომ, თუ შეეძლოს, მათი ნახევარი გადასცეს მის მოძღვარს, რომელმაც უნდა

\* ) დრაკანი, დუკატი, ბოტინატი — ბიზანტიურის ფულის სახელებია.

მონასტრებს მისცეს მის სულისათვის სალოცავად. მეფე სთხოვს აგრეთვე დიმიტრის, რომ დაასრულოს გელათის ეკლესია „სალოცავი მისი და საძვალე შვილთა მისთა“ და რაც ამ მონასტრისათვის შეუწირია, არა მოაკლოს-რა მათგან, ხოლო იმ ადგილთაგან, რომელნიც მეფემ უმკვიდრონი დასტოვა, შესწიროს მონასტერს, რაც ბერმა არსენმა და კათალიკოზმა გამოარჩიონ.

მიცვალებული მეფე ტფილისით წაასვენეს გელათს და დაკრძალეს ცალკე ადგილს, დიღის ეკლესიის გარეთ. საფლავის ქვაზედ ამოაჭრევინეს შემდეგი წარწერა: ესე ასე განსასვენებული ჩემი უკუნითი უკუნისამდე. ამას დაგემჭვიდრო, რამეთუ მთხავს ესე. 16

## ლიმიტრი I და დავით III.

### I.

ბრძოლა მტრებთან.

დიმიტრის მეფობაზე, რომელიც გაგრძელდა 1125 წლითვან 1155 წლამდე, ჩვენი ქართული მატიანე თითქმის არავითარს ცნობას არ იძლევა და, თუ რავდენიმე ფაქტი ვიცით იმის დროსი, ეს სომხის ისტორიკოსების წყალობით. ჩვენ ეჭვი არა გვაქვს, რომ დიმიტრის მეფობის ისტორია იქნებოდა დაწერილი თავისს დროზე, მაგრამ იგი დაკარგულა, ან მოსპობილა რამე მიზეზით.

პირველი ფაქტი დიმიტრის მეფობის დროსი არის ანის ქალაქის დაჭერა, რომელსაც ასე მოგვითხრობს თანამედროვე სომხის ისტორიკოსი თვით ანის მცხოვრებელი, საშუალ ანელად წოდებული.

დავითისაგან დატყვევებულის და აფხაზეთში დასახლებულის ანის ქალაქის მფლობელის აბულ სევარის შვილი ფადლონი მამის დატყვევებამდე სპარსეთში იყო წასული და მას აქეთ ის ცდილობდა

ანის ხელახლად დაჭრას. დავით აღმაშენებელის სიკვდილის შემდეგ ფადლონმა იშოვა სპარსეთის ჯარი, მიადგა ანს და ალყა შეჭრა. ამ ქალაქის გამგებელი აბულეთ ორბელიანი და მისი შვილი ივანე მხნედ იცავდენ ქალაქს და იგერებდენ მტერს, მაგრამ მტერმა ძალიან გაუჭირა საქმე მცხოვრებლებს. სანოვაგის შეტანა ქალაქში გაძნელდა და ამის გამო გაჩნდა სიმშილობა. ბევრმა მოინდომა ქალაქითგან გამოსვლა და სიმშილისაგან გადარჩენა, მაგრამ ფადლონი არც იმათ ასვენებდა, თავს ესხმოდა, ხოცავდა, ატყვევებდა და ჰყიდდა. შეშინებულმა მცხოვრებლებმა გამართეს მოლაპარაკება ფადლონთან, აუთქვეს გადაეცა მისთვის ქალაქი, თუ იგი შურს არ იძიებდა მათზე მისი მამის აბულ-სევარის ლალატისათვის. ფადლონი დაპირდა ამ პირობის შესრულებას და ანელებმა გაუდეს კარები. ქართველი ჯარი და ქალაქის გამგებელი ორბელიანი იძულებულები შეიქნენ დაენებებინათ თავი ანისათვის \*).

თუმცა სამუელ ანელი ამბობს, რომ ფადლონისაგან ანის გარემოცვა ერთს წელიწადს გაგრძელდა, ეს დასაჯერებელი არ არის, რადგან ძნელი წამოსადგენია, რომ ასე დიდის ხნის გამავლობა-

\*) სამუელ ანელი (იხ. Collection d'historiens arméniens, t. II, p. 461).

ში დიმიტრის არ გაეგზანოს მეშველი ჯარი. შესაძლებელია, ფადლონი ერთის წლის გამავლობაში რავდენჯერმე მისდგომოდეს ანს და უოველოთვის უკუქცეულს მხოლოდ უკანასკნელად მოეხერხებინოს ქალაქის ხელში ჩაგდება, მაგრამ უფრო ჭიუას ახლო იქნება ვითიქროთ, რომ ფადლონმა ანი ხელთ იგდო სწრაფის და მოულოდნელის თავდასხმით, რის გამოც დიმიტრიმ ვერ მოასწრო შველა. ამას ემოწმება ვარდანი, რომელიც სწერს, რომ ხორასანში მყოფი აბულ სევარის შვილი ფადლონი, გაიგო თუ არა დავით აღმაშენებელის სიკვდილი, გამოემართა ანისკენ და მოსთხოვა აბულეთ ორბელიანს და ქალაქის წარჩინებულს მცხოვრებლებს გადაეცათ ქალაქი მისთვის. ორბელიანმა მცხოვრებთა უბედურების ასაცილებლად აიღო და ქალაქი გადასცაო \*).

ჩვენ ვფიქრობთ, ფადლონს უნდა გამოეცხადებინოს საქართველოს მეფის მორჩილობა და ერთგულობა და ამიტომაც დიმიტრიმ დაამტკიცა იგი ანის გამგებლად და წინაამდევობა არ გაუწია. ამას გვაფიქრებინებს მათე ედესელის სიტყვები, რომ დიმიტრიმ ანი დაუბრუნა აბულ სევარის შვილებს და ჩამოართვა ფიცი მორჩილობისა და ერთგულობისაო \*\*). ამნაირად, მართალია, ანში ძველის მფლო-

\* ) იხ. Additions, pp. 233—234.

\*\*) იქვე გვ. 231.

ბელის ჩამომავალი დაბრუნდა, მაგრამ ქალაქი მაინც საქართველოს ხელქვეითად დარჩა. მეფე დიმიტრი არ გამოეკიდა ფადლონის თავნებობით და თავდასხმით ანის დაჭერას, უეჭველია, იმიტომ რომ ორბელიანის ანში გამგებლად ყოფნა სასურველი არ იყო მისთვის. ეს ამბავი სომხის ისტორიკოსთა მოწმობით მოხდა 1126 წ.

ფადლონის საქციელმა მუსულმანებს აფიქრებინა, რომ საქართველოს ის ლონე აღარა ჰქონდა, რაც დავითის დროსა, და გააბედვინა როგორც თვით საქართველოში მცხოვრებთ ისე მოსაზღვრეთ იარალის აღება საქართველოს წინაამდეგ. ადირბეჯანის მმართველი ყარასონლული შემოესია 1128 წ. საქართველოს საზღვრებს და მისგან დაიმედებულმა ხუნანისა და დმანისის მცხოვრებმა მუსულმანებმაც მოინდომეს დიმიტრისაგან გადგომა. დიმიტრი მეფემ ყარასონლულის წინაამდეგ და აგრეთვე ხუნანისა და დმანისის დასაჭერად გაგზანა ჯარი, რომელსაც უფროსობდენ აბულეთ ორბელიანი შვილით ივანეთი და ივანე თარბელიანი შვილით სუმბათითურთ. ქართველებმა დაიჭირეს გადგომილი ქალაქები ხუნანი და დმანისი და დააშარცხეს ყარასონლული, რომელიც გაიქცა და გამავრადა ადირბეჯანის ერთს ციხეში \*).

\*) სამუელ ანელი (Collection, t. II, p. 463).

დამარცხებულმა მუსულმანებმა კიდევ სცადეს საქართველოს საზღვრებზე თავდასხმა 1130 თუ 1132 წ. აღირბეჭანის ამირა კლინი დაეცა დოვინს და ტყვედ ჩაიგდო ანის მფლობელი და კიდევაც მოაკვლევინა საწამლავით. ანის მფლობელად შეიქნა ჯერ ერთი ძმა ქუშლერი, მის შემდეგ მეორე ძმა მაჰმადი \*).

სამაგიეროს გადასახდელად და აღირბეჭანის მუსულმანების დასაწყინარებლად დიმიტრი მეფემ გაგზანა ქართველი ჯარი 1135 წ. აბულეთ და ივანე ორბელიანების წინამდლოლობით. ქართველები შეებრძოლენ გარნისზე ამირა ელდიგუზს, რომელმაც დაამარცხა ქართველები და დაატყვევა თვით ორბელიანებიც მამა-შვილი. ელდიგუზმა დახოცილის ქართველების თავები დააჭრევინა, მოახარუშვინა და თავის-ქალები დააწყობინა მინარეთის სახურავებზე და ქალაქის კედლებზე \*\*).

1137 წ. დიმიტრი მეფემ ხელ-ახლად გაილაშქრა და ტყვეობითგან დაიხსნა ორბელიანები, ხოლო ორის წლის შემდეგ 1139 წ. იმავე ორბელიანთა წინამდლოლობით გაგზანა ჯარი ყარასონლულის წინაამდეგ. მოხდა ბრძოლა ხაჩინში, სადაც მუსულ-

\*) ვარდანი (იხ. Additions, p. 245).

\*\*) ვარდანი (იქვე გვ. 246), სამუელ ანელი (იხ. Collection, p. 463).

მანებმა გაიმარჯვეს ქართველებზედ. \*) ამის გაგები-  
სათანავე თვით მეფემ გაილაშქრა აღირბეჟანში. სწორეთ ამ ლაშქრობის დროს მოხდა მიწის ძრა, რომელმაც დაანგრია განჯა. დიმიტრი მეფემ ისარ-  
გებლა ამ შემთხვევით და ვაეშურა განჯისკენ, აი-  
ლო ეს ქალაქი და აიალაფა. გამარჯვების ნიშნად  
მეფემ ჩამოალებინა ქალაქის რკინის კარები და გად-  
მოატანინა საქართველოში, სადაც შესწირა გელა-  
თის ტაძარს \*\*).

საქართველოს მტრები ამის შემდეგ მიწყნარდენ  
და აღარ შემოსულან მის საზღვრებში 1153 წლამ-  
დე, როდესაც ერზრუმის მფლობელი სალდუხი თა-  
ვის ჯარით მიადგა ანის ქალაქს. მეფემ ანის დასა-  
ცველად გაგზანა ჯარი, რომელმაც დაამარცხა მტრე-  
ბი და დატყვევა თვით სალდუხი \*\*\*).

## II.

შინაური არეულობა.

დიმიტრის მეფობაში თავი იჩინა შინაურმა გან-  
ხეთქილებამ. მეფეს ჰყავდა ორი შვილი—დავითი და

\*) სამუელ ანელი (Additions, p. 246).

\*\*) კირაკოზი (Additions, p. 246), ქრონიკები თ. უორ-  
დანიასი ტ. I, გვ. 248.

\*\*\*) სამუელ ანელი (Collection, p. 465) და იბნალათირი  
(იხ. არაბთა და სპარსელთ მწერალთა ცნობანი „მოაშბეში“

გიორგი, რომელთაც ერთმანეთში უსიამოვნება და ქიშპობა ჰქონდათ. მამას უფრო უმცროსი შვილი უყვარდა. ამით სარგებლობდენ ზოგიერთი დიდებულები, მაგ. ორბელიანები, და თავიანთ პირადის ინტერესით უფროსს შვილს დავითს აღელვებდენ დიმიტრი მეფისა და გიორგის წინაამდეგ<sup>\*)</sup>). ამის გამო დავითი შეიქნა მამის უჩხი და უფრო შეაძლა მას თავი. საქმე ისე გამწვავდა, რომ დიმიტრიმ წესის მიუხედავად მოინდომა თავის მემკვიდრეობა. უმცროსის შვილის გიორგისთვის გადაეცა და კი-დევაც შეასრულა ეს სურვილი 1150 წ., როდესაც მეფედ გამოაცხადა გიორგი და ცოლად უთხოვა ოსეთის მეფის ქალი ბურდუხან. ამ ამბით აღელვებული დავითი გაუდგა თავის მამას და თავის მხრით

1897 წ. № XI გვ. 9). ეს : მბავი მოხსენებულია აგრეთვე თამარ მეფის მემატიანისაგან.

\*) ვარდანი ამ შინაურს განხეთქილებას ცოტა სხვანაირად მოგვითხოობს. მის სიტყვით გამოდის, ვითომ დიმიტრი მეფის და მის ძმის გიორგის შორის ყოფილიყველ უსიამოვნება და მათ ურთიერთობაში მიეღოთ მონაწილეობა ორბელიანთ. დიმიტრი მეფეს არა ჰყოლია ძმა გიორგი და არც არავითარი ნიშანი ჩანს ქართულს წყაროებში დიმიტრის და მის ძმის (ვახტანგის ან ცვატას) შორის განხეთქილებისა იმ დროს, როდესაც დიმიტრისა და მის შვილის დავითის. შორის განხეთქილება ცხადია. ვარდანს, უეჭველია, დიმიტრის შვილი გიორგი მის ძმად მიუღია და საქმის გარემოებაც აურ-დაურევია (Additions, p. 245).

მოინდომა მამა ტახტითგან ჩამოეგდო და თვით გა-  
მეფებულიყო. დავითის უმთავრესი წამქეზებელნი  
იყვენ ივანე და თირქაშ ორბელიანები, აბულეთის  
ძენი. დიმიტრი მეფემ მოაკვლევინა ივანე ორბე-  
ლიანი, თითქაში-კი გაიქცა შაჰერმანთან, რომელ-  
მაც ის დააბინავა არ შარუნში. აქედგან თირქაში  
მუსულმანთა ჯარით ხშირად ეცემოდა საქართვე-  
ლოს საზღვრებს და აოხრებდა \*). ერთის ამისთანა  
თავდასხმის დროს თირქაში დაიჭირეს და მეფემ იგი  
დაამწყვდევინა ციხეში.

თუმცა ამხანად დავითს არ წაემართა ხელი, ის  
მაინც თავისის არ იშლიდა და ცდილობდა ძალით  
აეღებინებინა დიმიტრისთვის მეფობაზე ხელი და თი-  
თონ გამეფებულიყო. 1155 წ. დავითმა კიდეც შე-  
ასრულა თავისი წადილი ჩამოაგდო თავისი მამა  
ტახტითგან და თითონ გამეფდა. ამ ცვლილების  
დროს დავითმა ამოხოცა და გადევნა საქართველოთ-  
გან ბევრნი დიდებულნი, რომელნიც მის მამის ერთ-  
გულნი იყვენ. მამა-კი იძულებული ჰყო ბერად შემ-  
დგარიყო. ბერობაში დიმიტრიმ თავი იწოდა და-  
ნიელად \*\*).

\*) ვარდანი (იხ. Additions, p. 247).

\*\*) ქრონიკები თ. ეროდანიასი, ტ. I, გვ. 258.

## III.

დავით III-ის მეფობა.

დავითმა იმეფა ძალიან მცირე ხანს — ექვსს თვეს. თავის საქციელით იმან შეაძულა თავი მამას, ძმას და ბევრს დიდებულს, რომელთაც ის სდევნიდა, სამაგიეროდ სწყალობდა თავის მომხრეებს. ვარდანის თქმით, თირქაშ ორბელიანი გამოიყვანა საპყრობილითგან და ამირსპასალარობა მისუა, რითაც ძალიან აწყენინა სუმბატ ორბელიანს, რომელსაც ეჭირა ეს თანამდებობა დიმიტრის დროს და რომლის ჩაგონებითაც დავით მეფე მოწამლეს \*). სიკვდილის წინ დავითმა მიიწვია თავისთან ძმა თავისი გიორგი, კათოლიკოზი და დიდებულები და მათ გამოუცხადა სურვილი, რომ მის სიკვდილის შემდეგ მეფედ ყოფილიყო ყრმა შვილი მისი დიმიტრი, რომლის სრულ-წლოვანობამდე სამეფოს გამგებლად უნდა ყოფილიყო ძმა მისი გიორგი. დიმიტრის ამზრდელად დავითმა დანიშნა ივანე ორბელიანი, სუმბათის შვილი. ამასთან დავითმა აიყვანა ხელში იქვე მყოფი დიმიტრი, გამოეთხოვა კოცნით და გადასუა ხელში ივანე ორბელიანს, ხოლო დამსწრე დიდებულებს სთხოვა ერთგულობა გაეწიათ ყრმისა-

\*) Additions, p. 247.

თვის \*). ამის შემდეგ მოკვდა დავით მეფე (1156 წ.). მართალია, დავითმა თავისი ტახტი უანდერძა თავის შვილს დიმიტრის, მაგრამ გიორგიმ კანონიერად არ ჩათვალა მისი განკარგულება. დავითის სიკვდილის დროს ცოცხალი იყო კიდევ დიმიტრი მეფე, რომელიც დავითმა ძალით ჩამოაგდო ტახტითვან და იძულებულ-ჰყო ბერად შესულიყო. რიგით ტახტი ისევ დიმიტრის უნდა დაბრუნებოდა, მაგრამ მან აღარ ინება ბერობის მიტოვება და თავისი უფლება დაულოცა გიორგის, როგორც ეს წინადაც ჰქონდა გადაწყვეტილი. ამ საფუძვლით დავითის შემდეგ მეფედ შეიქნა ძმა მისი გიორგი 1156 წ. ამავე წელს მოკვდა მამა მისი დიმიტრი მეფე, ბერობაში დანიელი.

\*) სტეფანოზ ღრმელიანი (Histoire de la Siounie, pp. 216—217).

## მეცნ გიორგი III.

### I.

ლაშქრობანი და ბრძოლანი.

პირველი საგანი, რომელსაც გიორგიმ გამეფებისათანავე მიაქცია ყურადღება, იყო ანის ქალაქის საქმე. 1156 წ. სომხის სამღვდელოების დახმარებით ფადლონმა წართვა ამ ქალაქის გამგებლობა, თავის ძმას შადარის \*). როგორც ერთი ისე მეორე ცდილობდენ დაეღწიათ თავი საქართველოს მეფეთა დამოკიდებულებისაგან. ძმათა დავიდარაბის მოსახლეობად და ქალაქის დასამორჩილებლად გიორგი მეფე გაემართა ანისკენ 1161 წ. ქართველები გარს ადგენ ქალაქს სამის დღის გამავლობაში და აიძულეს ქალაქი დამორჩილებოდა. მეფემ ჩამოართვა ფადლონს ქალაქის გამგებლობა და გამგებლად დააყენა მანდატურთუხუცესი ივანე ორბელიანი და მის თანაშემწედ ამირსპასალარი სარგის მხარგძელი.

შავერმანის დასასჯელად გიორგიმ ანის დაჭრის შემდეგ გაილაშქრა მის სამფლობელოში—აშორნის

\*) იხ. არაბთა და სპარსელთ მწერალთა ცნობანი, „მოაბე“ 1897 წ. № XI, გვ. 9.

ქვეყანაში. იქითგან დაბრუნებულმა ანში დასტოვა  
მეციხოვნეები და დაბრუნდა ქართლში.

შაჰერმანმა თავის მხრით მოინდომა სამაგიეროს  
გადახდა და ანის წართმევა. მან ამ აზრით სთხოვა  
შემწეობა შამის (სირიის), ჯაზირის (მესოპოტამიის),  
დიარბექირის და ერზრუმის მფლობელებსა და დი-  
დის ლაშქრით მიადგა ანს ამავე წლის (1161) გვა-  
თათვის გასულს. გიორგი მეფემ ეს ამბავი შეიტყო  
ნაჭარმაგევში და გასცა ბძანება ჯარი შეკრებილიყო  
ფიცხლად. მაგრამ მთელის ჯარის შეკრების ცდა  
აღარ შეაძლებოდა და ამერეთის ზოგიერთის კუთ-  
ხით მოსულის ჯარით მეფე გაემართა ანისკენ. მე-  
ფეს ურჩევდენ მწიგნობართ-უხუცესი დანენე და  
სუმბატ ორბელიანი (მაშინ ბერად შემდგარი სახე-  
ლად სვიმონ), ოომ ასეთის მცირე ჯარით არ შებ-  
ძოდა მტერს. მეფემ არ დაუჯერა მათ და გასწია  
მტრისაკენ. ოოდესაც მტერთა აუარებელი რიცხვი  
გამოჩნდა, გიორგი მეფე გაღმოხტა ცხენითგან და  
დაიწყო ლოცვა, შემდეგ მისცა იოანე მწიგნობართ-  
უხუცესს ძელი ცხოვრებისა, ოომ წინ გასძლოლო-  
და ჯარს, ხოლო თითონ მიმართა მას გამამხნევებე-  
ლის სიტყვებით. ამის შემდეგ გიორგი მეფე თავის  
რაზმით მიესია მტერს, გულდაგულ გააპო მათი ო-  
ზმები და მივიღა მტრის დროშამდის, ოომელიც  
ძირს დასცეს ქართველებმა. მტერი გაიქცა, ქართ-  
ველებმა სდიეს მზის ჩასვლადე. გამარჯვებულებს

დარჩათ მრავალი ტყვეები და მტრის მთელი ბანაკი დიდის სიმღიდრით. სამუელ ანელის თქმით, ეს გა-  
მარჯვება მოხდა 1 მარიამობისთვეს 1161 წ. ამ  
ბრძოლაში მტრის რიცხვი იყო 80,000, ქართველ-  
თა 7,000. ტყვეთა რიცხვი იყო 23,000, ხოლო  
ვარდანის თქმით 40,000-იც \*). ტყვეთა შორის იყო  
ერზრუმის მფლობელი სალდუხი, რომელიც, რო-  
გორც ზევით გვქონდა მოხსენებული, რვა წლის  
წინადაც ჩაუვარდა ტყვედ ისევ ანის ქალაქთან დი-  
მიტრი მეფეს. როგორც წინად დიმიტრი მეფემ,  
ახლაც გაათავისუფლა გიორგი მეფემ სალდუხი მის  
დის ქელათის მეფის შაჰერმან სოკმანის ცოლის შაჰ-  
ბანუს თხოვნით \*\*).

გიორგი დარჩა ანში სამს დღეს. ამ ქალაქის  
ამირად დააყენა ანელი სომეხი სათუნი. ქალაქში  
დასტოვა მეციხოვნენი და წამოვიდა ტფილის, სა-  
დაც დიდის ამბით დაუხვდენ ძლევამოსილს მეფეს.

ტყვეთა აუარებელის რიცხვის უკან დასაბრუნე-  
ბლად მოსულის ათაბაგმა გამოუგზანა გიორგი მე-  
ფეს მოციქულად სირიის პატრიარქი ეგნატე. გიორ-  
გიმ დიდის პატივით მიიღო მოციქული და გაუშვა  
მრავალი ტყვე. პატრიარქს თითონაც გააყოლა ათა-

\*) Collection, p. 465; Additions, p. 253.

\*\*) იბნალათირი (არაბელთ და სპარსელთ მწერალთა  
ცნობანი „მოამბე“ 1897 წ. № XI, გვ. 10).

ბაგთან თავისი მოციქული მხლებელის დარაჯით. როდესაც ქართველი მოციქული შევიდა მოსულის ქალაქში, მის საღარაჯო ჯარის კაცებს ეჭირათ შუბები, რომელთა წვერებზედ გაკეთებული იყო ჯვრები \*).

ანში გამგებლად დაყენებული სათუნი არ გამოდგა სანდო კაცი. თავის მოქმედებით მან მალე აღძრა ეჭვი საქართველოს მთავრობისა: მეფის ნება-დაურთველად დაიწყო ქალაქის კედლების აგება და გამაგრება. მეფემ ამის გამო ჩამოართვა მას გამგებლობა და მის აღგილის გააწესა სარგის მხარებელი. სათუნი გაიქცა ელიგუზთან, მაგრამ მალე ჩაუვარდა ხელთ შაქის ერისთავს. ამან შეიპყრო იგი და გადასცა გიორგი მეფეს, რომელმაც დასაჯა იგი \*\*).

სამეფოშ ერთს მხარეზედ რომ სუსტი მისცა მტრებს, გიორგი მეფემ ახლა მეორე მხრითაც მოინდომა ეჩვენებინა თავისი ძალა, ამიტომ მან გაილაშქრა 1162 წელს მარიამობისთვე ში დოვინისკუნ, სადაც 1135 წ. ელდიგუზი ისე მხეცურად მოეკიდა დახოცილს ქართველებს. ქართველისა და კავკასიელთა მეშვეობის ჯარით გიორგიმ აიღო დოვინი და მისცა ცეცხლსა და მახვილს. დაითარა მხოლოდ ქრისტიანები. მეფემ ჩამოაღებინა მინარეთითგან ქარ-

\*) S.-Martin, t. II, p. 241.

\*\*) გარდანი (Additions, p. 253).

თველების თავის-ქალები, ჩაალაგებინა კუბოებში, რომელთაც ზევითგან გადააფარებინა ოქროქსოვილი, აჰკიდა მუყრებს და წააღებინა ფეხშიშველებს ტფილისში. \*) თვით მინარეთი დაარღვია და ტყვეთ წამოიყვანა 60,000 კაცამდე \*\*).

ადირბეუანის მფლობელმა ელდიგუზმა, სამაგიეროს გადახდა მოინდომა 1163 წ. და მოიწვია სხვა მუსულმანთა მფლობელნიც საქართველოზე გასალაშქრებლად. ჯერ კიდევ უველა მოკავშირეებს არ მოეყარათ თავი, რომ ელდიგუზი შემოვიდა საქართველოს საზღვრებში, დაჭირა ~~გაგის~~ ციხე და დაიწყო მის მიღამოების აკლება-აოხრება. ამის შემთხვემა გიორგი მეფემ ფიცხლად შეაგროვა ჯარი და გაემართა გაგისკენ. როდესაც ქართველები გადავიდენ ბუბაჭრის მთაზე, მტერმა შეიტყო მათი მიახლოვება, სისწრაფით დასტოვა ყოველივე თავისი სანოვაგე და გაბრუნდა. ქართველების მოწინავე ჯარი დაეწია მტერს, როდესაც ის გადავიდა ეკლესის წყალს, გიორგი მეფეს უნდოდა გამოსდევნებოდა გაქცეულს მტერს, მაგრამ დიდებულთ დაუშალეს იმ მოსაზრებით, რომ მძლავრი მტერი თითონ გარბის და ესეც საკმარისი გამარჯვებააო. გიორგიმ დაითხოვა ამის შემდეგ ჯარი და მცი-

\*) იქვე გვ. 253 და 254.

\*\*) სამუელ ანელი (Collection, p. 465) და მიქელ აზორი (Additions, p. 255).

რეოდენის რაზმით დადგა ლორისა და დმანისის შორის, სადაც ნადირობა დაიწყო.

გაგითვან გაქცეული მტერი მივიღა გელაქუნის, სადაც მას შეუერთდა სულთან არსლანი. აქედგან ისინი გაემართენ ანისკენ. აქ მათ შეუერთდა კიდევ შაჰერმანი ჯარით. მტრების რიცხვი 50,000-მდე იყო \*). ანის ციხის უფროსი თორელი მაგრა დაუხვდა გარშემორტყმულს მტერს და დიდის მოხერხებით იცავდა მისგან ქალაქს.

მტერთაგან ანის ქალაქის გარემოცვა შეიტყო გიორგი მეფემ ლორისა და დმანისის შეა მყოფობის დროს, როდესაც მასთან მივიღა სულთან არსლანის მოციქული. ამ მოციქულმა კარგად დაათვალიერა მეფის ძალ-ღონე და ყველაფერი მტერს შეატყობინა. მტერი მაშინვე გამოემართა გიორგისკენ ლამით და განთიადისას მივიღა მოულოდნელად მეფის ბანაკთან, სადაც ყველას ეძინა. შეიტყეს თუ არა მტრის თავდასხმა, ქართველები მოახტენ ცხენებს. გიორგის უნდოდა შებრძოლებოდა მტერს, მაგრამ ამირსპასალარმა რგანე ორბელიანმა და სხვა დიდებულთ თითქმის ძალად წამოიყვანეს, რომ გადაერჩინათ აუარებელის მტრისაგან. გამოქცეულს ქართველებს დაედევნენ მტრები. ქართველები გზა-

\*) იბნალათირი (არაბელთ და სპარსელთ მწერალთა ცნობანი, „მოამბე“ 1897 წ. № XI, გვ. 11).

გზა უცებ შეჩერდებოდენ ხოლმე და ბრძოლას უწევდენ მეტად დაწინაურებულს მტრის რაზმებს, რითაც ბევრს აზიანებდენ მათ. ბოლოს იმისთანა ადგილს მოაწიეს, სადაც შეიძლებოდა გაჩერება და მტრის დახვედრა. მტრებმა რომ ვერაფერი დააკლეს ქართველებს, უკან გაბრუნდენ. შესანიშნავი ის არის, რომ ქართველებმა ამ უკან დაწევის და მტრების შოგერების დროს დაჰყარებს მხოლოდ ორი კაცი: ჯვარის მტვირთველი ქანიძე და ერთი უბრალო აზნაური.

ანის ქალაქის მფლობელთა ჩამომავალნი არ ისვენებდენ და ცდილობდენ საქართველოს წინაამდევ მოსაზღვრე მუსულმანთა მფლობელების აღმდევრას თავიანთ ძველის სამფლობელოს დასაბრუნებლად. გიორგი მეფე ხედავდა, რომ იმათი დაწყნარება შეიძლებოდა მიფერებით და ძველის სამფლობელოს დაბრუნებით და ამიტოთ ამჯობინა თავის ნებითვე ანის ქალაქი მიეცა შადადიანთა გვარის წამომაღენელისათვის, თუ იგი მორჩილობასა და ერთგულობას შეჰვიცებდა. ამასვე სთხოვდენ გიორგის ხორასნის სულთანი და ელიზობუზ ათაბაგი. გიორგის და რუსულის დედოფალიც, ხორასნის სულთნის ნაცოლარი, მათთან ზავის შეკვრას და ანის საქმის მშვიდობიანად გადაწყვეტას ურჩევდა. გიორგიმ მისცა ანის ასლანს, მაჰმადის შვილს, რომელმაც მორჩილობა და ერთგულობა შეჰვიცა.

ამ ნაირად ჩამოვარდა მშვიდობიანობა, მაგრამ ეს მშვიდობიანობა არაფრად ესიამოვნებოდათ ლაშქარს და დიდებულთ, რომელნიც მიჩვეულ იყვნენ ლაშქრობით სიმდიდრის შეძენას. იმათ მოახსენეს მეფეს: „არა არს ლონე დარჩენისა ჩვენისა თვინიერ ლაშქრობისა და რბევისა“. მათ სათხოვრის დასაკმაყოფილებლად მეფემ ბძანება გამოსცა, რომ მოეწაშქრათ და მოერბიათ ტაოელთ, კლარჯო და შავშთა ოღოთისი და ბანი, მესახთა და თორელთა ყარსი და აშორნი, ამირ-სპასალარის ჯარს და სომხითართ. მტკვრის მარჯვენა მხარე განჯამდის, ლიხთ იმერთ და ქართლელთ განჯის ქვეით მტკვრის პირი ამიერ და იმიერ ხოლოთამდის, ერელთა და კახელთა ალაზნის. შესართავით ვიდრე შირვანამდის. ამ განკარგულების თანახმად ჯარმა მოილაშქრა და მოარბია ანიშნული ქვეყნები და დაიკმაყოფილა საშოვრის სურვილი.

ეს ლაშქრობა უნდა ყოფილიყო 1166 წ., როდესაც მუსულმანთა ისტორიკოსი იბნალათარი მოიხსენიებს, რომ ქართველები შევიდენ არანში და განჯამდის მიაღწიეს, ბევრი მუსულმანი დახოცეს და მრავალი ქალი ტყვედ წაიყვანეს (\*).

როგორც უკვე მოთხრობილითგან სჩანს, შირვანსა და დარუბანის შუა გამუდმებული მტრობა

\*) იხ. „მოამბე“ 1897 წ. № XI. არაბელთ და სპარსელთ მწერალთა ცნობანი, გვ. 15.

იყო. დარუბანდელების წინამდეგ საქართველოს  
მეფეები ყოველთვის შველოდენ მათ ერთგულს და  
მორჩილს შირვანის მფლობელებს, რომელნიც ნა-  
თესავობდენ ქართველს მეფეებს. გიორგის მეფობა-  
შიაც დარუბანდელთ გამოაძიეს, შირვანის მფლო-  
ბელი აღსართანი, რომელიც მოვიდა საქართველო-  
ში და შემწეობა სთხოვა თავის დედის ძმის შვილს  
გიორგის. გიორგი მეფემ შეჰყარა ჯარი, შევიდა  
შირვანში და მივიდა დარუბანდამდე, სადაც დაიპყრო  
მუსკურისა და შარაბამის ქვეყნები და აიღო ქალაქი  
შაბურიანი. შემდეგ შირვანი ჩაბარა აღსართანს  
და დაბრუნდა უკან (1167 წ.).

შირვანითგან დაბრუნებულმა გიორგი მეფემ გაი-  
ლა შექმა ბასიანში და მოარბია ეს ქვეყანა. მატიანის  
თქმით, გიორგი დრო-გამოშვებით გზანილა თავისს  
ლაშქარს ხან ნახჩევნისკენ, ხან მასისისკენ და თა-  
ლვისკენ, ხან ბარდავისა და ბაოყუნისკენ. ამნაირის  
ლაშქრობით მდიდრდებოდა თვითონ მეფეც და მისი  
ლაშქარიც. მეფე თავის მრავალს საჭურჭლეს ინა-  
ხავდა უჯარმის კიხეში.

1174 წ., ვარდანის თქმით გიორგიმ ჩამოარ-  
თვა ანი მის მფლობელს ამირ-შაჰს და გამგებლად  
იქ დააყენა ამირ-სპასალარი ივანე ორბელიანი. ამის  
გაგებაზე თურქების სულთანი ალპარსლანი წამო-  
ვიდა ჯარით ანის დასაჭერად და იკელო შირაქის  
ქვეყანა. ივანე ორბელიანი აპირებდა ქალაქის გა-

დაცემას, მაგრამ მცხოვრებლებმა არ შეასრულებინეს მას ეს განზრახვა. მტერმა ვერ აიღო ქალაქი და იძულებული შეიქმნა უკან დაბრუნებულოყო (\*). X

## II.

## შინაური არეულობა.

გიორგი მეფის ძმის-წული დიმიტრი, რომელსაც დავით მეფემ უანდერძა ტახტი, იზრდებოდა ივანე თრბელიანის ოჯახში და, უეჭველია, გიორგის თვალში არავითარს ეჭვს და შიშს არ ჰბადავდა, რადგან მის მამის ანდერძს არავითარი სავალდებულო ძალა არა ჰქონდა. ივანე თრბელიანს და მის ნათესავებს-კი თავისი აზრი ჰქონდათ და იმას ზრდიდენ, როგორც თავიანთ პატივმოყვარეობის იარაღს. ივანე თრბელიანმა თავის ქალიც მიათხოვა და ამნაირად სრულს თავის გავლენას ქვეშ მოაქცია (\*\*). ის და სხვა თრბელიანები ფიქრობდენ მის გამეფებით თავიანთ მნიშვნელობის და გავლენის გადიდებას. ამ განზრახვით თრბელიანებმა და გიორგის სხვა უკმაყოფილო დიდებულებმა ივანეს მეთაურობით მოინდომეს გიორგის ტახტითგან ჩამოგდება და მის ძმის-წულის გამეფება. 1177 წ. ისინი შეიყარენ ერთად

\*) Additions, p. 256.

\*\*) სტეფანოზ თრბელიანი (Histoire de la Siounie, p. 220).

ორბელიანთ სოფელს დარბაზში და დაიწყეს მოლა-  
პარაკება იმის შესახებ, თუ როგორ გაემეფებინათ  
დიმიტრი გიორგის მოულოდნელად შეპყრობით.  
ორბელიანთ გარდა ამ შეთქმულობაში იყვენ მონა-  
წილენი ერეთისა, კახეთისა, სამცხეისა და სომხეთის  
დიდებულები. მეფემ ეს შეთქმულობა შემთხვევით  
შეიტყო სახატეში ყოფნის დროს. მაშინვე დაბრუნ-  
და ტფილისს და შეუდგა თითონაც მზადებას. ყუ-  
ბასარმა სწრაფად შეკრიფა ჯარი 5000 კაცამდე.  
შეთქმულებმა რომ შეიტყეს გიორგის მზადება, სახ-  
ტად დარჩენ. იმათ მისი მოულოდნელად შეპყრობა  
უნდოდათ, ახლა-კი გამარჯვების ეჭვი დაებადათ,  
გონება დაპკარგეს და ჯარის შეგროვება ვეღარ  
მოახერხეს, ხოლო ზოგიერთთ არჩიეს გიორგის მხა-  
რეზე გადასვლა, როგორადაც გამრეკელმა, მაგი-  
სტროსიანმა და სხვათა. გიორგიმ კარგად მიიღო,  
ვინც მის მხარეზე გადავიდა, და დაპკირდა წყალო-  
ბას. ამნაირად ძალმოცუმული გიორგი შევიდა სომ-  
ხეთში გადგომილთა დასაწყნარებლად. ივანე ორო-  
ბელიანმა ახლა-კი გამაგრება არჩის და შევიდა დი-  
მიტრით და თავის თანამოაზრებით ლორის ცი-  
ხეში \*).

სომხეთში გიორგი მეფემ დაიჭირა ციხეები და  
სიძაგრეები, რომლებიც გადგომილთ ეკუთნოდათ,

\*) იქვე, გვ. 218, 219.

და მოარბია მათი მამულები სომხეთში. და ტაშირ-ში. შემდეგ დაიბანაკა აგარანში. აქ გიორგიმ გაი-  
გო, რომ გადგომილები ელოდენ შემწეობას კახე-  
თითვან, საღაც ამზადებდენ ჯარს მის წინაამდევ-  
ამიტომ მეფემ ხელად გაგზანა კახეთისკენ ჯარი მე-  
ჯინიბეთ-უხუცესის ჭიაბერის წინამძღოლობით. კა-  
ხეთში ამ ჯარს წინ შეხვდა გადგომილთა ჯარი,  
შემდგარი ქართველ-მთიულთაგან. ჭიაბერმა დაამარ-  
ცხა გადგომილნი და შეიძყრო უმთავრესი მოთა-  
ვენი: გრიგოლ ასათიძე, ივანე ვარდანიძე და შოთა  
ვაჩიძე.

ამის შემდეგ გიორგი მეფე მიადგა ლორის ცი-  
ხეს. ორბელიანებმა დიმიტრის სახელით გაგზანეს  
შაჰერმანთან და აღირბეუანის მფლობელებთან შემ-  
წეობის სათხოვნელად ქართლის ერისთავი ლიპარიტ  
სუმბატის ძე ორბელიანი თავის ორის შვილით ელი-  
ქუმით და ივანეთი \*), მეჯინიბეთ-უხუცესი ქათარ  
ორბელიანი, ივანეს ძე, და ეპისკოპოსი ანანია დვი-  
ნელი. ვიდრე ისინი დაბრუნდებოდენ რამე პასუხით,  
გიორგი მეფემ ძალიან შეაწუხა ლორეში გამომ-  
წყვდეულნი, ბევრმა გამარჯვების იმედი დაჲკარგა,  
ციხითვან ივანე ორბელიანის გაუგებრად საბლებით  
ჩამოეშვენ კედელზე და გამოცხადდენ გიორგისთან  
აგრეთვე მოიქცა თვით დიმიტრიც, რომელიც მივი-

\* ) იქვე, გვ. 221.

და საბელ-ყელმობმული ბიძასთან და სინანული გა-  
მოუცხადა. ამნაირად ციხეში დარჩენ მხოლოდ ორ-  
ბელიანები და მცირეოდენი მათი მომხრენი, რომელ  
ნიც ბოლოს იძულებულნი იყვენ დანებებოდენ მე-  
ფეს \*).

გიორგი მეფემ მკაცრად დასაჯა გადგომილები.  
დიმიტრი დააბრმავა და გამოასაჭურისებინა, ივანე  
ორბელიანს თვალები დასწვა, ქავთარ ორბელიანი,  
ქმა ივანესი, მისი შვილი სუმბატ და მისი ქმისწუ-  
ლი ზინი მოაკვლევინა, დანარჩენნიც გასწყვიტა სხვა-  
და-სხვა საშუალებით. ასე რომ გაქრა სრულებით  
ორბელიანთ გასაგისი საქართველოში. ამის გარდა  
მეფემ ბძანება გასცა, რომ ამოეშალათ ქვეყნის ისტო-  
რიითგან ამ გვარის ხსენება და დაეწერათ ამ ამბო-  
ხების მოთხრობა ორბელიანთა ღალატის დასამტკი-  
ცებლად. აგრეთვე აკრძალა მათის სახელის ხსენება  
და კვლავ უცხოეთითგან რომელისმერ ორბელიანთ  
გვარის შვილის შემოშვება საქართველოში \*\*).

საქართველოში რომ ეს ამბავი ხდებოდა, სპარ-  
სეთში წასულმა შემწეობის სათხოვნელად ლიპარიტ  
ორბელიანმა შვილებით ელიქუმით და ივანეთი შეა-  
გროვა 60,000 მხედარი და წამოვიდა დიმიტრის  
მისაშველებლად. მაგრამ გზაში შეიტყო ამბავი და

\*) იქვე, 220.

\*\*) იქვე, გვ. 220, 221.

უკანვე გაბრუნდა. ორბელიანთა მამულის ერთი წილი მეფემ მისცა ერთგულს დიდებულებს, მეორე ყუბასარს, ომელიც დანიშნა ამირსპასალარად<sup>\*</sup>.)

გიორგი მეფის სიმკაცრე დიმიტრის მიმართ აიხსნება იმ უპატივცემულობით, რომელიც მან გამოიჩინა თავის ბიძისადმი, იმ ბიძისადმი, რომელსაც ვაჟიშვილი არ ჰყავდა და, მაშასადამე, მემკვიდრედაც ის უნდა ჰყოლოდა ძალა-უნებურად. დიმიტრიმ იმდენი სულგძელობა არ გამოიჩინა, რომ თავისი მოხუცებაში შესული ბიძა არ შეეწუხებინა და სიტკბოებით მიეცილებანა სამარემდე, რის შემდეგაც იგივე გახდებოდა მეფედ. ამას მან ორბელიანების ინტერესი არჩია, მათ რჩევას აჰყვა და შეიქნა მათ იარაღად ბიძის წინამდევგ. რაიცა შეეხება ორბელიანების მიმართ სიმკაცრეს, ეს უფრო ადვილი გასაგებია. ორბელიანები გიორგი მეფეს დიდს პატივში ჰყავდა, მათ ეჭირათ სიუკეთესო თანამდებობანი, მაგრამ თავიანთ მამა-პაპის ჩვეულებით, გამართეს შინაური განხეთქილება სულ ტყუილუბრალოდ, მხოლოდ საკუთარის ინტერესების მისაღწევად. გიორგიმ ახლა გაითვალისწინა ამ გვარის მთელი ისტორია და გადასწყვიტა ერთხელ და სა-

<sup>\*</sup>) იქვე, გვ. 221.

მუდამოდ ბოლო მოეღო ამ მეფეთა ურჩის და ორგულის გვარისათვის \*).

## III.

საკულტისი კრება: — თამარის სამეფოდ დანიშვნა. — ყაჩალობის გაფრცელება და მისი მოსპობა. — ბურდუხან და დოფლის და ვიორგი მეფის სიკვდილი.

ერთის მხრით დიდმა სიხარულმა და მაღლობის გრძნობამ ღვთისადმი, რომელმაც მიანიჭა გამარჯვება შინაურს მტრებზედ, მეორე მხრით შიშმა ღვთის წინაშე იმ სიმკაცრისათვის, რომელიც ჩაიდინა თავის მოწინაამდეგებზედ, გიორგი მეფეს აფიქს ქრებინა ეკლესიისთვის ბეჭედი გიორგი მეფისა.



სამსახური გაეწია და ამით მისი მფარველობა მოეპოვებია. ამ აზრით გიორგი მეფემ მოიწვია საეკლე-

\* ) ბ-ნის უორდანიას აზრი, დაფუძნებული აფხაზთა ქრონიკის ცნობაზე, ვითომ დიმიტრის გადგომა შომხდარიყვეს ორჯერ 1167 და 1178 წლებში, ჩვენ დამტკიცებულად არ

სიო კრება, რომელმაც იქონია მსჯელობა ეკლესიის  
საჭიროებათა შესახებ და მოახსენა თავისი განაჩენი  
მეფეს. მეფემ მიიღო სახეში კრების განაჩენი, გა-  
მშვენიერა ეკლესიები და მონასტრები, გაათავისუფ-  
ლა ისინი ყოველისავე ბეგრისაგან და ხელი შეუწყო  
საეკლესიო წესების ადგენას და დაცვას (1178 წ.)\*).

როგორც ვთქვით, გიორგი მეფეს არა ჰყავდა  
ვიუშვილი. და, უეპველია, მის მემკვიდრედ შეიქ-  
ნებოდა მისი ძმისწული დიმიტრი, მაგრამ ამან თა-  
ვის მოუფიქრებლობით გაარისხა გიორგი, რომელ-  
მაც იგი გამოასაჭურისებინა და ამნაირად შეუძლე-  
ბელი გახდა მისი გამეფება. ახლა გიორგი შეიპყრო  
იმ ფიქრმა, თუ ვინ უნდა გამხდარიყო მისი მემკვი-  
დრე საქართველოს ტახტზე. მახლობელი ნათესავი

მიგვაჩნია. ჩვენ ვფიქრობთ, რომ ქრონიკში შეცდომა და  
1167 წლის მაგიერ უნდა იყვეს 1177 წ. მექრონიკეს ცალ-  
ცალკე მოუხსენებია დიმიტრის თვალების დაწვა 1177 წ. და  
ორბელიანთა ამოწვევტა 1178 წ., თუმცა ორივე ეს ამბავი  
ერთისა და იმავე შემთხვევით იყო გამოწვეული. ორჯერ რომ  
ყოფილიყო გადგომა, საოცარი იქნებოდა „ქართლის ცხოვ-  
რების“ და სტეფანოზ ორბელიანის სიჩუმე, რადგანაც აქართ-  
ლის ცხოვრების“ დამწერს უთუთდ უნდა სცოდნოდა ეს ჯმ-  
ბავი, ისე როგორც ორბელიანსაც. ამას გარდა დაუჯერებე-  
ლია, რომ 1167 წ. თვალდამწვარი დიმიტრი, კიდევ აჰყო-  
ლოდეს ორბელიანებს და მოენდომებინოს ბიძის ჩამოგდება  
და მის ცახტც დაჭრა 1178 წ.

\* ) ქრონიკები თ. უორდანიასი, ტ. I, გვ. 265.

მას აღარავინა ჰყავდა და ამიტომ აზრად დაებადა თავის ერთად-ერთის ასულის თამარის გამეფება. მანამდე არ მომხდარიყო ქალის მეფობა საქართველოში და ამიტომ ადვილი არ იყო ქალის დანიშვნა ტახტის მემკვიდრედ. ამის შესახებ გიორგი მოელაპარაკა დიდებულებს და, როდესაც შეიტყო, რომ ისინი უარს არ იყვენ ქალის გამეფებაზე, საქვეყნოდ გამოაცხადა თავისი სურვილი. თამარის გამეფების წინაამდეგი არავის შეეძლო ეთქვა რამე, რადგან ის ცნობილი იყო როგორც მეტად ჭიდავიანი და კარგის ხასიათის და ყოფა-ჭრევის ქალი. თვით გიორგი მეფის ცოლი ბურდუხან დიდად საყვარელი და პატივცემული იყო ხალხისგან. უფრო მეტად სახელ-გათქმული და პატივცემული იყო მეფის და რუსულდანი, ხვარასნის სულთნის ნაცოლარი. ამ ორის ქალის მცნობი ერი კარგის თვალით უყურებდა მათ გაზღილს თამარსაც და ამიტომ მისი გამეფება არავინ იუცხოვა. 1178 წ. გიორგი მეფემ მიიწვია ნაჭარმაგევში კათოლიკოზი, ეპისკოპოზები და დიდებულები და მათ თანადასწრებით დააგვირგვინა თამარი, როგორც მომავალი მეფე.

ორბელიანთ გარდა, გიორგი მეფემ სასჯელი მიაყენა ბევრს სხვას, განდგომილებაში მონაწილეებს, თუ სიკვდილით არა, მამულის ჩამორთმევით მაინც. მდიდრულად ცხოვრებას შეჩვეულებს, ახლაკი უსახსროდ დარჩენილს დიდებულებს და აზნა-

ურებს გაუჭირდათ ცხოვრება და ამიტომ იმათ მი-  
მართეს ყაჩალობას და მცარცველობას. ქვეყანა მეტად  
შეწუხდა თამამის და გამბედავის ყაჩალების ძარცვი-  
საგან. ამ ძარცვა-ყაჩალობის მოსასპობად გიორგი  
მეფემ შეაღვინა 1180 წ. ჯარის რაზმები და უბძა-  
ნა მათ მოეარნათ საქართველოს ის კუთხეები, საღაც  
ავაზაკობა ხდებოდა, ეძიათ ყაჩალები და მცარცვე-  
ლები და პოვნის შემდეგ ჩამოერჩოთ იმ ნივთებით  
ერთად, რომლებიც მათ ამოაჩნდებოდათ ნაცარცვი.  
ამგვარის ღონისძიებით, ვარდანის თქმით, მალე  
მოისპო ყაჩალობა და დამყარდა სრული მშვიდობია-  
ნობა და უშიშრობა")

1182 წ. გიორგი მეფეს და თამარს ეწვიათ მწუ-  
ხარება მით, რომ გადაიცვალა ბურდუხან დედოფა-  
ლი. ორის წლის შემდეგ გადაიცვალა თვით გიორ-  
გი მეფეც და საქართველოს მეფედ შეიქნა მისი ქა-  
ლი—თამარი (1184 წ.). X

## თ ა მ ა რ მ ე ფ ი.

### I.

დიდებულთა ამბოხება და მათი დაწყნარება.—საეკლესიო კრება.—შემოსევა და განდევნა მტრებისა თამარის მეფობის პირველს წლებში.

თამარის წინაპრებშა საქართველოს დიდებულები მაგრად დაიმორჩილეს და მათ აფასებდენ იმდენად, რავდენადც ისინი ქვეყნისა და მათი ერთგულები იყვენ. ამის გამო ბევრი დიდებულთა გვარი დამკირებულ იქნა და ის გავლენა და პატივი აღარ ჰქონდა, რაც წინად. მათ მაგიერ მეფებშა წინ დააყენეს სხვანი, რომელნიც წინად სხვებზედ დაბლა იდგენ. ამ გარემოებამ დაბადა უკმაყოფილება დამკირებულის დიდებულებისა. ისინი გულში ინახავდენ თავიანთ უკმაყოფილებას და ეძიებდენ უკეთესს შემთხვევას, რომ დაებრუნებინათ თავიანთი ძველებური გავლენა.

ამ ნაირს შემთხვევად უკმაყოფილო დიდებულება სცნეს თამარის გამეფება. იმათ ეგონათ, რომ თამარი, როგორც ქალი, ვერ შეიძლებდა ისე მტკიცედ მართვას, როგორც მისი წინაპრები; მიეცათ იმედი

თავიანთ უფლების აღდგენისა და ხმა-მაღლა-დაი-  
წყეს ლაპარაკი: „აღარ დავემორჩილებით ძევლთა  
ხელისუფალთა და გამგებელთა, ვინაითგან მათგან  
დაძვრულნი და უპატიონი ვართ, და გვარიანნი  
და თვით მსახურეულნი სახლნი უპატიოდ და უსა-  
ხოდ დარჩენილვათ უგვანთა და უხამთაგან“.<sup>1</sup> მეთაუ-  
რად ამ უკმაყოფილოთა გამოუჩნდა მეჭურჭლეთ-  
უხუცესი ყუთლუ-არსლან. მის თაოსნობით უკმაყო-  
ფილო დიდებულები შეიკრიბენ და დადგენ ტფი-  
ლისის ახლო ავლიბრის ველზე. აქ იმათ გადასწყვი-  
ტეს თამარისთვის შეეტყობინებინათ თავიანთი სურ-  
ვილი იმის შესახებ, თუ რომელი მოხელე გამოე-  
ცვალა და ვინ გაემწესებინა. თვითონ ყუთლუ-არს-  
ლანს უნდოდა ამირსპასალარობა. თამარ მეფემ ამი-  
სთანა კაღნიერებისთვის დააჭირინა ყუთლუ-არსლან.  
მისმა მომხრეებმა შეჰყარეს ლაშქარი და უნდოდათ  
თავიანთი მეთაური ძალით გაეთავისუფლებინათ. თა-  
მარმა მათ დასამშვიდებლად მიუგზანა ორი მანდი-  
ლოსანი ქალი: დედა ქართლის ერისთავის, რატი  
სურამელისა ხოშაქ ფოჭელი და დედა სამძივარებისა  
ჭარავ ჭაველი. ამათ პირით თამარმა მოსთხოვა და  
წყნარება და დაპირდა პატივებას, თუ დამშვიდდე-  
ბოდენ. მოციქულების ჩაგრძებით გადგომილები  
დაწყნარდენ, მივიდენ თამართან და ერთგულობის  
ფიცი მისცეს. ამის შემდეგ თამარმა მიღებულის წე-  
სისამებრ მოილაპარაკა დიდებულებთან და მათ რჩე-

ვით გამოსცვალა მხოლოდ ის მოხელენი, რომელიც  
სიბერისა ან ავადმყოფობის გამო აღარ ვარ-  
გოდენ სამსახურისათვის. მაგალ., ამირ-სპასალარო-  
ბა ჩამოართვა ფილენჯისაგან დაუძლურებულს ყუ-  
ბასარს და მისცა სარგის მხარგძელს, ყუბასარსავე  
ეჭირა მანდატურთ-უხუცესობა. ეს თანამდებობაც  
ჩამოართვა თამარმა და მისცა ჭიაბერს. მსახურთ-  
უხუცესობა ჩამოართვა აფრიდონს და მისცა ვარ-  
დან დადიანს; თვით მეამბოხეთა მეთაურს ყუთლუ  
არსლანს ჩამოართვა მეჭურჭლეთ-უხუცესობა და მის-  
ცა კახაბერ ვარდანიძეს.

სამოქალაქო გამგეობაში წესის ჩამოგდების შემ-  
დეგ თამარმა მოახდინა საეკლესიო კრება საეკლე-  
სიო წესების გასაუმჯობესებლად. ამ კრებისათვის  
თამარმა დაიბარა იქრუსალიმითვან ქართლის კათო-  
ლიკოზად ნამყოფი ნიკოლოზ გულაბრიძე, რო-  
მელსაც კათოლიკოზობა დატოვებულ ჰქონდა სიმ-  
დაბლისა გამო და რომელიც გათქმული იყო თავის  
წმინდა ცხოვრებით და სწავლით. კრებას დაესწრენ  
საქართველოს მღვდელ-მთავარნი, მონაზონნი და  
მეუღაბნოენი. ვერ დაესწრო ავადმყოფობის გამო  
კათოლიკოზი მიქელ, რომელიც თითონვე იყო სა-  
ეკლესიო წესების დამრღვეველი. ამ კრებას ხელ-  
მძღვანელობდენ ნიკოლოზ გულაბრიძე და ანტონ  
ჭუთათელი. კრებამ ჩამოაგდო წესიერება ეკლესია-  
ში, გამოცვალა ბევრი ეპისკოპოზი და თვით მი-

ქელ კათოლიკოზის გადაყენებაც უნდოდა, მაგრამ არა ჰქნა კრებამ და მიანდო განგებას სიკვდილის პირად მყოფის დასჯა \*).

საქართველოში ქალის გამეფება იამათ მტრებს, რომელთაც ეგონათ, რომ მეფე ქალს ვერ შეეძლო ისეთი წინაამდეგობა გაეწია მათთვის, როგორსაც მის წინაპრები უწევდენ. ამიტომ ისინი გათამამდენ და იწყეს შემოსევა საქართველოში. პირველად შემოესიენ რანისა და გელაქუნის თურქები და დაარბიეს პალაკაციოს მხარე, ძალის-ხევად წოდებული. მათ წინაამდეგ გაფილა გამრეკელი კახაძე და მცირე ჯარით ბევრად უმეტესი მტერი გარეკა. ამათ შემდეგ შემოესიენ შავშეთისა და კლარჯეთის მხარეს კარნუქალაქელი, შამელი და გარმიანელი თურქები. ესენიც სწრაფად გადევნეს კლარჯეთის ერისთავმა გუზან აბულასანიძემ და სამცხისამ ბოკო ჯა-

\*). უეჭველია, მიქელ კათოლიკოზის კრებაზე დაუსწრებლობის მიზეზი უნდა ყოფილიყო მისი ავადმყოფობა, რადგან სხვანაირად შეუძლებელია აიხსნას ერთის მხრით მისგან არად ჩაგდება მეფისა და საკულესიო კრებისა, როცა არ ესწრებოდა ამ კრებას, და მეორე მხრით საკულესიო კრების გაუბედავობა და მორიდება, როცა არ გადააყენა წესების დამრღვევი და მის არად ჩამგდები კათალიკოზი. ამას გვაფიქრებინებს „ქართლის ცხოვრების“ სიტყვები მიქელის შესახებ: „თვით განაყენა აღრე სასჯელმან ღვთისამან“, ე. ი. ღმერთმა თითონ მოჰკლაო.

ყელმა. მტრების დასაწყინარებლად თვით ქართველებმაც გაილაშქრეს მხარებელების ზაქარია და ივანე სარგისის შვილების და ზაქარია და სარგის ვარამის შვილების წინამძღვრლობით დვინის ქვეყანაში, საითგანაც დაბრუნდენ გამარჯვებულნი და აღაფით დატვირთულნი. მტრები მაინც არ სცხრებოდენ და ესხმოდენ საქართველოს სხვა-დასხვა მხრით. მაგრამ მტრების იმედი არ გამართლდა. ქართველები ყველგან მაგრად უხვდებოდენ შემოსეულს მტრებს და თვით განაპირა ქვეყნების ერისთავები უკუ აბრუნებდენ მათ თავიანთ ლაშქრით.

## II.

თამარის დაქორწინება გიორგი რუსზე.— ყივჩაყების სასამსახური საქართველოში. — გიორგი რუსის ლაშქრუბანი. — გიორგის ცუდი ჭუვის გამოჩენა და მისი გადევნა საქართველოთვან.

თამარის გამეფებას თან მოჰყვა იმისთანა სამძიმო და დიდის საქმის გადაწყვეტა, როგორიც მის საქმროს შოვნა იყო. ქალის გამეფებით სამეფო გვარი უნდა გამოცვლილიყო და ვინ იცის შეფობა რომელს გვარს ჩაუვარდებოდა. ამიტომაც საქართველოს დიდებულები დიდს ყურადღებას აქცევდენ იმას, თუ ვის შეირთავდა თამარი. თამარი არა ჩეარობდა ქმრის შერთვას, მაგრამ დიდებულებს-კი

ეჩქარებოდათ, რადგან ჯერ ერთი ყველას უნდოდა მალე დაენახა თუ ვინ გახდებოდა მომავალის მეფეების წინაპარი, მეორე მხრით საჭირო იყო ტახტის მემკვიდრის ყოლა, რომ ყოველის შემთხვევისთვის თამარის შემდეგ ტახტი არ დარჩენილიყო უმეფოდ. თამარის შერთვის მსურველნი, რასაკვირველია, ბევრნი იყვენ და ამათში ერთ-ერთის არჩევა იმოდენადვე დიდებულების საქმე იყო, რავდენადც თვით თამარისა. ბევრის რჩევის და თათბირის შემდეგ დიდებულებმა მიიღეს რჩევა ტფილისისა და ქართლის ამირის აბულასანისა, რომ თამარის საქმროდ მოეყვანათ რუსეთის დიდის მთავრის ანტონის შვილი გიორგი<sup>\*</sup>), რომელიც თავის ბიძის ვსევოლოდის მიერ გამოძევებული ცხოვრობდა ყივჩაყეთში. პირველის შეხედვით არ იყო ურიგო ეს რჩევა. გიორგი იყო გამოჩენილი თავის ჩამომავლობით და მასთან მართლ-მადიდებელი. ამას გარდა მისი სამშობლო—რუსეთი—ძალიან შორს იყო საქართველოზე, ასე რომ რუსის გამეფება საქართველოში არ უნდა ყოფილიყო საშიში პოლიტიკურად. გიორგის მოსაწვევად დიდებულებმა გაგზანეს ყივ-

\*) ჩვენი მატიანე არ იხსენიებს თამარის პირველის ქმრის სახლს, და უწოდებს მხოლოდ რუსს. მისი სახელი გიორგი მოხსენებული აქვს სტეფანოზ ორბელიას (Histoire de la Siounie, p. 222), რომელსაც რუსეთის ისტორიაც ემოწმება.

ჩაყეთს ტფილისის მცხოვრებელი მდიდარი ვაჭარი  
ზან ქან ზორაბაბელი. ამან მცირე ხნის შემდეგ მართ-  
ლაც მოიყვანა გიორგი რუსი, რომელიც დიდებუ-  
ლებს მოეწონათ თავის მშვენიერის გარეგნობით.  
იმათ მაშინათვე მოლაპარაკება გამართეს რუსუდან  
დედოფალთან, რომ თამარი დაეთანხმებინა გიორგი  
რუსის შერთვაზე. თამარმა ამ წინადადებაზე ასე  
უპასუხა დიდებულებს: „როგორ შეიძლება ამნაი-  
რის საქმის ქმნა, როდესაც არ ვიცით ამ უცხო  
კაცის არც ქცევა, არც ჩვეულება, არც მხედრობის-  
ნიჭი და არც საქციელის საქმენი. დაიცადეთ ვიდ-  
რემდის გაიცნობდეთ მაგ კაცს“. დიდებულებმა არ  
შეისმინეს ეს საფუძვლიანი პასუხი თაშარისა და  
ითხოვდენ, რომ რაც შეიძლება მალე მომხდარიყო  
ქორწინება, რაღვან, მათის თქმით, საჭირო იყო  
წინამდლოლი მხედრობისა. გიორგი რუსის შერთვას  
რომ უარობდა თამარი, ზოგიერთთ დიდებულოთ ახლა  
მეორე საქმროდ დაასახელეს საბერძნეთის იმპერა-  
ტორის ბერძოლიშვილი თამარმა ეს წინადადება  
უფრო შორს დაიჭირა და უარზე დადგა საზოგადოდ  
ქმრის შერთვაზე. დიდებულები მაინც არ ეშვებოდენ  
და უფრო ჯიუტად ითხოვდენ თამარისაგან გიორგი  
რუსის შერთვას. რუსუდანიც აჰყვა დიდებულებს და  
დაათანხმა თამარი, რომ გიორგი შეერთო. დიდის  
ამბით გადახდილ იქნა ქორწილი თამარისა და გიორ-  
გი რუსისა (1185 წ.).

იმის შესაგნებად, თუ რა ნაირად მიაგნეს ყივ-  
ჩაყეთში მყოფს გიორგი რუსს და რა ნაირად მო-  
წვიეს თამარის საქმროდ ვაჭრის საშუალებით, სა-  
ჭიროა მოვიხსენიოთ, რა ურთიერთობა ჰქონდა  
საქართველოს ყივჩაყეთთან 1118 წლის შემდეგ, რო-  
დესაც დავით მეფემ გადმოიყვანა 40,000 ყივჩაყი  
და დაასახლა საქართველოში. ჩვენ გვაქვს საბუთი  
ვითიქროთ, რომ დავით აღმაშენებელის დროს მო-  
მხდარს ყივჩაყთა გადმოსახლებას საქართველოში თან  
მოჰყვა მთელის მეთორმეტე საუკუნის გამავლობა-  
ში მჭიდრო ერთობა და მისვლა-მოსვლა. ყივჩაყთა  
და ქართველთა შორის. ყივჩაყნი, ცოტანი თუ  
ბევრნი, მუდამ გადმოდიოდენ საქართველოში და  
შედიოდენ სამსახურში. ზოგიერთნი ამათგან საქმა-  
რდ წარჩინებულს თანამდებობასაც ღებულობდენ  
თავიანთ სამსახურის დროს, როგორადაც ყუბასარი,  
რომელიც იყო მანდატურთ-უხუცესი და ამირ-სპა-  
სალარი, ყუთლუ არსლანი, რომელიც იყო მეჭურ-  
ჭლეთ-უხუცესი, აბულასანი, რომელიც იყო ტფი-  
ლისისა და ქართლის ამირა და გუზანი, ამ აბულ-  
ასანის შვილი, რომელიც იყო კლარჯეთის და შავ-  
შეთის ერისთავი. ყივჩაყეთითგან გამოსული ყივჩა-  
ყები არა სპობდენ კავშირს თავის სამშობლოსთან  
და ნაცნობებთან წერილების წერის ან მისვლა-მო-  
სვლის საშუალებით. მეორე მხრით ქართველებსაც

თავისუფალი მისვლა-მოსვლა ჰქონდათ ყივჩაყეთში  
სააღებ-მიცემოდ.

დიდებულს აბულასანს, რომელმაც პირველად  
დაასახელა გიორგი რუსი თამარის საქმროდ, ან უნ-  
და პირადად სცნობოდა ვიორგი რუსი მის ყივჩა-  
ყეთში ყოფნის დროს, ან თავის თვისტომთაგან,  
იქნება თავის შვილის გუზანისაგანაც, უნდა ჰქონ-  
და გაგონილი მისი ამბავი. აგრეთვე უნდა სცნობო-  
დათ სხვა დიდებულებს ყივჩაყთაგან, რომელთა რი-  
ცხვი საქართველოში მაშინ საკმაო იყო. იმათ ყვე-  
ლამ მოინდომეს გიორგი რუსის მოწვევა თამარის  
საქმროდ. ამნაირად გიორგი რუსი იყო კანდიდატი  
საქართველოს სამსახურში მყოფთ ყივჩაყთა, რო-  
მელთაც მის მოწვევით იქნება თავიანთ პირადის  
სარგებლობის მიღწევა უნდოდათ. ქართველებმაც ზე-  
მოდ მოყვანილის მოსაზრებით მოიწონეს გიორგი  
რუსის კანდიდატურა და ამიტომ დათანხმდენ მის  
მოწვევაზედ თამარის საქმროდ. იმის ვითარების და  
ხასიათის შესატყობად და მოსაზვევად იმ შემთხვე-  
ვაში, თუ კარგი ცნობები შეიკრიბებოდა, გაგზანეს  
ვაჭარი ზანქან ზორაბაბელი, სარწმუნოებით ურია,  
რაღან ის, როგორც ვაჭარი, იყო ნამგზავრი  
ყივჩაყეთში და იქაურობის მცოდნე. ამას გარ-  
და, რაღანაც ეს მინდობილობა კერძო ხასია-  
თისა იყო და თავდაპირველად იგი საიდუმლოდ უნ-  
და შენახულიყო, ამიტომ ვაჭრის და მასთან ურიის

არჩევა სწორედ შესაფერი იყო: მას ყურადღებას არავინ მიაქცევდა და გამოკითხვის დროს უფრო გულწრფელად მისცემდენ ცნობებს გიორგი რუსზე.

დიდებულებმა დაიმშვიდეს გული. საქართველოს მხედრობას გაუჩნდა საერთო წინამძლოლი და ქართველებმა იწყეს ლაშქრობა გიორგი რუსის წინამძლოლობით. პირველად გიორგიმ გაილაშქრა ყარსისა და კარნიფლის ქვეყნებში, მოარბია ისინი და გამარჯვებული დაბრუნდა. ამის შემდეგ გაილაშქრა დვინის ქვეყანაში, მას უკან გელაქუნისაში და ბოლოს მოილაშქრა განჯის ქვემო მხარე ბალყუნამდე და არაქსის პირი მასისამდე.

ქართველები ყველგან იმარჯვებდენ, არბევდენ ქვეყნებს და ტყვითა და ალათით ბრუნდებოდენ უკან. ამის შემდეგ მოსაზღვრე ხალხები იძულებულები შეიქნენ ხელი აელოთ დროგამოშვებითს შემოსევაზე საქართველოს არემარეში და მტრობის მაგირ მეგობრობა დაუწყეს თამარ მეფეს.

მართალია, გიორგი რუსი კარგი მხედარი გამოდგა, მაგრამ მასთანვე მან გამოიჩინა საძაგელი ზნენი: ლოთობა, გარყვნილობა და სხვა ცუდი საქციელი. თამარის სიტყვები გამართლდენ, რომ საჭიროა გავიცნოთ და მერე გადავწყვიტოთ ქორწინებაო, დიდებულებს სცხვენოდათ თამარისა და ნანობდენ, რომ თითქმის ძალად შერთეს მას ასეთი უზნეო კაცი. თამარი მოთმინებით უცქეროდა გი-

ორგი რუსის საძაგელს ქცევას და ცდილობდა, როგორმე გაესწორებინა. ჯერ მიუჩინა საპატიო და გავლენიანი სამღვდელო პირები, რომ დაერიგებინათ, მაგრამ გიორგი რუსი არ იშლიდა. მერე თოთონ თამარმა პირადად დაუწყო მხილება და დარიგება. რუსმა უარესობა დაიწყო, შეურაცხებას აყენებდა საპატიო პირებს და თამარის უკმაყოფილებას არად აგდებდა. მაშინ თამარმა ხელი აიღო გიორგიზე და ახლო აღარ მიიკარა. ესლა უნდოდა რუსუდანს და დიდებულებს. იმათ გადასწყვიტეს. რომ გიორგი რუსი გაეშორებინათ საქართველოთგან. როგორც შეეფერებოდა სამეფო პირს, დიდის პატივით გაისტუმრეს გიორგი რუსი კონსტანტინოპოლის (1188 წ.).

### III.

თამარის ახალი საქმროები.— მისი მეორედ დაქორწინება დავით სოსლანზე.

რუსის გაძევების შემდეგ საქართველოს დიდებულებს ხელახლა გაუხდათ ასარჩევად თამარისათვის საქმრო. რაკი პირველი ქმარი გაძევებულ იქნა, ახლა უფრო ბევრნი ამოჩნდენ თამარის ხელის მაძიებელნი. ქართველთა შორის ხომ მრავალნი იყვენისეთნი, რომელნიც ჩუმად იწვოდენ თამარის სიყვარულით და ტრფობით. ამას გარდა, ბევრნი უცხო

მეფენი და მეფის წულები ნატრობდენ და ეძიებდენ თამარის ხელს. მათ შორის იყვენ: ბერძენთა იმპერატორის მანუელის უფროსი შვილი პოლიკარპოსი, ასურასტანის და შუამდინარის სულთნის სამადინის შვილი, არზრუმის სულთნის ყიზარსლანის შვილი მუტაფრადინ და შირვანშა აღსართან. ორნი უკანასკნელნი დიდის ამბით მოვიდენ საქართველოში თამართან და მზად იყვენ დაეტოვებინათ მუსულმანობა, თუ თამარი გააბედნიერებდა მათ. თამარმა ისინი მიიღო და ისტუმრა, როგორც შეეფერებოდა სამეფო პირებს. მუტაფრადინი რამდენ-სამე თვეს დარჩა საქართველოში, მაგრამ ვერ ეღირ-სა თამარის თანაგრძნობას და იმედის დამკარგველმა შეირთო სხვა ქალი, რომელიც, მატიანის მოწმობით, იყო ხარჭისგან (ხასისგან) ნაშობი მეფის ასული, შეიძლება თვით თამარის უკანონო დაც. ეს იმიტომ უფროა საფიქრებელი, რომ თამარმა გადაუხადა მათ დიდებული ქორწილი და დიდი მზითევიც მისცა მუტაფრადინს. შირვანშა აღსართანმა-კი იმის მიუხედავად, რომ თამარის ნათესავი იყო (თამარის მამის მამიდა თამარი იყო აღსართანის მამის დედა), ტფილისში ყოფნის დროს ნახა გავლენიანი პირები, სხვათა შორის, თამარის მოძღვარი და კათოლიკოზი, და დიდის ძლვნის მიცემით და მუსულმანის დატოვების დაპირებით, სოხოვა მათ, რომ მანობის დატოვების დაპირებით, როგორმე მისი თამართან დაქორმებერხებინათ.

შინება. ბევრმა შირვანშასაგან მოსყიდულმა ჰყადრა  
მეფეს, რომ შეერთო შირვანშა. მაგრამ თამარმა  
შორს დაიჭირა მათი რჩევა და უსაყვედურა მათ  
ამისთანა რჩევისათვის. მისის ბძანებით შირვანშა  
გაისტუმრეს დიდის პატივით და საჩუქრებითა.

თამარისათვის საქმროს არჩევის დროს დიდებუ-  
ლებმა ყურადღება მიაქციეს თსთა მეფის შვილს  
დავით სოსლანს, რომელიც ნათესავად მოხვდებო-  
და საქართველოს სამეფო სახლს და გვარადაც ბაგ-  
რატიონი იყო. დავით სოსლანი რუსულანს პატა-  
რაობითვე შვილობილად ჰყავდა აყვანილი და ზრდი-  
და თავისთან. ვაჟკაცობასა და ტანადობასთან დავი-  
თი შესანიშნავი იყო თავის ზნეობრივის და გონებ-  
რივის გავითარებით, რისთვისაც უყვარდათ ქართ-  
ველებს. დიდებულებმა გადაწყვიტეს, რომ ეს ვაჟ-  
კაცი, ნათესავი ქართველთა მეფის გვარისა და აზრ-  
დილი საქართველოშივე რუსულანის ხელმძღვანე-  
ლობით, იქნებოდა ლირსეული მეუღლე თამარისა.  
თავიანთ აზრი დიდებულებმა რუსულანს შეატყობი-  
ნეს, რუსულანსაც მოეწონა ეს აზრი, რომელიც იმის  
და თვით თამარის საკუთარის გრძნობის გამომთქმე-  
ლი უნდა ყოფილიყო. რუსულანს უყვარდა, ცხადია,  
თავის გაზრდილი დავითი და თამარსაც, მასთან ერ-  
თად შეზრდილს, არ შეიძლება არ ჰქონოდა მისად-  
მი თანაგრძნობა. ეს იქითვან ჩანს, რომ დიდებუ-  
ლების წინადაღება მაშინვე მიღებულ იქნა თამარი-

საგან. დავითისა და თამარის ქორწინება დიდის ამ-  
ბით იქნა გადახდილი დიდუბის სასახლეში (1189 წ.).  
რუსუდანმა ყოველივე ლონე იხმარა, რომ დიდებუ-  
ლად ედღესასწაულათ ეს სასიხარულო ამბავი. ბა-  
გრატიონთა გვარში მიღებულს ქორწილის წესს მან  
დაურთო ხვარასნული და ერაყული ცერემონიები,  
რის გამოც დღესასწაულობა მეტად ბრწყინვალე  
გამოვიდა. ~~+~~

## IV.

გიორგი რუსის პირველი შემოსევა საქართველოში და  
ერისთავების ღალატი.—მათი დამარცხება და გიორგის  
ხელმეორედ გადევნა.

როგორც ჩანს, დავით სოსლანი ბევრისათვის  
არ ყოფილი სასურველი, რადგან მის თამართან და-  
ქორწინების შემდეგ გაიმართა ერისთავთა შორის  
შეთქმულობა, რომელსაც მიზნად ჰქონდა გიორგი  
რუსის დაბრუნება საქართველოში და მის უფლების  
ადგენა, როგორც თამარის მეუღლისა. ამ შეთქმუ-  
ლობაში მონაწილეობა მიიღეს მსახურთ-უხუცესმა  
დარდან დადიანშა და ერისთავებმა სამცხისამ, კლარ-  
ჯეთისამ, ოდიშისამ, აფხაზეთისამ, სვანეთისამ და  
რაჭისამ, ამათ შეუთვალეს გიორგი რუსს, რომ შე-  
მოსულიყო საქართველოში თავის უფლების ასად-  
გენად. გიორგი რუსმა დაუჯერა მათ და მოვიდა

საქართველოს საზღვრად აზრუმში, საითგანაც შემოვიდა კლარჯეთში. აქ ის მიიღეს კლარჯეთისა და სამცხის ერისთავებმა და გადმოიყვანეს იმერეთს, სადაც შეიყარენ მთელის იმიერ-საქართველოს დიდებულები და გეგუთში გამოაცხადეს თამარის კანონიერს მეუღლედ (1190 წ.).

სრულიად მოულოდნელი იყო თამარისთვის ასეთი გადგომილება. მაშინათვე მოუწოდა ერთგულს ერისთავებს და დიდებულებს ქართლისას, კახეთისას, სომხითისას და სამცხისას. დიდებულებმაც გამოაცხადეს გაცვიფრება და დაარწმუნეს თამარი, რომ იმათ არა იცოდენ-რა შეთქმულობისა. თამარი ეძიებდა გადგომილობის მიზეზს და ვერ ეპოვნა. გადგომილებთან გაგზანა მოციქულებად თევდორე კათოლიკოზი, ანტონ ქუთათელი და სხვა ეპისკოპოზები და ვეზირები, მაგრამ გადაჭრილი პასუხი ვერ მიიღო.

გადგომილებმა გეგუთში ორად გაჰყვეს ლაშქარი. ერთმა ნაწილმა გიორგი რუსის წინამდლოლობით გადმოიარა ლიხის მთა, მოაოხრა ქართლის არენი და დადგა გორსა და ნაქარმაგევს შუა. მეორე ნაწილმა, დადიანებისა და ბელიანების წინამდლოლობით, გადმოიარა რკინის-ჯვარი და ჩავიდა ციხის-ჯვარს, სადაც დასწვა ქალაქი ოძრევ, რომელიც ეკუთნდა ივანე ანუ ყვარყვარე ციხის-ჯვრელს, თამარის ერთგულს დიდებულს. ამათი განზრახვა

იყო აელოთ ჯავახეთი, თმოგვი და ახალ-ქალაქი,  
შემდეგ თრიალეთი და სომხითი და მას უკან მისუ-  
ლიუვენ ტფილისზე, სადაც იმავე დროს უნდა მი-  
სულიყო გიორგი რუსი. თამარ მეფის ბძანებით  
ამირ-სპასალარი გამრეკელი და მხარგძელები წაუ-  
ძლვენ ჯარს ჯავახეთში გადგომილების წინაამდეგ,  
რომელთაც ისინი შეხვდენ მტკვრის პირად ხიდთან.  
ზედ ხიდზე შეექმნათ ომი მოწინაამდეგებს. საღა-  
მომ გაჰყარა ისინი. გადგომილებმა არჩიეს უკეთე-  
სის ადგილის დაჭერა თამარის ჯართან შესაბრძო-  
ლებლად და გაემართენ განძის მთისაკენ, მაგრამ  
არც ეს ადგილი მოეწონათ და იქითგან მივიღენ  
ნიალის ველზე ხინგრის (ჭობარეთის) წყლის პირს,  
თმოგვსა და ერუშეთს შეა. თამარის ჯარი დაედევ-  
ნა გადგომილებს და ნიალის ველზე გაუმართა ომი.  
ორისავე მხრით ვაჟკაცურად იბრძოდენ. ბოლოს  
თამარის ჯარმა აჯობა გადგომილებს, რომლებიც  
გაიქცენ. თამარის მხრით ზარალი დიდი არაფერი  
მომხდარა. მხოლოდ ივანე მხარგძელი დაიჭრა. მიი-  
ლო თუ არა ამ გამარჯვების ამბავი, თამარმა მაშინ-  
ვე შეკრიბა დიდებულები ზრანვის (რჩევის) მოსახ-  
დენად. დიდებულებმა გადაწყვიტეს ლაშქრის გა-  
გზავნა გორის ახლოს. მდგარის გიორგი რუსის წი-  
ნაამდეგ, რომელსაც კიდეც მისდგომოდენ ზოგიერ-  
თი ქართლის დიდებულები და ზოგიერთი მთიუ-  
ლებიც. ჯარს წაუძლვა დავით სოსლანი, მაგრამ

ისევ მალე დაბრუნდა ტფილისს, რადგან გიორგი რუსი, შეეტყო თუ არა თავის მომხრეების ამბავი, გაქცეულიყო იმერეთს ჯარითურთ.

თამარის გამარჯვებამ დააფიქრა გადგომილები და თავი დაამორჩილებინა ისევ მისთვის. ზოგნი თავისთავად გამოცხადდენ თამართან ყელ-საბელ-მობ-მულნი, ზოგთა ითხოვეს შენდობა რუსულანის, კა-თოლიკოზის, ეპისკოპოზების და მანდატურთ-უხუ-ცესის შეამდგომლობით. თამარმა ყველას აპატია დანაშაული. მაშინ დანარჩენნიც მივიდენ თამართან ნაჭირმაგევში და გამოუცხადეს ერთგულობა. სვანე-თის დიდებულებმა თან მიიყვანეს გიორგი რუსიც. თამარმა გიორგისაც შეუნდო და მისცა ნება, რომ ხელშეუხებლად წასულიყო საქართველოთგან. გი-ორგი რუსი საზღვრამდე მიაცილა ივანე მხარგძელ-მა და წავიდა ისევ კონსტანტინოპოლს.

გადგომილების დაწყნარების შემდეგ თამარ მე-ფემ დააჯილდოვა, ვინც ერთგულობა გამოიჩინა. ზოგს უმაღლესი თანამდებობა მისცა, ზოგს მამული, ქალაქები. დამარცხებული და შეწყნა-რებული დიდებულები შეიქნენ თამარის ერთგულ-ნი. მხოლოდ კლარჯეთისა და შავშეთის ერისთავმა გუზან აბულასანიძემ არ მოიშალა თამარის ორგუ-ლობა და ბოლოს კიდეც მიუდგა შავშერმანს, რო-მელთანაც წავიდა და რომელსაც გადასცა თავის საერისთავოს კიხეები. გუზანის ასეთი ჯიუტობა იმით

აიხსნება, რომ მას, როგორც გიორგი რუსის პირადს მევიბარს და შვილს იმ აბულასანისას, რომლის წინადადებითაც მოიწვიეს გიორგი, თავის პირადის ინტერესებისთვის სასარგებლოდ მიაჩნდა მისი დაბრუნება. თამარ მეფემ რომ შეიტყო გუზან აბულასანიძის ლალატი, გაგზანა ჯარით კლარჯეთის და შავშეთის დასაჭერად სარგის თმოვველი და კახა სამძივარი. კოლაში ამათ შეიტყეს, რომ შავერმანის ჯარი გუზანის შვილის წინამძღოლობით შემოსულიყო კლარჯეთში ციხეების დასაჭერად და გუზანის ცოლ-შვილის წასაყვანად. თურქები იყვენ ბლომად, მაგრამ სარგის თმოვველი და კახა საძივარი არ დაერიდენ და შეებენ. თურქები დამარცხდენ და უკუ იქცენ. ქართველებმა დაიჭირეს კლარჯეთის ციხეები და შეიპყრეს გუზანის ცოლ-შვილი. ბოლოს თვით გუზან აბულასანიძეც, რომელიც არ დაცხრა და ყაჩალურად ესხმოდა კლარჯეთს, შეპყრობილ და დასჯილ იქნა დავით სოსლანისაგან თვალების დაწვით.

## V.

დავით სოსლანის პირველი ლაშქრობანი. — გროჩევი რუსის ხელმეორედ შემოსევა და გადევნა. — შანქორის ომი და განჯის აღება. — ამ ქალაქის ხელ-ახლად დაჭერა ემირ-ბუბაქრისგან და ხელმეორედ აღება მისი ქართველთაგან. — თურქების შეიოსევა არტანში.

დავით სოსლანი გამოდგა ღირსეული მეუღლე თამარ მეფისა, ის აკმაყოფილებდა იმას, რასაც ერი

ითხოვდა თამარის ქმრისგან — ვაჟკაცობას და ლაშ-ქრის წინამძღოლობას.

პირველი ლაშქრობა მის წინამძღოლობით მოხდა 1192 წ., როდესაც დაიბადა თამარის პირველი შვილი გიორგი, წოდებული ლაშარ. ახლად დაბადებულის გიორგის ბედზედ დავითმა შეჰყარა ლაშქარი და გაილაშქრა ბართავის ქალაქზედ არანში, სადაც გაიმარჯვეს ქართველებმა და მრავალი ტყვე იშოვეს. დავითმა თამარის და გიორგის დღეგძლობისათვის გაათავისუფლა 30,000 ტყვე.

ერთის თვის შემდეგ დავითი გაემართა ლაშქრით აზრუმისჭკენ, საითგანაც აგრეთვე ძლევა-მოსილი დაბრუნდა.

ამავე წელს მოხდა ლაშქრობა არანის ქვეყანაში. ქართველები მივიღენ გელაქუნს, აქეთგან ჩიიდრეს ხაჩინს, ჩავიდენ ყარყრის ქვეყანას და მიაწიეს ბალყუნამდის. აქეთგან გამობრუნდენ განჯისკენ და შანქორის გზით დაბრუნდენ საქართველოში. ამ ლაშქრობის დროს ქართველები ამარცებდენ დახვედრილს მტერს და არბევდენ გავლილს ქვეყნებს.


შემდეგს 1193 წ. მხარგძელებმა ზაქარია ამირ-სპასალარმა და ივანე მსახურთ-უხუცესმა გაილაშქრეს არაქსის პირზე. აქ მათ შეხვდათ დიდი მტრის ლაშქარი. ქართველებმა ეს ჯარი დაამარცეს, მაგრამ ლაშქრობა აღარ გაუგრძვიათ თავიანთ რიცხვის

სიმცირის გამო და დაბრუნდენ მაშინვე. მსახურთ-  
უხუცესის ივანე მხარგძელის რჩევით ახლა დავითმა  
გაილაშქრა გელაშქნსა, სპარსიბაზირსა. და კორა-  
ლაუქზე, მოარბია ეს ქვეყნები და ძლევა-მოსილი  
დაბრუნდა.

ამნაირად ქართველებმა ორის წლის ლაშქრო-  
ბით თავ-ზარი დასცეს მეზობელს მტრებს და ერთ-  
ხელ კიდევ აგრძნობინეს თავიანთა ძალა. რაიცა  
საჭირო იყო იმათ ასალაგმავად. აღირბეჟანის ათა-  
ბაგი ამირბუბაქარი ძალიან შეწუხებული იყო და  
ნატრობდა ქართველების ჯავრის ამოცრას. სწორედ  
ამ დროს მასთან მივიღა თავის მოუსვენარის ხასია-  
თის გამო კონსტანტინოპოლითგანაც გამოძევებუ-  
ლი გიორგი რუსი და მფარველობა სთხოვა. ათა-  
ბაგმა ამირბუბაქარმა სიამოვნებით მიიღო გიორგი  
რუსი და საცხოვრებლად მისცა არანის ქვეყანა.  
გიორგი რუსმა აქ იშოვა ჯარი, შემოესია ქიზის  
და მოარბია ეს ქვეყანა. გაიგო თუ არა გიორგის  
შემოსევა ხორნაბუჯის ციხის თავმა მახატელიძემ,  
მაშინვე გამოეკიდა მას თავის სამის შვილით და მცი-  
რეოდენის ჯარით, გაუმართა ბრძოლა და დაამარც-  
ხა (1194 წ.). გიორგი რუსმა უშველა თავს გაქ-  
ცევით ორის მონის ამარამ. ეს იყო და ეს, ამის  
შემდეგ გაჰქრა სახსენებელი გიორგი რუსისა.  
თავის ძალ-ლონით რომ ვერაფერი დააკლო-რა  
ქართველებს, აღირბეჟანის ათაბაგმა ამირბუბაქარმა

მიმართა ხალიფას და სოხოვა, რომ გაეცა ბძანება, რათა მთელის მის საბძანებლითგან შეკრებილიყო ჯარი საქართველოს წინაამდეგ გასალაშქრებლად. ხალიფამაც გასცა ასეთი ბძანება და გადასდომ თავის ხაზინითგან აუარებელი ოქრო-ვერცხლი ამ ლაშქრობისთვის, რომელსაც უნდა ბოლო მოეღო მეტის-მეტად გაძლიერებულის საქართველოსათვის. აღირბეჟანის ათაბაგის ძმა ამირმარანი, გამოძევებული თავის სამფლობელოთგან — არანითგან, ამ დროს სცხოვრობდა თავის სიმამრს შირვანშა ალსართანთან. როდესაც ამირმირანმა გაიგო თავის ძმის განზრახვა, გამოუგზანა მოციქულები თამარ მეფეს და სოხოვა, რომ მიეთხოვებინა მისთვის ასული რუსუდანი, დაბადებული 1193 წ., და შესწევნოდა თავის სამფლობელოს დასაბრუნებლად. თამარმა ასულის მითხოვებაზე უარი უთხრა, ხოლო შველას-კი დაპირდა. იმავე დროს თამარმა გასცა ბძანება ჯარი შეკრებილიყო ყველა მხრითგან, რომ მზად ყოფილიყო მტრის დასახვედრად. ლაშქარი მაღე შეიყარა და დაბანაკდა სომხითში. ამირმირანი და შირვანშა ალსართან თავიანთ ჯარით და მხლებლებით მოვიდენ საქართველოში. თამარ მეფემ და დავით სოსლანმა დიდის ამბით მიიღეს და დიდის პატივით ისტუმრეს ისინი.. თამარ მეფემ ისურვა, რომ ისინი მიეღო ტფილისში კი არა, არამედ აგარაში (სომხეთშია). რუსუდან დედოფლის განკარგულებით აგარათა ჭა-

ლაში დადგეს კარავი და მორთეს დიდებულად. შიგ  
დადგეს ოქროს ტახტი თამარისთვის. ტფილისით-  
გან რომ გაემართენ აგარაში თამარი, დავით და  
მათი შვილი გიორგი ლაშა, გზაში მათ რიგ-რიგად  
ეგებებოდენ სხვა-და-სხვა თემის ჯარები. პირველად  
მიეგებენ ყივჩაყები და ოსები, შემდეგ ერელები და  
კახელები, იმათ შემდეგ ქართლელები, შემდეგ მეს-



გიორგი ლაშა, თამარ შეფე, დავით სოსლანი.

ხები, თორელები და შავშ-კლარჯ-ტაოელები, ამათ  
შემდეგ სომხითარები და ბოლოს აფხაზები, სვანები,  
მეგრელები, გურულები და რაჭა-თავკვერ-არგვე-ლები. თვით კარავის კარს თამარს და დავითს მიე-  
გებენ ხელისუფლები და შინაურები. თამარ მეფე,  
დავით სოსლანი და გიორგი ლაშა რომ შევიდენ

კარავში, მათ შემდეგ პირველად შევიდა შირვანშა, როგორც ნათესავი, და მოიკითხა მეფენი. შირვანშას მიჰყვა ამირმირან, ამას მათი დიდებულები. თამარმა დიდის მოწყალებით მიიღო ყველანი და გაუმართა პურობა და ნადიმი. თამარი დარჩა აგარაში ერთი კვირა, რის გამავლობაში სტუმრებს ანადირებდა. ასეთს ქეითსა და გართობაში იყვენ სტუმრები და მასპინძლები, როდესაც მოვიდა ამბავი, რომ ათაბაგს ჯარი შეუყრია და ნახევნითგან საქართველოსკენ მოდისო. თამარ მეფემ მაშინვე შეჰყარა დიდებულები და მოახდინა ზრახვა. დიდებულებმა გადაწყვიტეს ახალის ჯარის მოწვევა. ანტონ ჭყონდიდელმა გაგზანა სამეფოს ყველა კუთხე-ებში ბძანება, რომ ლაშქარი სწრაფად შეგროვილიყო, ხოლო მონასტრებსა და ეკლესიებს მიუწერა, რომ განუწყვეტელი ლამისევანი და ლიტანიობანი აესრულებინათ. ათის დღის გამავლობაში ყოველის მხრით მოვიდა ქართველი ლაშქარი, რომელმაც დაიბანაკა სომხითში. თვით თამარ მეფემ დაათვალიერა შეკრებილი ჯარი და მიმართა გამამხნევებელის სიტყვებით, დალოცა ლაშქარი და გაისტუმრა. ლაშქარს წინ მიუძღვიდა ანტონ ჭყონდიდელი ძელი-ცხოველით, ხოლო მთავარ-სარდლობდა და დავით სოსლანი, მასთან იყვენ ყველა ქართველი მხედართ-მთავარი და შირვანშა და ამირმირან თავიანთ ჯარით. როდესაც ქართველები მივიდენ

ძეგამს შანქორის ახლოს, აქ შეიტყეს მზვერავები-  
 საგან, რომ შანქორისა და განჯას შუა დაბანაკებუ-  
 ლი იყო აუარებელი მტრის ჯარი. დავით სოსლან-  
 მა მაშინვე გააწყო ჯარი რაზმ-რაზმად და დასძრა  
შანქორისკენ მტერთა შესახვედრად. ქართველების  
 ჯარი გაიყო ორად სხვა-და-სხვა მხრით შანქორის  
 მოსავლელად. დავით სოსლანი თავის რაზმით გავიდა  
 მტკვარს და მის მოწინავეებს შეექნათ ბრძოლა  
 მტერთან, რომელსაც ხელს უწყობდა გზისა და ად-  
 გილის უვარგისობა. ხშირი ბალი და კაპანები (ქვა-  
 ღლოვი) უშლიდენ ქართველებს თავისუფლად სია-  
 რულს. მოწინავეები შეწუხებულნი იყვენ მტერთა-  
 გან. ზაქარია ვარამის ძეს მხარგძელს და ბევრს სხვა  
 წინამშრბოლს დიდებულს მოუკლეს და დაუჭრეს  
 ცხენები, ასე რომ მათი საქმე ცუდად იქნებოდა, იმ  
 დროს მათ რომ არ მიშველებოდენ ზაქარია და  
 ივანე სარგისის ძენი მხარგძელნი, რომელთაც გა-  
 მხნევეს და გაამაგრეს ისინი. მალე თვით დავით სო-  
 სლანიც მივიდა მათთან და, რა იხილეს გაჭირებულ-  
 მა მოწინავეებმა დავითი და მისი რაზმის დროშა,—  
 დროშა, რომელიც ვახტანგ გორგასალს ჰქონდა ინ-  
 დოეთში და თითქმ სიბერისაგან სულ გათეთრებუ-  
 ლიყო, უფრო გაბედულად შეუტიეს მტრებს. მტრე-  
 ბი ახლა-კი შეირყენ, ვეღარ გამაგრდენ ერთს ად-  
 გილს და ზურგი იბრუნეს. ქართველები დაედევნენ  
 და გააქციეს აურაცხველი ჯარი. ქართველებმა

სდიეს მათ კარგა შორს მანძილამდე, დახოცეს, დაა-  
ტყვევეს მრავალი და მთელი მათი ქონება ხელთ  
იგდეს. სალამოზედ შემოიქცენ ისევ შანქორისკენ  
და გაათიეს ღამე იმ ალაგას, სადაც წინა ღამით  
სპარსელები იყვენ. მეორე დღეს დილით შანქორე-  
ლები მოვიდენ დავითთან და მიართვეს ციხის კლი-  
ტე. დავითმა აიღო შანქორი და მისი მიმდგომი ცი-  
ხე-ქალაქები და, დაპირებისამებრ, გადასცა ამირმი-  
რანს (1195 წ. ობათვეში).

შანქორის აღების შემდეგ დავით სოსლანი მია-  
დგა განჯას. წინ გამოეგებენ მას ქალაქის დიდებუ-  
ლები. დიდ-ვაჭრები, ყადები და მუსალიმები, თა-  
ყვანი სცეს და სთხოვეს მშვიდობა. დავითი დაპ-  
პირდა მშვიდობას და დიდის ამბით შევიდა ქალაქში.  
გზა ქალაქის კარითგან სულთანის სასახლემდის და-  
ფენილი იყო სტავრითა. მიმავალს დავით სოსლანს  
ხალხი ეგებებოდა თაყვანისცემითა და აყრიდა ოქ-  
როსა და ვერცხლსა. დავით სოსლანი შევიდა სულ-  
თანის სასახლეში და დაჯდა სასულთნო ტახტზედ.  
მაშინათვე შეიქნა დარბაზობა. შირვანშამ და ამირ-  
მირანმა დაიჭირეს დავითთან მახლობელი ადგილი.  
მათ შემდეგ დასხდენ ქართველი დიდებულები თავ-  
თავის ადგილს, როგორც წესი იყო. გაიმართა პუ-  
რობა და ნადიმობა. განჯელებმა დიდ-ძალი ძლვენი  
მიართვეს დავით სოსლანს და იტვირთეს ხარაჯა.  
ქალაქიც დავითმა გადასცა ამირმირანს.

ქართველების გამარჯვებისა და განჯის აღების მახარობლად დავითმა თამართან გაგზანა მანგატურთუხუცესი ჭიაბერი, ხოლო რავდენისამე დღის შემდეგ თითონაც ქართველის ლაშქრით წამოვიდა ტფილისს. თამარ მეფე გაეგება ლაშქარს ქალაქის გარედ, მიულოცა გამარჯვება და მოიკითხა ყველანი დედა-შვილურად. ტფილისის არე-მარე გაივსო ქართველის ლაშქრით, ტყვებით და აუარებელის ალაფით. მატიანის თქმით, ტყვე და საქონელი იმდენი იყო, რომ ხელთ ეჭირა მთლად დიდუბის ველი ავჭალამდის. სახელდობრ, ტყვე იყო 12,000, ავაზა 40 \*), ცხენი 20,000, ჯორი 7,000, აქლემი 15,000, ამათ გარდა აუარებელი ოქრო, ვერცხლი, თვალ-მარგალიტი, ჭურჭელი და ფარჩეულობა. ნატყვენავითგან სამეფოდ აიღეს ერთი მეხუთედი, დანარჩენი დაურიგეს ლაშქარს და მის წინამძღოლებს. ამ ნატყვენავში ერთი უფრო ძვირფასი და შესანიშნავი, თავის მნიშვნელობით მუსულმანთათვის, იყო თვით ხალიფას დროშა, რომელიც თამარ მეფემ შეწირა გელათის მონასტერს.

დამარცხებულმა ამირბუბაქარმა ვერ მოითმინა გამარჯვება თავის ძმისა, რომელსაც ქართველებმა გადასცეს განჯა და მთელი არანიკა და ძალით რომ

\*) ავაზა არის პატარა ვეფხი; ნიზნავს ავრეთვე მეძებარს ძალლს.

ვერას გახდა, მოინდომა მისი მზაკვრულად მოკვლა. მოისყიდა კაცი და გაგზანა განჯას ამირმირანის მოსაწამლავად. ამირმირანი მართლა მოწამლულ იქნა. ეს ამბავი განჯითგან შეატყობინეს თამარს და სთხოვეს შემწეობა. თამარმა გაუგზანა წამალი და თან განკარგულება მოახდინა, რომ დავითი წასულიყო ჯარით განჯის დასაჭერად, თუ ამირმირანი მოკვდებოდა ან ამირბუბაქარი მოინდომებდა მის დაჭერას. წამალმა ვეღარ მიუსწრო და მოკვდა ამირმირანი. ამირბუბაქარიც ამას ელოდა, სწრაფად მიადგა ჯარით განჯას, აილო ძალით ეს ქალაქი და დაიჭირა არანის ყველა ციხე-სიმაგრეები, ხოლო თითონ უკანვე გაბრუნდა. ჯარით განჯისკენ მიმავალმა დავითმა ეს ამბავი გაიგო შანქორში და უკან დაბრუნდა, რადგან შველა დაგვიანებული იყო, ხოლო განჯის და ციხე-სიმაგრეების წართმევისათვის საკმარისი ჯარი აღარა ჰყავდა. დავითი შეუდგა დიდის ჯარის შეგრევეჭს, ხოლო ამ დიდის ჯარის შეგროვებამდე თამარ მეფემ მიანდო ივანე მხარგძელს გელაქუნზე გალაშქრება. ივანე გაემართა მცირე ჯარით და მიმავალს გელაქუნისკენ შეხვდა წინ მტრის დიდი ჯარი, განჯითგან დაბრუნებული. ივანე ამ ჯარს შეებრძოლა და დაამარცხა, დაიჭირა ანბერდი<sup>\*)</sup> და უკან დაბრუნდა. ქართველი ლაშქა-

<sup>\*)</sup> ვარდანი (Additions, p. 270),

რი მალე შეიკრიბა და დავითი წაუძღვა განჯისკენ. დავითმა მიიწვია სალაშქროდ შირვანშაჲი. ქართველებმა მოილაშქრეს არანი და მიადგენ განჯას, სადაც დარჩენ 25 დღეს, დაიმორჩილეს ეს ქალაქი, დაადეს ხარაჯა და დიდის ალაფით დაბრუნდენ. თამარმა შირვანშა დიდად დასაჩუქრებული გაისტუმრა თავის ქვეყანაში (1196 წ.).

ამ გამარჯვების შემდეგ თამარ მეფე და დავითი გადავიდენ ლიხთ-იმერეთს შავის ზღვის პირად დროს გასატარებლად. აქ მათ შეიტყეს თურქთა შემოსევა არტანის ქვეყანაში, ძალოის-ხევში და პალაკაციოში. მეფის ბძანებით ქართველი ჯარი გაემართა თურქების გასადევნად. ქართველები დაეწიენ თურქებს ბასიანში, სადაც ისინი დაბანაკებულნი იყვენ, იმ ადგილს, რომელსაც ერქვა სისხლის-მუცელი, და შეებრძოლენ. თურქები დიდათ დამარცხდენ და გაიქცენ (1197 წ.). 

\* ) ამირამირანის მოწმლვა, განჯის ხელმეორედ აღესა და თურქთა შემოსევა მოთხრობილია „ქართლის ცხოვრების“ მარიამ დედოფლის და თეიმურაზის ვარიანტებში, ხოლო განმარტებული აქვს ბ-ნს თ. ეორდანიას თავის ქრონიკების I ტომში (იხ. გვ. 288).

## VI.

ყარსის დაჭრა.—ომი იკონის სულთანს ნუქრდინთან  
და მისი დამარცხება.—ტრაპიზონის იმპერიის დარსე-  
ბა.—ყარსის დაკარგვა და ხელმეორედ აღება.

საქართველოს საზღვრების სიმაგრისთვის საჭირო  
იყო ყარსი, რომელიც ჯერ კიდევ თურქებს ეჭირათ.  
თამარმა ამიტომ გაგზანა ლაშქარი ამ ციხის ასაღ-  
ბად. რაკი ქართველების გალაშქრება შეიტყეს თურ-  
ქებმა, არც-კი გამაგრებულან, ანებეს ყარსს თავი  
და დაუტოვეს ქართველებს (1201 წ.). თამარმა  
ყარსის მცველად დანიშნა ივანე ახალციხელი. ივანე  
ახალციხელმა ყარსითვან იწყო გარემო ქვეყნების  
რბევა და დაიპყრო კიდევ ისინი. თამარმა უბოძა  
მასვე ყარსისა და მისი მიმღომი ქვეყნები და გახა-  
და ამირათ-ამირად და ათაბაგად ამ ქვეყნებისა.

საქართველოს მოსაზღვრე მუსულმანებმა იგრძ-  
ნეს ქართველების ძალა და დაინახეს, რომ მათი  
მტრობა ძვირად უჯდებოდათ. ამიტომ იმათ მიმარ-  
თეს ხალიფას და სთხოვეს ეშუამდგომლა თამარის  
წინაშე, რომ მათი ქვეყნები არ აეოხრებინათ ქარ-  
თველებს. ხალიფამ გამოუგზანა თამარს მოციქუ-  
ლები ძლენითურთ და სთხოვა, რომ დასჯერებოდა  
მუსულმანთაგან ხარაჯის აღებას და არ ეხმარა მათ-  
ზე მახვილი. თამარსაც ეს უნდოდა და ასეთი პასუ-

ხი მისცა ხალიფას: „აღმისრულებიეს თხოვნა შენი: რომელთაც ინებონ მშვიდობა თავთა თვისთა და მოილონ ხარკი წინაშე ჩემსა, ამათდა მიმინიჭებიეს მეცა ცხოვრება ვედრებისათვის შენისა“.

მაგრამ იკონისა და მცირე აზიის სულთანს ნუ-ქარდინს არაფრად ეპიტნავებოდა ქართველების გა-ძლიერება. შანქორის გამარჯვებისა და ყარსის აღე-ბის შემდეგ ნუქარდინმა გადაწყვიტა ქართველების წინაამდეგ გალაშქრება და შურისძიება მუსულმანთა დამარცხებისათვის. ამ აზრით იმან გადასდო დიდა-ლი ფული, მოიწვია ყოველის მხრით ჯარი და ამხედრდა. მატიანის თქმით, იმან დასძრა 400,000 \*) კაცი. საქართველოში შემოსევამდის თავის ძალ-ლონის მოიმედე ნუქარდინმა გამოუგზანა მოციქუ-ლი თამარ მეფეს და მოსწერა: „მე, ნუქარდინ, სულთანი ყოვლისა ცასქვეშეთისა, უმაღლესი, ანგე-

\*) მარიამ დედოფლის და თეიმურაზის „ქართლის ცხოვ-რების“ ვარიანტებში სწერია — „ოთხმეოცი ბევრი, რომელ არს ოთხასი ათასი“, ხოლო ბროსეს დაბეჭდილში „ოთხმეოცი ბევრი, რომელ არს რვა ათასი“. 80 ბევრი არის რვაასი ათასი, ასე რომ ყველა ვარიანტებში შეცდომაა. ჩვენის აზრით, პირ-ველს ორს ვარიანტში უნდა ყოფილიყო „ოთხმეოცი ბევრი“ — კი არა, არამედ „ორმეოცი ბევრი“, რაიცა იქნება სწორედ ოთხასი ათასი. ხოლო ბროსეს ვარიანტში, სადაც სდო-მებიათ ძველის ვარიანტის შეცდომის გასწორება, შეცდო-მად მიუღიათ არა „ოთხმოცი ბევრი“ არამედ „ოთხასი ათა-სი“ და მოუნდომებიათ გასწორება, მაგრამ გადასწორების

ლოსთა მსგავსი, ღვთის თანამდგომი, მოვლინებული დიდის მაჰმადისაგან, მოგიმცნობ ქართველთა მეფეს თამარს: ყოველი დიაცი რეგვენია. შენ გიბძანებია ქართველთათვის ხმლის აღება, ღვთისგან შეყვარებულის მუსლმანთა ერის დახოცვა და თავისუფალს ხალხზე ყმურის ხარკის დაღება. ახლა მოვალ მე, რომ გასწავლო შენც და შენს ერსაც არ აღება ხმლისა, რომელიც ღმერთს ჩვენთვის უბოძებია. გადარჩენით მხოლოდ ისინი გადამირჩებიან, რომლებიც ჩემს მანდ მოსვლამდე თავს დამიკვრენ ჩემის კარვის წინ, აღიარებენ მოჰამედ მოციქულის ქადაგებას და უარს ჰყოფენ შენს სჯულს“. მოციქულმა არ იკმარა ამისთანა წერილის მოტანა და დიდებულთა წინაშე თითონაც თქვა: „უკეთუ მეფემან თქვენმან დაუტევოს სჯული, იპყრას სულთანმა ცოლად, და უკეთუ არ დაუტევოს სჯული, იყოს ხარჭად (ხასად) სულთანისა“. ამისთანა თავხედურმა სიტყვებმა საშინლად გაარისხა ამირსპასალარი ზაქარია მხარედელი, და ოღელვებულმა ისეთი ღონიერი სილა გააკრა მოციქულს, რომ უკანასკნელი გულშეწუხებული წაიქცა. როდესაც ის მოსული-

ბის დროს მოსვლიათ წერაში უფრო დიდი შეცდომა, რვაასი ათასის მაგიერ დაუწერიათ რვა ათასი.

ჩვენ უფრო გვჯერა მცირე რიცხვი 400,000, რადგან 800,000 ჯარის-კაცი ძალიან დიდი ძალა იყო მაშინდელის დროსთვის.

ერდა, ზაქარია მხარგჩელმა უთრა: „მოციქული რომ არ ყოფილიყავ, სამართლიანი იყო პირველად ენის მოკვეთა შენი და შემდეგ თავისა“.

თამარმა წაიკითხა თუ არა ნუქარდინის წერილი, მაშინვე მოიწვია დიდებულები და გამართა ბჭობა. დიდებულებმა დაადგინეს, რომ ფიცხლავ მოეხმოთ ლაშქარი და ომი გამოეცხადებინათ ნუქარდინის-თვის. რავდენსამე დღეს შეიკრიბა მთელის საქართველოს ლაშქარი ჯავახეთში ვარძიას მონასტერთან. ჯარს მოთავეობდა დავით სოსლანი. ვარძიითგან ქართველები დაიძრენ ყარსისკენ. თამარიც წინ მიუძლოდა ქმართან ერთად. ყარსამდის ერთის დღის სავალი რომ დარჩა, თამარმა გააჩერა ჯარი და ნუქარდინთან გაისტუმრა მისი მოციქული, რომელსაც თავისიც თან გააყოლა წერილითურთ. თამარი ამ წერილით ატყობინებდა ნუქარდინს, რომ ის გზანის მასთან თავის მხედრობას არა მის თაყვანის საცემლად, არამედ საბრძოლელად. შემდეგ გამოეთხოვა ჯარს, დაბრუნდა სამცხეს და დადგა ოძრებს, სადაც მას ახლდენ თევდორე კათოლიკოზი, ეპისკოპოზები და ივანე შავთელი.

ქართველები მივიდენ ბასიანს, საღაც ნუქარდინი თავის ჯარით დაბანაკებული იყო. მტრის ბანაკს ეჭირა უშველებელი ალაგი. დამყარებულს თავის მრავალის ჯარის ძალაზე ნუქარდინს არც-კი ჰყავდა დაყენებული ყარაულები, რომ ქართველების

მისვლისთვის ედევნებინა თვალ-ყური. ამიტომ ქართველები ისე მივიღენ ბანაკთან, რომ თურქებმა ვერა გაიგეს-რა. დავით სოსლანმა გააწყო ჯარი თავს დასასხმელად. წინამშრძოლებად, ჩვეულებისამებრ, დააყენა მესხები, რომელთაც წინამძღვლობდენ ამირ-სპასალარი ზაქარია მხარგძელი და ძმანი ახალციხელნი შალვა და ივანე; მარჯვენა მხრით იმერნი, მარცხენა მხრივ ამერნი. ქართველებმა ააჩქარეს ცხენები და ისე გაემართენ ბანაკისაკენ. თურქებმა რომ დაინახეს ქართველების ასეთი გულდაგული თავდასხმა, შეეშინდათ და სიმაგრეებისაკენ გაეშურენ. ქართველები უმეტესის სისწრაფით მიეტიენ და გარს შემოერტყენ თურქებს. თურქები იძულებულები შეიქნენ ეომნათ. ომის დროს ივანე მხარგძელს, ზაქარია ვარამის ძეს მხარგძელს, გრიგოლ ასათიძეს, შალვა და ივანე ახალციხელებს და ბევრს სხვა დიდებულებს ცხენები დაეხოცათ და ქვეითად იბრძოდენ. მაშინ სხვა მათი ამხანაგებიც ჩამოხტენ და ქვეითად დაიწყეს ბრძოლა. მხოლოდ დავით სოსლანი და ზაქარია მხარგძელი ამირსპასალარი თავიანთ ცხენოსანს რაზმებით მოშორდენ მათ და მოუარეს მტერს, — დავით სოსლანმა მარცხენა მხრით, მხარგძელმა მარჯვენა მხრით, — მიეტიენ უცებ და დაუშინეს მედგრად. მტრის ჯარი შეირყა, იძლია ქართველთაგან და ზურგი შემოაქცია მათ. ქართველები გაედევნენ გაქცეულებს, ხოცავდენ და ტყვედ

იჭერდენ. ქართველებს დარჩათ მთელი ბანაკი, სა-  
დაც აუარებელი სიმდიდრე იყო: ოქრო, ვერცხლი,  
თვალ-მარგალიტი და პირუტყვი საქონელი. თამარ  
მეფე და დავით სოსლანი დიდის ამბით დაბრუნდენ  
ტფილისს. მოქალაქეებმა ძლევა-მოსილის მეფისა და  
ლაშქრის მისაღებად მშვენიერად მოკაზმეს ქალაქი.  
ტფილისშივე ჩასხეს დიდებული ტყვეები და დიდის  
ამბით გაატარეს ტფილისის ქუჩებზე ნუქარდინის  
დროშა (1202 წ.).

1204 წელს ევროპიელმა ჯვაროსნებმა აიღეს  
კონსტანტინოპოლი და დააარსეს ვიზანტიის ადგილს  
ლათინთა ქარებია. ამ ცვლილებით და არეულობით  
ისარგებლა ვიზანტიის იმპერატორის ანდრონიკეს  
შვილმა ალექსი კომნენოსმა, რომელიც, როგორც  
თამარის ნათესავი, ცეოვრობდა საქართველოში:  
იმან სთხოვა თამარს შემწეობა და ქართველის ჯა-  
რის დახმარებით აიღო. შავის ზღვის პირად მდებარე  
ქალაქები და ქვეყნები: ლაზია (ჭანეთი), ტრაპიზო-  
ნი, სამილნი, სინოპი, კერისუნდი, კიტონა, ამას-  
ტია და ირაკლია, რომლებიც დამოუკიდებელ ტრა-  
პიზონის იმპერიად გამოაცხადა, ხოლო თავის-თავი  
იმპერატორად (1204 წ.).

დროთა გამავლობაში ქართველებს ხელითგან წა-  
უვიდათ ყარსის ციხე, რომელიც ხლათის მფლობელს  
ეჭირა. ქართველები ბევრს ეცადენ მის დაბრუნებას, აიღეს  
რავდენჯერმე გაიღაშქრეს ხლათის ქვეყანაში, აიღეს

ბევრი ქალაქი და დაიჭირეს ყარსის ყველა მიღა-  
მოები, მაგრამ თვით ყარსი-კი მისის მაგარის მდე-  
ბარეობის გამო ვერ აიღეს \*). ბოლოს 1206 წ.  
თამარმა კიდევ გაგზანა მის დასაჭერად ჯარი და-  
ვით სოსლანის წინამძღოლობით, თითონ ჯავახეთში  
დადგა და იქითგან ელოდა ამბავს. ქართველებმა  
ციხეს შეუკრეს წყალი და მით აიძულეს მცხოვრებ-  
ლები დამორჩილებულიყვენ. შეწუხებულმა ყარსე-  
ლებმა შემოუთვალეს თამარ მეფეს, რომ ისინი და-  
მორჩილდებოდენ იმ პირობით, რომ ციხე სხვისთვის  
კი არ მიეცა, არამედ თავისთვის სამეფოდ დაეტო-  
ვებინა. თამარი დაპირდა ამ თხოვნის შესრულებას.  
როდესაც ყარსელებმა ციხის კლიტე მიართვეს თა-  
მარს, მან უბძანა თავის შვილს გიორგი ლაშას,  
რომ თვითონ შესულიყო ციხეში და ჩაებარებინა \*\*).

## VII.

დავით სოსლანის სიკვდილი.—ანის აღება და აკლება  
არდებილის სულთნის მიერ.—არდებილის აღება და  
აკლება ქართველების მიერ.

გამარჯვებათაგან გამოწვეული სიხარული და  
ბედნიერება თამარისა ბოლოს დაარღვია მის ქმრის

\*) არაბელთ და სპარსელთ მწერალთა ცნობანი (მოაშე 1898 წ. № I, გვ. 21).

\*\*) იბნალათირი. მოუთხობს, რომ შეწუხებულმა ციხის უფროსმა ყარსი დაუთმო ქართველებს მორიგებით და ქართ-

დავით სოსლანის სიკვდილმა (1207 წ. \*) თამარს  
დარჩა მისგან ორი შვილი — ქალ-ვაჟი: გიორგი ლა-  
შა თხუთმეტის წლისა და რუსულან თრთხმეტის წლი-  
სა. ამავე წელს თამარმა, თავის მამის მაგალითით,  
გიორგი ლაშა აკურთხებინა მეფედ და თანაზიარი  
გაიხადა მეფობაში.

1208 წ. არდებილის სულთანი მოულოდნელად  
დაეცა ანის ქალაქს და გააოხრა. ამ დროს თამარ  
მეფე გეგუთში იყო. არდებილის სულთანმა ანის  
აოხრებისთვის აირჩია აღდგომა დღე. დიდის სი-  
ფრთხილით წამოვიდა, გზაში არავის დაუშავა-რა  
და მიაღვა ანს დიდს შაბათს, აღდგომის ძალზე.  
ანელები სრულებით არ ელოდენ მტრებს და გარ-  
თულნი იყვენ მზადებაში აღდგომის დღესასწაულის  
შესახვედრად. მოაწია ცისკრის დრომაც და ზარე-  
ბის რეკა ასტყდა. ხალხმა იწყო დენა საყდრებში.  
ამ დროს გააღვის ქალაქის კარებიც. სპარსელები  
დაუბრკოლებლად შეესიენ ქალაქს და იწყეს მცხოვ-  
რებლების ულეტა. უცებ მოედო მთელს ქალაქს

ველთაგან სამაგიეროდ დიდი ფული მიიღოვთ (იხ. არა-  
ბელთ და სპარსელთ მწერალთა ცნობანი იქვე გვ. 25):

\*) სომეხთა და მუსულმანთა ზოგიერთი მწერლები და  
ზოგიერთი ქართული წყაროებიც თამარ მეფის სიკვდილს ამ  
წელს უჩვენებენ. ეს შეცდრება წარმოსდგება იქითგან, რომ  
თამარც და დავითიც მეფედ იწოდებოდენ და ერთის სიკვ-  
დილი მეორის სიკვდილად მიუღიათ.

მტრების შემოსევის ამბავი. ხალხი მეტის-მეტად შე-  
შინდა. ზარ-დაცემულები იმაღლებოდენ, საცა-კი შეე-  
ძლოთ: საყდრებში, სახლებში და მღვიმეებში. მტრე-  
ბი შეუბრალებლად დაერიენ და უწყალოდ ამოხო-  
ცეს, ვინც-კი ნახეს. მარტო საყდრებში 12,000  
კაცი დახოცეს. ალაფით დატვირთული მტერი წა-  
ვიდა უკანვე.

ეს საზარელი ამბავი თამარმა გაიგო გეგუთში  
კვირაცხოვლობა დღეს.. გამოუთქმელი იყო მწუხა-  
რება თამარისა და დიდებულებისა. თამარმა მაშინვე  
გამართა რჩევა იმის შესახებ, თუ რა ეჭნათ.. ყველა  
დიდებულები იმ აზრისა იყვენ, რომ ამხედრებუ-  
ლიყვენ არდებილის სულთანზე შურის საძიებლად.  
ამირსპასალარის ზაქარია მხარგძელის რჩევით შურის-  
ძიების დროდ არჩეულ იქნა ისეთივე დღე, როგო-  
რიც სულთანმა შეარჩია ანის ასაოხრებლად—მუ-  
სულმანთა მომავალი მარხვა. თამარმა გასცა ბძანე-  
ბა, რომ დანიშნულის დროსთვის შეკრებილიყო  
ლაშქარი ანში; ხოლო ამირ-სპასალარი მაშინვე წა-  
ვიდა ანს მცირეოდენის ჯარით, ვითომ და სპარსთა  
გასაძევად, რომელნიც დარჩენილიყვენ. დანიშნულის  
ვაღისათვის თავი მოიყარა ანში მესხეთის, თორის,  
კახეთის და სომხეთის ლაშქარმა. ამირ-სპასალარის  
ზაქარია მხარგძელის წინამძღოლობით ამ ჯარმა გა-  
დაიარა გელაშვილი, ჩაიარა ისპიანი, გავიდა არაქსზე  
და მიმართა არდებილს. ქართველები მიადგენ არ-

დებილს იმ დროს, როდესაც თენდებოდა მუსულ-  
მანთა დღესასწაული—აიდი, ე. ი., მთვარის აღვსე-  
ბა. არდებილელებმა სრულებით ვერ შეიტყეს ქარ-  
თველების მისვლა. როდესაც დილით მუყრებმა \*)  
იწყეს ყივილი, ქართველები მიესიენ ყოველის  
მხრით და აიღეს ქალაქი. ქართველებმა ახლა ისე-  
თვე დღე დააყენეს არდებილელებს, რაც არდები-  
ლის სულთანმა ანის ქალაქს: დახოცეს მრავალი  
ხალხი მეჩეთებში, მათ შორის თვით სულთანიც,  
დაატყვევეს აგრეთვე მრავალნი, მათ შორის თვით  
სულთანის ცოლ-შვილიც, აიღეს უთვალავი ალაფი:  
ოქრო, ვერცხლი, თვალ-მარგალიტი და საქონე-  
ლი და გამარჯვებულნი დაბრუნდენ. ზაქარია და  
ივანე მხარგძელები ნაშოვნის ალაფით მივიდენ თა-  
მართან, რომელიც იმ დროს კოლაში იყო (1209  
წელს). 

### VIII.

ქართველების გალაშქრება სპარსეთში.

არდებილზე გალაშქრების დროს დაინახეს ქარ-  
თველმა მხედართ-მთავრებმა, თუ რა სუსტი იყო  
სპარსეთი. ამიტომ იმათ აეძრათ სურვილი ამ ქვე-  
ყანაზე ამხედრებისა. მატიანის თქმით, ამირ-სპასა-

\*) მუყრი — მოლა, რომელიც მინარეთითგან იწვევს ხალხს  
სალოცავად.

ლარმა ზაქარია მხარგძელმა, მისმა ძმამ ივანემ და  
 ბიძაშვილმა მათმა ვარამ გაგელმა მოახსენეს თამარს:  
 „ძლიერო ხელმწიფელ და შარვანდედთა შორის  
 უმეტეს აღმობრწყინვებულო, იხილე და განიცადე  
 სამეფო თქვენი და სკან სიმხნე და სიქველე სპათა  
 შენთა. გულისხმა ჰყავ, რამეთუ მრავალნი ახოვან-  
 ნი, მხნენი და ქველნი იპოვებიან სპათა შენთა შო-  
 რის და არავინ არის წინაამდგომი მათი. აწ ბძანოს  
 მეფობამან თქვენმან, რათა არა ცუდად ვაუქმოთ  
 სპანი თქვენნი და დავიწყებასა მიეცეს სიმხნე მათი,  
 არამედ აღვამხედროთ ერაყს რომევარსა ზედა, რო-  
 მელ არს ხვარასანი, რათა სკნან ყოველთა სპათა  
 აღმოსავლისათა ძალი და სიმხნე ჩვენი“. ამ წინა-  
 დადების განსახილველად თამარმა შეკრიბა დიდე-  
 ბულები, იმათაც მოიწონეს მხარგძელების რჩევა და  
 გადაწყვიტეს გაელაშქრათ ხვარასანზედ (1210 წ.).  
 ღვინობისთვეში ტფილისში შეიყარა ლაშქარი, რო-  
 მელიც თამარმა დაათვალიერა, დალოცა და გაი-  
 სტუმრა სპარსეთისკენ. ქართველებმა გაიარეს ნახი-  
ჩევანზე, გადავიდენ არაქსზე და შევიდენ დარღა-  
რუზის ვიწრო ხეობაში. პირველი ქალაქი, რომელიც  
 აიღეს, იყო მარანდი. მცხოვრებლებმა ქართველების  
 მოახლოვებაზედ დასტოვეს ქალაქი და გაიქცენ  
 მთებში. ქართველებს ეგონათ, რომ აზარბაზავანის  
 ჯარი მარანდის მთაზედ იქნებოდა. ამის გასაგებად  
 ზაქარია მხარგძელმა—ამირ-სპასალარმა გაგზანა ხუ-

თასი რჩეული მხედარი, დიდებული და აზნაური,  
თაყიადინ თმოგველის წინამძღოლობით და დაბარა,  
 რომ არ შებმოდენ მტერს, ვიდრე მას არ აცნობებ-  
 დენ გარემოებას და შესაფერს ბძანებას არ მიიღ-  
 ბდენ. ქართველთა რაზმი ავიდა მარანდის მთაზედ  
 და გადავიდა ვაკეზედ. გაქცეულმა მარანდელებმა  
 რომ შენიშნეს ქართველების ისე მცირე რიცხვი,  
 გამოვიდენ კლდეებითგან და შეებრძოლენ მათ.  
 ქართველები მედგრად დაუხვდენ მარანდელებს, დაა-  
 მარცხეს და გააქციეს. გაქცეულებს თან დაედევნენ.  
 როდესაც ქართველთა უმთავრესი ლაშქარი ავიდა  
 მარანდის მთა-ვაკეზედ, გაოცებულნი დარჩენ ქართ-  
 ველთ მხედართ-მთავრები. იმათ იქ დაინახეს ნაო-  
 მარი, სადაც ეყარენ მარანდელები და მათი ცხენე-  
 ბი, ხოლო ქართველები აღარსად ჩანდენ. მატიანის  
 თქმით, „ხუთასი შუბი ხუთასსა კაცსა და ცხენსა  
 ზედა ესვა“. ქართველების უპოვნელობამ შეაწუხა  
 ამირ-სპასალარი ზაქარია მხარგძელი, რომელსაც  
 ვერ წამოედგინა, თუ რა დაემართა მათ. მაგრამ  
 პატარა ხანს უკან ვამოჩნდენ ის ხუთასი ქართვე-  
 ლიც და შეატყობინეს, როგორც იყო საქმე. ზაქარია  
 მხარგძელისათვის სასიხარულო იყო ქართველების  
 გამარჯვება და უვნებლად გადარჩენა მათი, რადგან,  
 მატიანის თქმით, „არცა ერთი კაცი ქართველი მო-  
 მკვდარიყო“, მაგრამ საყვედური მაინც უთხრა თაყია-  
 დინ თმოგველს ბძანების შეუსრულებლობისთვის.

მარანდითგან ქართველები გაემართენ თავრიზისკენ. თავრიზელებმა ამირ-სპასალარს გამოუგზანეს მოციქულები, გამოუცხადეს მორჩილება და დაპირდენ დიდს ძლვენს და ხარაჯას. ზაქარია მხარგძელმა ამ პირობით დაიჭირა ქალაქი, შიგ დააყენა ქართველი მცველები, მიიღო დიდი ძლვენი და განაგრძოლა შექრობა. როდესაც ქართველი ჯარი მიუახლოვდა მანას ქალაქს, აქაურმა მელიქმაც თავრიზელების მაგალითით მორჩილება გამოუცხადა ამირ-სპასალარს და უძლვნა დიდი ძლვენი. ამირ-სპასალარმა აქაც დასტოვა მცველი ჯარი და განაგრძო გზა. პირველი ქალაქი, რომელმაც ქართველებს ურჩობა გაუწია, იყო ზანგანი. ქართველები შემოადგენ გარს ამ მცირე ქალაქს და იწყეს თხრა მის ალიზის ზღუდეებისა. ამ ქალაქის აღებისა და ოკლების შემდეგ ქართველები გაემართენ ხვარასნისკენ. ყაზმინის მცხოვრებლებმა ვერ გაბედეს გამაგრება, გაიპარენ და გაიქცენ. ქალაქი დარჩათ ქართველებს. მას უკან ქართველებმა დაიპყრეს ხორასნის ქალაქი რომევარი და შემდეგ ჭურგანი. აქეთგან აპირებდენ კიდევ ლაშექრობის გაგრძობას, მაგრამ ნაშოვნი ალაფი და სიმდიდრე ლაშექრისა ისე დიდი იყო, რომ მათი თან ტარება გაძნელდა. ამიტომ ქართველებმა იკმარეს ლაშექრობა და გამობრუნდენ უკან.

როდესაც ქართველები ძლევა-შემოსილნი დაირებოდენ ხორასანში, მანას ქალაქში ვიღამაც გაა-

ვრცელა ხმა, რომ ქართველები ამოუწყვეტიათ ხორასანში ისე, რომ ერთი კაციც არ გადარჩენილაო. ქალაქის მელიქმა დაიჯერა ეს ჭორი და შემდეგი მხეცობა ჩაიდინა დატოვებულს ქალაქის მცველებზე: დაახოცინა ისინი და ძელზე ჩამოაკიდებინა. მაგრამ მანელებმა მალე შეიტყეს, რომ ტყუილი იყო ხმა ქართველების გაწყვეტის შესახებ, რადგან ცოტა ხნის შემდეგ ქართველთა ძლევა-მოსილი ჯარი მივიღა ისევ მანას. მელიქი წინ მიეგება ქართველებს დიდის ძლვნით. როდესაც ზაქარია ამირ-სპასალარმა იკითხა თუ სად იყვენ მისგან დატოვებული ქართველი მცველები, მელიქმა იცრუვა და უთხრა, რომ ისინი თავრიზს წავიდენო. მაგრამ ამ დროს საითგანლაც გაჩნდა ერთი იმ მცველთაგანი, რომელიც კლდეში დამალული გადარჩენილიყო მუსვრას. და ყველაფერი მოახსენა ამირ-სპასალარს. გაბრაზებულმა ზაქარია მხარგდელმა საშინელი ჯავრი იყარა მოლალატეებზე. მელიქი, მისი ცოლ-შვილი და ნათესავები იქვე დაახოცინა. თვით მელიქს და მის შვილებს ტყავები დააძრობინა და ძელზედ (ბოძზედ) ჩამოაკიდებინა, ქალაქი მოაოხრა, მოწვა და ტყვე ჰყო, მანითგან ქართველები წამოვიდენ იმავე გზით, რომლითაც გამოიარეს. ყველგან წინ უხვდებოდენ მორჩილებით და აუარებელის ძლვნით. ამნაირის გამარჯვებით მოვიდენ ტფილისს, სადაც თამარ მეფე მიეგება გამარჯვებულს ლაშქარს. ქალაქმაც დიდის

ამბით იდლესასწაულა გამარჯვებულის ლაშქრის დაბრუნება. იყო განუწყვეტელი ხმა ბუკთა და დუმბულთა. თამარ მეფე შევიდა თავის სასახლეში და დაჯდა ტახტზედ. პირველად შევიდა მასთან ამირ-სპასალარი, მას მიჰყვენ სხვა წარჩინებულნი და დასხდენ რიგზე წესისამებრ. მერმე შემოიტანეს და დააწყეს მეფის წინაშე ის აუარებელი განძნი, რომელიც იშოვეს ქართველებმა ლაშქრობის დროს. გაუკვირდა ისეთი სიმრავლე განძთა თვით თამარსაც, რომელსაც თავის სიცოცხლეში ბევრი სხვა მდიდარი და მრავალი ნაალაფევი ენახა.

## IX.

სიკვდილი ამირ-სპასალარის ზაქარია მხარგძელისა.—  
მხარგძელების გვარი—ივანე მხარგძელის გათაბაგება.—  
დიდოების და ფხოველების დამშვიდება.

ბოლოს გადაიცვალა (1212)<sup>\*</sup>) თვით უმთავრესი გმირი როგორც ამ უკანასკნელის ლაშქრობისა, ისე ბევრის სხვისა—ამირ-სპასალარი ზაქარია მხარგძელი. შესანიშნავია თამარის დროს მხარგძელების გვარი. ზაქარიას გარდა თამარის მეფობაში ბრწყინავდენ კიდევ თავიანთ მხედართ-მთავრულის ნიჭით, ვაჟკაცობით და სამსახურის ერთგულობით პირვე-

<sup>\*</sup>) ვარდანი (Additions, pp. 275, 288); სტეფანოზ ორბელიანი (Histoire de la Siounie, p. 225).

ლად მამა მისი სარგისი, მერმე ქმა ივანე, შემდეგ  
ბიძაშვილები მისი ზაქარია და სარგის ვარამის ძენი  
და შვილნი უკანასკნელებისა: ვარამ გაგელი ზაქა-  
რიას ძე და თაყიადინ თმოგველი სარგისის ძე: თი-  
თქმის ყოველს ლაშქრობაში მხარგდელები იღებდენ  
მონაწილეობას და თავსაც იჩენდენ. ამის გამო თა-  
თამარ მეფე აჯილდოვებდა და აწინაურებდა მათ,  
ჯერ სარგისსა და მერე მის შვილს ზაქარიას მისცა  
უდიდესი თანამდებობა მოელს სამეფოში — ამირ-სპა-  
სალარობა და ლორის სამთავრო; ივანეს — მსახურო-  
უხუცესობა და ქვეყნები კაენისა და კაიწონისა ქა-  
ლაქებითურთ; ზაქარია ვარამის ძეს გაგის ქვეყანა  
და მის ქმას სარგისს თმოგვდ. ეს უკანასკნელი შე-  
სანი შენავი იყო აგრეთვე როგორც მწერალი, რო-  
მელსაც აკუთნებენ „ვისრამიანის“ გადმოქართულე-  
ბას. მხარგდელები მომდინარეობდენ ერთის ქურთი-  
საგან, რომელმაც, სასომხეთის მეფის სამსახურში  
შესულმა, მიიღო გრიგორიანთა სარწმუნოება და  
დაიკავა შესამჩნევი ადგილი სამეფოში. \*) მეთორ-  
მეტე საუკუნეში მხარგდელები შევიდენ საქართვე-  
ლოს მეფის სამსახურში და თავის ერთგულობით და  
ვაჟკაცობით შესამჩნევი ადგილი დაიჭირეს, ასე რომ  
თამარის მეფობაში უველაზე წარჩინებული და გავ-  
ლენიანი გვარი იყო მხარგდელების გვარი. ზაქარია

\*) ვარდანი (Additions, pp. 267, 268).

და ივანე სარგისისის ძენი თავიანთ პირადის სამსახურის გარდა შესანიშნავნი არიან აგრეთვე მეციადინეობით ქართველებისა და სომხების მოსარიგებლად და დასახლოვებლად სარწმუნოებრივ. იქანემ პირდღვირ შიიღო მართლ-მაღიდებლობა, ხოლო ზაქარია-კი ცდილობდა, რომ მთელს სომხის ერს შეეცვალა ზოგირთი საეკლესიო წესი და რიგი, რომლებიც ერთმანერთს აშორებდენ ამ ორს ერს. ამ აზრით იმან შიმართა სასომხეთის პატრიარქს და მეფე ლეონს, რომელთაც მოახდინეს კრება ამ საგნის გადასაწყვეტად (1205 წ.). კრებამ; თანახმად ზაქარიას სურვილისა, გადაწყვიტა, რომ სომხებს მიეღლოთ ხსენებული ცვლილებანი, მაგრამ ამ კრების გადაწყვეტილებას წინაამდეგობა გაუწიეს ზოგიერთმა საქართველოს სამფლობელოში მცხოვრებმა ეპისკოპოზებმა. ბევრს ეცადა ზაქარია, რომ ისინი დაეთანხმებინა, მაგრამ მისი მეცადინეობა უნაყოფოდ დარჩა (\*). შხარგძელების სურვილი სომხებისა და ქართველების შეერთებისა წამოსდგებოდა ნამდვილის სიყვარულისა და ერთგულობისაგან ორისავე ერისა. ისინი ხედავდენ, რომ ამ ორის ერის სარწმუნოებრივი გასხვავება არ იყო სასარგებლო არც ერთისთვის, ხოლო ერთობა-კი ძლიერ სასარგებლო იქნებოდა საზოგადო მტრების მოსაგერებლად.

\*) Additions, pp. 283—287.

ზაქარია ამირ-სპასალარის სიკვდილის შემდეგ თამარ მეფემ მისი თანამდებობა უბოძა მის ძმას ივანეს, მაგრამ მან სთხოვა მეფეს, რომ მისთვის არ ეწოდებინა ამირ-სპასალარი, რადგან ლირსაღ არ სთვლიდა თავის თავს ძმის მოადგილედ. ამირ-სპასალარობის მაგიერ ივანემ სთხოვა თამარს, რომ შისთვის მიენიჭებინა ათაბაგის სახელი. ათაბაგობა არ იყო საქართველოში მიღებული და მხოლოდ თურქების სულთნებს ჰქონდათ ჩვეულებად, რომ მათ შვილების ამზრდელებს ათაბაგად იხსენიებდენ. რადგან ივანე იყო ამზრდელი გიორგი ლაშასი, ამიტომ სთხოვა ათაბაგად წოდება. თამარმა შეიწყნარა მისი თხოვნა და უწოდა ათაბაგი. მისი უწინდელი თანამდებობა-კი — მსახურთ-უხუცესობა უბოძა მის ბიძაშვილს ვარამ გაგელს.

თუ რაოდენად დიდი ადგილი ეჭირა საქართველოში და დიდი გავლენა ჰქონდა ივანე მხარგელს იქითგან ჩანს, რომ მუსულმანი მწერლები მას უწოდებენ მეფეს. ისინი მოიხსენებენ ბევრს ისეთს მის ლაშქრობას მუსულმანთა სამფლობელოში, რომელთა შესახებ ჩვენი მატიანე არას ამბობს. ერთის ამისთანა ლაშქრობის დროს 1211 წ. ხლათის ქვეყანაში, ივანე შემთხვევით ტყვედ ჩაუვარდა მტრებს და გაათავისუფლეს მხოლოდ მაშინ, როცა ის დაპირდის და ტყვების გათავასუფლებას, დიდის სასყიდლის

მიცემას და თავის ქალის თამთას მითხოვებას ხოა-  
თის მფლობელის ოპატისთვის<sup>\*</sup>).

იმ დროს, როდესაც ქართველები ლაშქრობდენ  
სპარსეთში და თრგუნავდენ გარეშე მტრებს, თვით  
თამარის ქვეშევრდომმა დიდოებმა და ფხოელებმა  
ხელი მიჰყვეს რბევას, ხოცვას და ტყვევნას მახლო-  
ბელის მაზრებისას. ფხოელები და დიდოები მეტის  
მეტად გაუვითარებელი და მოუხეშავი ხალხი იყვენ,  
მეტადრე დიდოელები. ფხოელები სახელით მაინც  
იყვენ ქრისტიანები, დიდოები-კი მისდევდენ წარ-  
მართობას და უმსგავსს ჩვეულებას: თაყვანს სცემ-  
დენ უჩინარს ავს სულს და ცხოველებს, მაგ., უნი-  
შნო შავს ძალლს. ძმებს იმათში ერთი დედაკაცი  
ჰყავდათ ცოლად. სჭამდენ უხარშავს ხორცს და დამ-  
ხრჩვალს საქონელსა. ამ ხალხების დაწყნარება თა-  
მარმა ათაბაგს მიანდო. ათაბაგმაც შეჰყარა ისევ  
მთის ხალხი: დვალები, ცხრაძმელები, მოხევეები,  
ხადელები, ცხავადელები, ჭართალელები და ერწო-  
თიანელები. ამ ლაშქრით ავიდა ხალის მთაზე, გა-  
დაიარა მთა-მთა და მივიდა დიდოეთისა და ფხოე-  
თის მთაზედ. მთის მეორე მხარეს მცხოვრებმა დურ-  
ძუკებმა რომ გაიგეს ათაბაგის მისვლა, მივიდენ მას-  
თან და დაპირდენ შველას. ათაბაგმა იწყო ფხოე-

<sup>\*</sup>) არაბელთ და სპარსელთ მწერალთა ცნობანი („მოამ-  
ბე“ 1898 წ. № I. გვ. 28 და 29); Additions, p. 271.

თის და დიდოეთის რბევა. იქ დარჩა სამს თვეს: ივნისს, ივლისს და აგვისტოს. ფხოელები და დიდოელები იძულებულნი იყვნ დამორჩილებოდენ ათაბაგს და დაწყნარებულიყვენ (1212 წ.).


## X.

თამარ მეფის სიკვდილი.—მის მეფობის ვითარება.

1213 წელს თამარ მეფე, ნაჭარმაზევში ყოფნის დროს, მატიანის თქმით, რაღაც სნეულება გამოაჩნდა. ბევრს ეცადენ მკურნალები მის მორჩენას, დაუძლურებული სნეულებისგან ჰაერის გამოსაცვლელად რავდენჯერმე გადაიყვანეს ერთის საზაფხულო ადგილითგან მეორეზედ, მაგრამ ვერას გახდენ და რავდენისამე ხნის ავადმყოფობის შემდეგ თამარ მეფე გადაიცვალა. დიდად სამწუხაროდ დარჩა მთელს ერს თავის საყვარელის მეფის სიკვდილი. მისი გვამი რავდენსამე დღეს დასვენეს მცხეთის ტაძარში და შემდეგ წაასვენეს გელათში და დამარხეს სამეფო სამარხში, სადაც განისვენებდენ მისნი მამა-ჰაპანი.

არც ერთი მეფე ქართველს ერს ისე არ ახსოვს როგორც თამარი. ხალხს ის მიაჩნია მეტის-მეტად ჸეკვიანს, შშვენიერს და გულკეთილს აღამიანად. ერთის სიტყვით, ხალხებს თვალში თამარი მოჩანს სანატრელს მეფედ. არ არის არც ერთი კუთხე საჭართვე.

ლოსი, სადაც თამარ მეფე არ ასჭივდეთ და არ  
მოუთხრობდენ მაზე სხვა-და-სხვა ამბებს. ბევრგან  
ელიან მის მეორედ აღდგენას და გამეფებას. ცხა-  
დია, ასეთი ხსოვნა რომ დაეტოვებინა, თამარი უნ-




კაბენის ეკლესია.

და ნამდვილად შესამჩნევი ყოფილიყო. თამარი რომ  
ძლიერ ლაშაზი და მშვენიერი იყო, ამას მოწმობენ  
მეტატიანენი და მის დროის პოეტები. სილამაზეს -

თან ის იყო მეტად კეთილის გულის აღამიანი. მას უყვარდა ბედისაგან დაჩაგრულები — გლახები და ობლები, რომელთაც უხვად აძლევდა მოწყალებას; ებრალებოდა ყოველი აღამიანი, რის გამოც მას თავის მეფობაში ერთხელაც არავინ დაუსჯია სიკვდილით და მუდაშ მზად იყო მიეტევებინა დანაშაული. როგორც მხურვალე ქრისტიანი, აქცევდა უმთავრესს ყურადღებას საყდარ-მონასტრების შენებას, \*) შეკეთებას და სამღვდელოების მფარველობას. სწირავდა არა მარტო საქართველოს საყდრებს, არა-მედ უცხო ქვეყნებისასაც. ბლობად მიღიოდა მისი შესაწირავი იერუსალიმს, სინაზე, ათონზე, შავს მთაზე, სირიაში და სხვაგან, საღაც-კი შესანიშნავი მონასტრები იყო. მატიანის თქმით, თამარის შეწირულობათა სიუხვით ისე მოიხიბლა საბერძნეთის იმპერატორი ალექსი III ანგლოზი, რომ ერთხელ კიდევც გაძარცვა კოსტანტინოპოლში ბერები, რომელთაც თამარისაგან შენაწირევი განძი მიჰქონდათ. ხარბის იმპერატორის შესარცხვენად თამარმა იმავე ბერებს უფრო მეტი განძი აჩუქა ამის შემდეგ. თამარის საყდრების მფარველობის ბრალია, რომ ახლა ხალხი, საცა-კი ძველი ნაშენი საყდარია, მის აშენებას თამარს მიაწერს.

\*) სხვათა შორის თამარის აშენებულია ბეთანიის და კაჭენის ეკლესიები და გათავებულია გიორგი მეფისგან დაწყებული ვარძიის მონასტრი.

სამეფოს მართვაში თამარმა აშკარად გამოიჩინა სიბრძნე მით, რომ ხელისუფლებად და მხედართ-მთავრებად ირჩევდა ლირსეულს პირებს. ამ სიბრძნე-სთან გამოიჩინა აგრეთვე ვაჟკაცური სიმხნე გაჭირ-



ბეთანიის ეკლესია.

ვებულს მდგომარეობაში მტრებთან ბრძოლის დროს. ის არას დროს არა ჰკარგავდა სასოებას და მოიმედე ღვთისა და თავის ხალხის ვაჟკაცურბისა, აცილებდა



შოთა რუსთაველი:  
ლაშქარს მტერთან საბრძოლელად. ქართველებიც,  
იღტაცებულნი თამარის მხნეობით და თავმომწონენი  
ნიჭიერის წინამძღვრებით, იბრძოდენ თავდადებით

და იმარჯვებდენ მტრებზე. ამ გარემოებათა შეონებით საქართველომ თამარის მეფობაში მიაწია შძლავრობის უმაღლესს ხარისხამდე. პოლიტიკურს სიძლიერესთან საქართველო თამარის დროს ნივთიერადაც მეტის-მეტად გაღონიერდა და გონებრივადაც დაწინაურდა, მთელის მეთორმეტე საუკუნის გამავლობაში მონაგროვებს სიმდიდრეს იმდენივე დაემატა თამარის დროს. მაშინ ამობრწყინდენ ქართულის მწერლობის უკეთესნი წამომადგენელნი შოთა რუსთაველი და ჩახრუხაძე, რომელნიც გატაცებით აქებენ მის ადამიანობას, გონივრობას და სილამაზეს. თამარმა თავის ბრწყინვალე მეფობით დაავიწყა ერს მისი მართლაც რომ შესანიშნავი წინანდელი მეფები და, რადგან, საუბედუროდ, თამარის შემდეგ საქართველო აღარ შესწრებია ამისთანა დროს, ამიტომ დარჩა მარტოდ-მარტო მოკაშკაშე მეფედ ქართველის ერის მეხსიერებაში.

საქართველოს ეკულესიაშ, რომელსაც თამარმა დიდი ლვაწლი დასდო თავის მფარველობით, იგი ჩარიცხა წმინდათა შორის არა მარტო ამ მფარველობისათვის, არამედ მის წმინდა ცხოვრებისათვისაც და დღესასწაულობს მის ხსოვნას 1 მაისს. თამარის თანამედროვე ქართველთათვის არ იყო საკმარისი მისი წმიდათა შორიცხვა. იგინი უფრო მაღ-

ლა აყენებენ თამარს და სთვლიდენ ღვთისა სწორად,  
როგორც ეს მოხსენებულია ზოგიერთს დოკუმენტებში და წარწერებში \*).

\*) იხ. ქრონიკები თ. უორდანიასი, ტ. II, გვ. 81, და  
ბაქრაძის შენიშვნა ვახუშტის საქართველოს ისტორიაში, გვ.  
217, სადაც მოყვანილია გუჯრები, რომლებშიაც „თამა-  
რი წოდებულია „ღვთისა სწორად“. ბ-ნ ექ. თაყაიშვილს და  
არ. ქუთათელაძეს თავიანთ არქეოლოგიურის მოგზაურობის  
დროს უნახავთ გომარეთის ახლოს ერთს პატარა ეკლესიაზე  
წარწერა: „თამარ ღვთისა სწორის ხარისხუფელო“.

ს ა რ ჩ ი ტ ი.

შ ე ს ა ვ ა ლ ი.

88.

I. საქართველოს პოლიტიკური მდგომარეობა.—მისი საზღვრები.—ქართველები და მათი მეზობ- ლები . . . . .	3
II. საქართველოს სოციალი წესწყობილება . . . . .	6
III. სამოქალაქო და სამხედრო წესწყობილება . . . . .	11
IV. სამღვდელოება, საეკლესიო წესწყობილება, საეკ- ლესიო კრებანი . . . . .	16
V. გონების გავითარება.—მწერლობა.—მონასტრების ლვაწლი საქართველოში და უცხოეთში.—არა- ბების და სპარსელების გავლენა . . . . .	18
VI. ეკონომიკური მდგომარეობა. . . . .	21

დავით აღმაშენებელი.

I. საქართველოს მდგომარეობა დავით აღმაშენებელის გამეფების წინ. . . . .	24
II. საქართველო დავითის გამეფების წამს.—ზრუნვა მის მოშენებისათვის.—შეპყრობა და გადევნა ლიპარიტ ორბელიანისა. — პოლიტიკური ცვლილება აზიაში და მისი შედეგი . . . . .	30
III. კახეთის შემოერთება დავითის მიერ.—რატი ორ- ბელიანის სიკვდილი და მისი მამულის დაჭე- რა მეფისგან . . . . .	34
IV. საეკლესიო კრება და მისგან დაწერილი ძეგლი .	36
V. სამშვილდის აღება.—თრიალეთზე თურქების დამარ- ცება.—გიორგი მეფის სიკვდილი.—რუსთავის	

აღება.—ტაოში თურქების დამარცხება.—გი-	
შის დაჭერა და გრიგოლიძეების შეპყრობა.—	
დიმიტრის გალაშქრება შირვანში.—მეფის გა-	
ლორება არაქსის ნაპირებზე.—ლორის და	
აფარანის აღება . . . . .	42
VII. ყივჩაყების გადმოყვანა. . . . .	47
VIII. ლაშქრობანი 1120 და 1121 წლებისა . . . . .	50
VIII. აღება ტფილისისა.—გალაშქრება შირვანში ორ-	
ჯერ.—აღება დმანისისა.—გალაშქრება დარუ-	
ბანდზე,—აღება სასომხეთის ციხეებისა.—	
აღება ანისა.—გალაშქრება შირვანში.—ჭივ-	
ჩაყების მოწყობა . . . . .	56
IX. დავით მეფის მოღვაწეობა. . . . .	63
X. დავით მეფის ოჯახი.—დიმიტრის მეფედ გამოცხა-	
დება.—დავითის ანდერძი . . . . .	71
<b>დიმიტრი I და დავით III.</b>	
I. ბრძოლა მტრებთან. . . . .	74
II. შინაური არეულობა . . . . .	79
III. დავითი III-ის მეფობა. . . . .	82
<b>გელა გიორგი III.</b>	
I. ლაშქრობანი და ბრძოლანი. . . . .	84
II. შინაური არეულობა . . . . .	93
III. საეკლესიო კრება.—თამარის სამეფოდ დანიშვნა.—	
ყაჩალობის გავრცელება და მისი მოსპობა.—	
ბუდუხან დელოფლის და გიორგი მეფის სიკვ-	
დილი . . . . .	98
<b>თ ა მ ა რ მ ე ც ე.</b>	
I. დიდებულთა ამბოხება და მათი დაწყნარება.—საეკ-	
ლესიო კრება.—შემოსევა და გადუვნა მტრე-	
ბისა თამარის მეფობის პირველს წლებში . . . . .	102

### III

- II. თამარის დაქორწინება გიორგი რუსზე.—ყივჩაყების სამსასური საქართველოში.—გიორგი რუსის ლაშქრობანი.—გიორგის ცუდის ქცევის გამოჩენა და მისი გადევნა საქართველოთვან 106
- III. თამარის ახალი საქმროები.—მისი შეორედ და-ქორწინება დავით სოსლანზე. . . . . 112
- IV. გიორგი რუსის პირველი შემოსევა საქართველო-ში და ერისთავების ღალატი.—მათი დამარ-ცხება და გიორგის ხელმეორედ გადევნა . . 115
- V. დავით სოსლანის პირველი ლაშქრობანი.—გიორგი რუსის ხელმეორედ შემოსევა და გადევნა.—შანქორის ომი და განჯის აღება.—ამ ქალა-კის ხელახლად დაჭერა ამირ-ბუბაქრისაგან და ხელმეორედ აღება მისი ქართველთაგან.—თურქების შემოსევა არტანში . . . . . 119
- VI. ყარსის დაჭერა.—ომი იკონის სულთან ნუქარ-დინთან და მისი დამარცხება.—ტრაპიზონის იმპერიის დაარსება.—ყარსის დაკარგვა და ხელმეორედ აღება . . . . . 130
- VII. დავით სოსლანის სიკვდილი.—ანის აღება და აკ-ლება არდებილის სულთნის მიერ.—არდები-ლის აღება და აკლება ქართველების მიერ . 136
- VIII. ქართველების გალაშქრება სპარსეთში . . . . . 139
- IX. სიკვდილი ამირ-სპასალარის ზაქარია მხარგძელისა,—მხარგძელების გვარი.—ივანე მხარგძე-ლის გაათაბაგება.—დიდოების და ფხოელე-ბის დამშვიდება. . . . . 144
- X. თამარ მეფის სიკვდილი.—მის მეფობის ვითარება . . . . . 149

947. 922

329

შეცლომების გასწორება.

სტრიქ.	არის	უნდა
29	5 ზევ.	თუნქებთან
31	9 ქვევ.	შეყვარებულს
68	8 ზევ.	სამღვდელობა
81	9 ქვევ.	წაღილი,
90	10 "	ამიტოთ
105	11 "	გუზინ
112	10 ზევ.	გადაწყვიტეს.
126	11 "	დიდებულები.
128	8 ქვევ.	შეგრევებს
129	1 ზევ.	წაუძლნა
"	9 ქვევ.	თურჭებს
133	1 ზევ.	უთრა
134	6 ქვევ.	ცხენოსანს
135	12 ზევ.	იპერია
"	10 ქვევ.	დახმადებით

ამ წიგნის სურათებისათვის ექვსი კლიშე გვათხოვა ქ.  
შ. წერა-კითხვის გამავრცელებელის საზოგადოების გამგეო-  
ბამ, ხოლო ერთი—ბეთანიის ეკლესიისა—ბ-ნმა არ. ქუთა-  
თელაძე, რისთვისაც მათ ვუძღვნით დიდს მაღლობას.

347.922  
3 279



ଓ ৩ ০  
ବ୍ୟାଙ୍ଗ 40 ମୁଦ୍ରଣ  
ଓ ৩ ০